

ASO GAFUA, 26 MATI 2018

Na nofoia le Nofoa e le Fofoga Fetalai i le itula e 9:00 i le taeao.

Tatalo.

SAUNOAGA FAAFEILOAI A LE FOFOGA FETALAI

FOFOGA FETALAI: Ou te faasilasila atu ua toe amalia nei Taualumaga ma Galuega a le Fono Aoao Faitulafono.

Malo le soifua, malo foi le lagi e mama i le paia o lenei Palemene, le afio o lau Afioga i le Palemia faapea foi lau Afioga i le Sui Palemia ma le mamalu o le Kapeneta, ae a Minisita Lagolago ma Taitaifono faapea sui usufono mamalu o le Palemene, faapea foi Faauluuluga ma le Ofisa o le Fono.

O le tatou galuega e sosoo ai o le Saunoaga Faa-Minisita a le Afioga i le Taitai o le Malo, ou te tapa ma le faaaloalo lau Afioga i le Palemia mo lau Saunoaga.

SAUNOAGA FAA-MINISITA A LE AFIOGA I LE PALEMIA

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI (Palemia): Lau Afioga i le Fofoga Fetalai faapea foi sui usufono mamalu o le Maota nei, ae a le faafogafoga mai a Samoa i ona tulaga faalupe. Afio foi Le Ao Mamalu, O Le Malo, ma le Sui o le Fono a Sui Tofia. Le tapuaiga a Samoa aua Aiga ma a latou Tama, o Tama ma Aiga, faapea ia le Usoga a Tumua ma Puleono i Salafai. Tatou te auai faatasi i lenei taeao fou i le viiga ma le faaneetaga i lo tatou Atua, i Lona alofa le uma i le taitaiina mai o lo outou soifua ma lo tatou ola i lenei taeao fou, taeao totoa, taeao manino aua le Fonousu a Samoa. Ia ma e le mama i le faafogafoga mai a Samoa ae a le faatinoina foi o tatou tiute e tusa ai ma lo tatou valaauina. Ua atoa le vaiaso talu ai ona faaaau pe a tatou felafolafoaiga, ia ma o aga foi faa-Maota nei, e le milia faauu upu pe a oo foi ina loloto le tai i tulaga e aafia ai lo tatou atunu. O le ala foi lea ua ou manatu ai a o le i talanoaina ia Tulafono taua tele ua i lumamea, ia se i fai sina au faamatalaga laititi i Tulafono nei.

E lua Tulafono, Tulafono o le Toe Fetunaiga o Itumalo Faa-Palota ma le Tulafono Toe Teuteu o Faiga Palota 2018 o le a sosoo ai. O le Tulafono ogaoga le taua, e le gata ina taumafai e tagofia tonu lava le agaga lea, o le tuuitiitia o ni moliaga ina ua tuanai Faiga Palota, ae ua lotea ai foi ma Faavae o aiatatau mo le fausia o tonu fai o lo tatou Malo ina ia i ai se fua e tau faalaugatasia ai le sao ia tutusa, pe tau i ai ni foliga tau tutusa o itumalo uma lava o Samoa.

Saunoaga Faa-Minisita a le Afioga i le Palemia

Ma le tuuaia ai ua lilifa i se vaega o le atunuu le pulea o le Palemene lenei ma le Malo, ma ua faapito ai manu ia Tasi. O lea ua matua manino lelei saunoaga a sui usufono mamalu i totomu o le Maota lenei. Ia tatou taumafai ia e faataoto ni taiala e taofia ai le fai o nei mea o moliaga e mataga, e mataga ia i latou ua molia, mataga i sui ua uma ona tofia, mataga i itumalo o aafia ai. Ma afai tatou te mananao tonu lava e faatino le agaga lea ua tatou lagonaina pea o faaleo i totomu o le Maota lenei, e i ai le taofi o le Kapaneta ma le Vaega toatele o le Maota, ua tatau ia ona tatou vaai mamao, vaai mamao i le ata lautele, le bigger picture, tatou vaai mamao i le ata lautele, ae le o le tatou vaai vaapiapi, na o lou lava pausisi, ona matua auaoa atoa ai lea o le silasila mamao i ona tala atu ma le fofo e tatau ona fai. -Aua foi tatou te fefefe e faatino. Leaga o lea lava e taoto upu taiala o le Tusi Paia, ‘*o le na te silafia le mea e tatau ona fai ae le faia, o le agasala maoae lava lena i luma o le Silisili Ese.*’

O le faapogai lea lau Afioga ma le mamalu o le Maota, o le lagonaina pea i totomu o le Maota lenei talosaga a le tele o itumalo, e faapea, ua tatau ona toe faaopoopo ni sui faipule o latou itumalo, ua toatele tele le faitauaofai o tagata o latou itumalo, aemaise foi, a latou Lola palota ua faatupulaia. Ma e talu lava ona ou ulufale mai i le Maota lenei, e tai le asa lava se Tauaofiaga a le Palemene ma lagona pea talosaga nei e tuu mai i totomu o le Maota. Ma o se mataupu e faateteleina pea ona laga aemaise lava le sui o itumalo tetele, o lo o faatupulaia pea lo latou faitauaofai, ona e le maalofia le lolofi mai pea i ai, o tatou tagata mai tua ona o galuega e pei o le Vaimauga ma Faleata. Ma ua tupu foi i Salelologa o le taulaga tele o le ulufafo ma le ulufale mai Salafai. E le gata i lea, ua i ai foi ma lesi uiga fou faatupu vevesi, o le feoai o le aupalota e fesuisuiiai a latou itumalo e palota ai, ae afua lava i uiga piopio faumalo o sui faatutu. O le isi lea o mataupu o lo o tagofia pea i Teuteuga o Tulafono, ina ia tau tuuititia ai, ona te i lava lea, ua foliga toagaogao isi itumalo, ae soona fefetevale aupalota a isi itumalo i uiga ia o le fesuisuiiai o itumalo e palota ai, aemaise pe afai e mautinoa le sui e toe tulai mai po o le fai, po o le 1 faia foi o se palota ina ua autasi alii ma faipule o se itumalo, o uiga ia o le soifuaga, e taaina i mea vaivai o le soifua.

Lau Afioga i le Fofoga Fetalai, o auala faigofie ia sa fofai e le Palemene mataupu ogaoga lenei o le faatupulaia pea o le faitauaofai o tagata o se itumalo, o le faaopoopo o sui faipule, e pei o le suiga na fai i le 1991. Na faaopoopo ai sui e toalua, tasi mo Safata, tasi mo Salega. Ona siitia ai lea o sui o le Palemene mai le 47 i le 49 le aofai. Ona toe siitia foi lea o sui o le Palemene ina ia tali atu ai i ni sui faapitoa faaopoopo mo tamaitai, lea ua i ai nei sui o le Palemene i le aofai e 50. O le mea moni, o le faaopoopo o sui o le Palemene, ua na o se faiga le tumau. E le o se faiga mautu. Ou te faatusa i o tatou auala fonofono na ona fono, ae pau mai loa le timu, ona toe malepe uma foi lea o mea na fonofono. Aisea? O lo o alofia pea le mea amiotonu, le mea mautu sa tatau ona fai. O le sua atoa i luga o le auala, ae toe fau atoa lona faavae i fausaga e umi ai ona faaaoga e aunoa ma le tau fonofono.

Saunoaga Faa-Minisita a le Afioga i le Palemia

O le -auøau atoa lea o le faavae o Tulafono Teuteu nei e lua o le a feagai ma le Maota i lenei taeao. O le toe laga atoa i le suati i luga o le aulapatai, sua le aulapauta, ae toe faataoto se faavae e tumau, e atoatoa. E faigofie ai ona tagofia i le lumanai nisi toe teuteuga, po o le tai lima tausaga ma fai, ia po o le tai sefulu tausaga ma fai, nai lo le mea lea na tatou sau ai mai lava i le Tutoatasi, o le tuutuuloloa e tali atu ai i le mataupu tuga e tupu pea, tupu pea e le mataofia, o le faatupulaia lea o le faitauaofai o tagata palota. O lea ua tofia nei le Komiti e tagofia tuaoi o Faiga Palota i se faiga e faaauau pea.

I le taoto ai o faiga faavae o lo o tatou alu ai nei mai le amataga, na silafia lava e toeaíina na fausia le Faavae, ua na o se Faavae i le taimi lea e amata ai le Faigamalo, a o nisi faigata e tulai mai i le lumanai, lafo ia i latou o augatupulaga o le lumanai, faatino e i latou mea e tatau ona fai, ia fetauai ma le taimi e tatau ai.

Lau Afioga i le Fofoga Fetalai, o le fatu atoa o le faatinoga o le amiontonu i nei mea o faiga filifiliga, e faavae i le palota mai o sui o itumalo faapalota i le Palemene, o lo o afifi i Tulafono t ua e lua e tatau ona faamalieina. Tulafono muamua, ia tasi le tagata, tasi lana palota, one man, one vote. O le Tulafono lea o lo o faavae ai Faiga Palota a Atunuuma o le Lalolagi, o lo o faatino i fuafuaga Faatemokarasi.

Lua, o le faitauaofai o tagata ma Lola palota o itumalo, ina ia i ai se tulaga e tau faatusatusa ai, ma ia i ai se tau faapaleni o latou sui i totonu o le Maota o le Palemene. O lea ua fofo fenumiai, ua leva ona i ai mai lava ina ua tatou faatoa Tutoatasi, i le lua o palota a itumalo tetele, lea ua uma ona fofo i le Nofoiga talu ai a le Palemene, e pei ona vaevae ai Safata ma isi itumalo, sa tai lua sui usufono ma lua ai foi palota a le tagata e fai. Lea ua tasi nei le tagata, tasi lana palota, (one man or woman, one vote.)

Lau Afioga i le Fofoga Fetalai, o Tulafono la nei, o le a fof ai le tau faapaleni, o itumalo faapalota i le tau faatusatusa ai lea o le sao o itumalo, i le fausia o tonu fai. E le mafai, le mafai, le mafai ona alofia, le tupu pea o le faitauaofai o le toatele o tagata palota, o se itumalo, faatasi ai ma a latou Lola palota, ma aafia ai pea le agaga ina ia faapaleni tutusa sui usufono i totonu o le Palemene, ina ia ogatasi ma le faitauaofai o tagata o le itumalo faapalota, ona o i tonu, o lo o taoto ai le paoa, i le fausia o tonu fai a le Malo. O ai ea e afisi, o ai e faasavali? O le fatu lea o faiga palota faatemokarasi.

Lau Afioga i le Fofoga Fetalai ma le mamalu o le Maota, i le Malo tele pito malosi o le lalolagi o Amerika, o le latou fofo o le tau faapaleni, o le faalua lea o latou Maota Faitulafono, o le Senate ma le Maota o Sui. I le 50 itumalo faa-Setete o le Malo tele o Amerika, e na o le taitoalua lava ia faipule mai itumalo taitasi. E maua ai le 100 o faipule o le Senate, po o le fia miliona o le toatele o le faitauaofai o se itumalo, e na o le toalua lava faipule o le Senate mai le itumalo, e faatutusa uma ai itumalo e faitau miliona ma miliona tagata ma itumalo laiti, e na o le taiselau o afe o tagata, ma o lo o tumau ai pea Sui i le Senate i le silia i le 200 tausaga, talu ona tulai mai le Malo tele o Amerika.

Saunoaga Faa-Minisita a le Afioga i le Palemia

Ona faapalen'i lea, i le faatuina o le Maota o Sui Usufono, e fua i le toatele, mo sina faataitaiga, o le tasi o le faipule i le Maota o Sui i le tai 200 afe o tagata o le Itumalo. A oo la ina soalaupule ia Tulafono o le Malo tele o Amerika, o le Malo e pito i paoa o le lalolagi i le taimi lenei, e mafai ona faigofie ona pasi le Tulafono e le Maota o Sui, e fulisia i le toatele o sui mai itumalo tetele, ae oo mai loa i le Senate, e mafai ona fasioti i ina, le Tulafono e faipule o itumalo laiti, pe afai lea e leai se finagalo autasi. O le latou lea faapalen'i. O le faapalen'i o itumalo lapopoa, ma itumalo laiti.

Sa i ai le manatu o le vaega lenei o le HRPP, o le a faalua foi Maota o le Palemene o Samoa, o le Maota Maualuga e tuu i ai tagata maualuluga, ma le Maota Maualalo, e tauva i ai latou e maualalo, ia po o le aufaalepopoi foi. Ia ona ave lea o fesili nei e lua i le atunuu i le 1990 i le Referendum po o le Pelepesite na fai, e 2 fesili na ave,

- (i) Pe tou te talia le faapalota o i latou ua ausia le 21 tausaga agai i luga, e aofia ai o taulelea, o faifeau ma o latou faletua o se faiga lea e faalupe i le gagana Peretania o le Universal Suffrage?
- (ii) Pe tou te talia le 2 Maota o Palemene o Samoa?

Na teena i le pelepesite le faalua o Maota, lea ua na o le tasi ai ia le tatou Maota o le Palemene. Na o le faapalota o le au 21 agai i luga na fulisia ai Samoa. O lo o limataitaiina ai pea ia tatou faiga palota, mai lena taimi e tau mai i le taimi lenei. O lona uiga, o le a tasi ai pea le Maota o le Palemene o Samoa, seia oo lava i le faavavau ia ma e sefe ai foi a tatou tupe soona alu a le atunuu.

O le taumafaiga la ua fai nei i le Tulafono lenei, o se taumafaiga e faataoto ai se faavae mautu o tuaoi o itumalo faapalota ma e ono fesuisuiai foi i le lumanai. O le ala lea o le suia o faalupega o itumalo mai le faalupega tuai, õo itumalo faaalalafagaõ, e aafia ai ia tulaga faale-aganuu, a o lea o le a faalupe i le Tulafono o õltumalo Faa-Palotaõ. O lona uiga e na o itumalo faapalota mo le filifilia o sui usufono faatutu, e momolia le tofa ma le faautaga i totonus o le Palemene. Na o mataupu lava faapalota e faataua mo le filifilia o sui usufono, e le aafia lava tulaga faale-aganuu.

O sina faataitaiga; a alu alu foi ua tau le paleni fuainumera o lou lava itumalo, ia ona faamatuu atu lea o se isi foi pitonuu e palota faatasi ma itumalo faapalota tu tuaoi. Pe afai ua matua moomia tele se fua e faalaugatasia ai na o tulaga lava o palota lea e mafua ai ae a oti se isi o Tapaa'u o Lepa, o le faiga tuai lava o Tu ma Agaifanua le auai o latou faleupolu ma a latou launonu, i auala masani mo maliu po o o le o atu foi ma latou tugase i se usu i se faanofonofo, e pei ona masani ai tu ma agaifanua faale-aganuu.

O le tulaga foi i le aofaiga o faipule e tatau ona i ai sui faipule i le tatou Palemene, lea ua 50 faipule i le taimi lenei, i le tatou lea faitauaofai e 190,000 tagata, e faatusa la ia Niu Sila, ua lalata i le 5 miliona tagata, o loøo nofoia Niu Sila, ae naøo le 120 le aofai o faipule o le latou Palemene. O lona uiga, i se fua faatatau, pe a ma le tasi le faipule, i le 42,000 o tagata.

Saunoaga Faa-Minisita a le Afioga i le Palemia

A fua la tatou i le faa Niu Sila, e na o le 190,000 tagata, o lona uiga e tatau ona fa ma le afa faipule ia le tatou Palestene, tele tupe ua faasaoina. O lona uiga, e tatau ona na o le 4 faipule, ma le faafafine e toatasi i le faa Niu Sila lea. Ae peitai i le taimi lenei, ua 50 faipule i le Palestene o Samoa ae naøo le 190,000 le tatou faitauaofai. Ua ova mamao ia faipule i le tatou Palestene. Sa ou taua le faafafine e toatasi. Fai mai le mau, a le isi faafafine, o le matou ituaiga, o le mafuaaga ua matou faapea ai, toeitiiti lava maea le fausia o le uluai faafafine, ae pe faafusei loa le eletise, ua faalava ai foi Lusifelo, tap , le ki. Ona fetalai lea o le Atua, ua lava ia lena tou te o e tou te eva ai i le lalolagi, ma avea ai outou o ni tagata faalepopoi. Ae o lea lava e tatalo isi o le tatou Palestene, se toe faaopoopo ni isi itumalo, ma nisi faipule.

Lau Afioga i le Fofoga Fatalai, o tulaga ia i le aoaotetele o Tulafono ua taoto nei i lumamea, o lo o tau faapalenai ai le fuitauaofai e pei ona taumafai mai i ai, le Minisita ma le aufaigaluega. Ia e le faapea foi ua 100%. Soøo se mea lava e tau amata, e 1 faapea ua 100%. O suiga amata. Ae i le agai atu i le lumanai, e le tau iso o le a agai atu lava, ina taoto i lautuatonu le manulauti o lenei Teuteuga, ma fuafuaga mamao a le Faigamalo lenei a le HRPP.

O nei suiga ua taoto nei, e le i tasi le fonotaga a le Kapaneta na tagofia ai. Tele fono ona o le ogaoga o mataupu. E le o ni fono na vave ona taunu ai i le fulisia. E aafia uma Minisita o le Kapaneta, ae ua lolo se taofi, ona e t ua le faamoemoe i lona lava pausisi. O le lagona, o se vaitau taua tele lenei, ailoga tatou te toe maua se isi avanoa e lotea ai teuteuga faapena o le Faavae. Nei o lo o tagiuu le tele o Malo o le Pasefika, e aofia ai foi ma Niu Sila ma Ausetalia, i le vaavaai mai ia Samoa, o lo o mafai ona faatino e tatou suiga ogaoga, ona o lea e maua ia finagalo autasi po o le fingalo fulisia. A o le anoano o Malo o le Pasefika, ua matua le mafai le mafai, ona latou faia mea ia, ona o le tele o le fetotoai e le maua ai foi se toatele o ni sui loto gatasasi e mafai ona suia ma teuteu a latou Faavae, ina ia atagia ai suiga e tatau ona fai, e tusa ai ma le taimi lenei o lo o tatou i ai.

Tatou te 1 mailoa pe oo atu i nisi Paeaiga i le lumanai, ua le o toe maua le fuainumera o sui e faia ai e se Faigamalo ni toe Teuteuga momoria o le Faavae. O lea ua i ai le avanoa i le taimi lenei. O le taofi, tatou agai loa e faaaoga lea avanoa. E le faatali le taimi ma le tai fanae i nisi avanoa, e toe fai ai ni fuafuaga ua tatau ona fai. A o lea ua tuulima mai e le Atua soifua ia i tatou, o auauna a le atunu, o tatou o auauna na valaauina e le Atua e faatino ai i le tatou Nofoiga suiga ogaoga nei ma le taua, o suiga ua tatau ona fai i le tatou foi Nofoiga.

Lau Afioga i le Fofoga Fatalai, o suiga la ua i ai nei e faavae i le tau faapalenai o fuainumera, e le selau pasene, ae o lo o taumafai e faaaoga le faautautaga tatau ma le faatofalaiga talafeagai. Mo se faataitaiga; a tuusao le faapalenai lenei o fuainumera e pei ona i ai fautuaga, na o le sefulutasi itumalo faapalota o Salafai o le a i ai, ona o le toatele o le fuitauaofai o Samoa, o lo o alaala i Upolu nei. E le i taliagofie e le Kapaneta lea tulaga. O lea la ua faaaoga ai le faatofalaiga ma le faautautaga tatau e toe faatulaga ai itumalo o Salafai i le luasefulu, e tasi le itumalo ua faaititia ai le tulaga sa i ai muamua.

Saunoaga Faa-Minisita a le Afioga i le Palemia

Peitai, o isi suiga e pei o Salamumu ma Leauvaa, o le a faailo i se tulaga taualoa, o latou siosiomaga tonu e tatau mo aso nei. O le a avea ai ma vaega o itumalo i Upolu nei. O le tumau pea o itumalo nei, o ni vaega o Saleaula ma Leauvaa o itumalo i Salafai, o upu tuusao, e faamanatu ai pea lava pea le tulaga faasulufai mai le afi. A saga sulufai lava ua faiava i teine Upolu, ua le o toe tusiese? Feomiai ai pea i na eelele, o eelele o a outou fanau, ma l toe taulagalaga soo ai e nuu tuaoi mataupu tau eelele. E lagalaga pea manatu ia, pe a faamanatu pea lava pea piitaga o le selau tausaga ua tuanai o le afi na sasao ae mai le manava o le eelele. O le mea moni, o atufalega ma nofoaga tumau i inei i Upolu, e ave i ai lou tou faamumua o aso uma ina ia teuteu faamatagofie atili. E faapena foi ia i latou o lo o alaala i Salafai i Saleaula ma Lealatele, e ave foi le latou faamuamua i mea e aoga mo latou i Salafai. E l tau gefinauina lea tulaga.

O Faleapuna, o le Tooolefua o Vaatau o le Tupu o Fonoti, Falefa o le Aai o le Tupu o Fonoti, o Fagaloa o le Vaa o le Tupu o Fonoti. Atonu sa onomea ona tuuveseese mea ia e tolu, e pei ona masani ai i tulaga faale-agantu. O too ma foe e tuu i totonu o le Falevaa, o le Aai e nofoia e tagata ma le Vaatau o Fonoti e taula i le loloto o le Taulaga Vaa. O lea ua tuuvaatasi le Too ma le Aai i le Tulafono lenei, ae taula pea le Vaa ia o le Tupu i le atu-Fagaloa i le manaia o le loloto o le taulaga, o le taulaga o Vaa pitosili ona puipuia malu e atumauga o lo o siomia ai. Pei lava ona ou talanoa atu, o le tuuveseese o mea ia e tolu, ua tatou iloa lava uiga masani o le soifua. O se folauga o le a tapena, ae sue atu Too ma Foe, ua fai ai taaloga a isi o le tupulaga. Na o se faataitaiga e faatepa ai le Maota i le lavelave ma le fita o le galuega na feagai ma le Minisita ma lana aufaigaluega ma le Kapaneta.

Sa ou taua le suiga o le igoa o itumalo faaalaalafaga o le a taua nei, o Itumalo Faa-Palota. O le itu e faat ua, o le a tupu ae ai foi le lagona e uunai tatou fanau ia o e lesitala i o tatou lava itumalo, ma ia faamalosia ina ia palota. O le faamalosia o le lesitala ma le palota o tatou fanau, o le a atagia sao ai, tagata moni e tatau ona aofia i le faitauaofai o tagata o le itumalo faapalota, ma faataua ai e o tatou nuu aemaise lava taitai o nuu, o o tatou tiute faamatai ia o le faaaoga tatau o tatou aiatatau, o tatou o taitai o le nuu, e filifili ai na o i latou e mafai ona momolia le tofa ma le uta i tulaga mamalu ma le tofa e tatau ai aua faalagamaea a Samoa i le Malae o le sailiga Malo. O le mea moni lava, o lo o faataaloga i vai le filifili o sui a nisi o itumalo, o lo o faataua ai na o mea vaivai o le soifua, le palapala malo, nai lo le saili Malo.

Lau Afioga i le Fofoga Fetalai, o le suia foi o le Tulafono o Faiga Palota 1963, i le tausaga nei 2018, ia matua mautinoa lelei ai o le taua pea o le Tulafono o le 1963, ua pei o se laei fonofono e mataga. Aisea? Ua tatau ona taua o le Tulafono o le 2018. Ia atagia ai le anoano o aiaiga ua leva ona aveesea talu mai le 1963. E ao ai ona suia loa le igoa ma faaaofia ai loa suiga tetelou ua fautuaina nei ina ia talafeagai ma le taimi lenei o le tatou soifua ma taqai ai le Nofoaiga lenei, le Nofoaiga a outou Afioga i alii faipule ma tamaitai faipule o le Maota lenei. A saga tau lava le 1963, o lea ua tele nei suiga ua faia i lo outou taimi, suiga ua outou gasea ai ma liliu faalaau mamafa ai la outou tofa saili Malo.

Saunoaga Faa-Minisita a le Afioga i le Palemia

Mo sina faataitaiga, lea faatoa Samoa moni le Palemene lenei ua na o matai, ua le o toe saofafai ai ni taulelea e pei ona sau ai ina ua faatoa Tutoatasi o Samoa, ma faaluafesasi ai le faaaliga o taofi i le saofaiga o matai o le atunuu i le Fonousu lenei a le atunuu. O outou ia ua to i ai le matupalapala o Tootoosinasina o Samoa, ua outou tauavea ai le mamalu atoa o Tupu ma Ee o outou itumalo. Ma o se tulaga e onomea le taøua ai o le Nofoaiga lenei na faatonotonuina Teuteuga nei o le Tulafono o Faiga Paloa, e leai, leai foi nisi o toe ai s 1. Ave le faaaloalo ia te outou ua tatau i ai le faaaloalo. Ia fai so outou sao, ma aua foi tatou te fefefe e fai suiga taua lelei mo le lumanai o tatou fanau.

Lau Afioga i le Fofoga Fetalai ma le mamalu o le Maota, ua mafai ona fai nei suiga taua ona ua tai lima tausaga o le Nofoaiga. E le mafai, le mafai ona faia, pe ana faapea o taitolu pea tausaga o Nofoaiga. Aua foi o le natura lea o Nofoaiga pupuu, e pei ona sau ai, se i tau mai i le 1991 na liliu ai le tofa i le HRPP, e le mafai ona faia ni galuega tetele pe a tatou alu ai pea i faiga na faataoto mai i le aso na faatoa amatamata mai ai le tatou Faigamalo. Ua tatau ona suia i le tai lima tausaga, lea na amata mai ai ia le Faiga Palota ma Nofoaiga i le tai lima tausaga. O mau o Nofoaiga pupuu aua le faia ni atinae tetele e faatoa fua mai i le 6, 7, 8, 9 tausaga, ae moomia ni mea laiti e faasee ai le aupalota. O le ala lea, e faataua ai e le HRPP suiga tetele maoae ia, o lea ua i ai i le Maota lenei le mafai e fai ai i le fesoasoani mai a le Agaga Paia Na te musumusuina pea o tatou mafaufauga vaivai, aua pe a le auai le Atua ma i tatou, tatou te galulue fua. O le talitonuga lena o Samoa, o le atunuu kerisiano o lo o taitaiina i mau faale Tusi Paia.

Lau Afioga ma le mamalu o le Maota, o le auala o mea ma faiga Faa-Palemene, lea ua taoto le Tulafono. A uma le fefaaaliaiga o outou taofi, ona agai lea i le Komiti o Tulafono e toe avanoa ai foi le Maota nei i a outou Afioga mo nisi mafaufauga ia saga tapue ai le Tulafono i nisi Teuteuga e moomia. O lona uiga, o lo o tele isi avanoa i le Komiti e valaau ai faalauaitele le atunuu, ia ma tatou nei e toe faatu ai nisi manatu faaopoopo e faaaulelei atili ai nei Teuteuga ua faia e avea ma sao faaopoopo i le taumafaiga a le Minisita ma lana Matagaluega.

Ia manuia tele le soalaupuleina o Tulafono o Faiga Palota ma le Tulafono e Toe Faatulaga ai o tatou tuaoi o Itumalo Faa-Palota. Ia fesoasoani mai le Atua i felafolafoaiga a le Palemene i lenei aso. Soifua ma ia manuia.

FOFOGA FETALAI: Malo faafetai. Ua faafogaga le Palemene i le saunoaga manino ma le saunoaga totoa a le Afioga i le Palemia ae faapea foi le faafogaga mai a Samoa i mafuaaga ua faapena ai ona ae ai se finagalo i le Malo e tuuina mai lenei Tulafono Tau Faaofi.

Ma o le a see atu loa le tatou galuega i le tulaga o le faasologa o galuega e faitau faalua ai lenei Tulafono Tau Faaofi.

TULAFONO TAU FAAOFI O ITUMALO PALOTA 2018
– faitauga faalua

Afioga Hon FAAOLESA KATOPAU T. AINUU (Minisita mo Faamasinoga ma Pulega Tau Faamasinoga ma le Komisi o Faiga Palota):
Lau Afioga i le Fofoga Fatalai ou te faatu le lafo, *Ina ia faitauina nei le Tulafono Tau Faaofi o Itumalo Palota 2018 i lona faitauga faalua, ma ou te fia tautala faamalamalama i ai.*

Faaluaina e le Minisita mo Aoga, Taaloga ma Aganuu, Minisita o Tupe ma le Minisita mo Fesootaiga ma Faamatatalaga Vavave Faaneionapo.

FOFOGA FETALAI: Ia ma o le avanoa foi lenei pe a fai e i ai se isi au faaopoopoga e tusa ai o le Tulafono Tau Faaofi.
Tulai mai lau Afioga i le Ministra e saunoa i le Tulafono Tau Faaofi.

Afioga Hon FAAOLESA KATOPAU T. AINUU: Lau Afioga i le Fofoga Fatalai faapea sui usufono mamalu. O lena ua faafogoga le paia o le Maota i le saunoaga a le Taitai o le Malo i lana Saunoaga Faa-Minisita. O le aotelega lena o Tulafono Tau Faaofi e lua e pei ona tuuina mai i luma o le Maota mo sona finagalo. O lona uiga e le toe umi se faamatatalaga e fai i ai, masalo pe na o le lima lava minute.

Lau Afioga i le Fofoga Fatalai ma le mamalu o sui usufono, o lenei Tulafono Tau Faaofi ua tuuina mai e soloia ai le Tulafono o Itumalo 1963, o se tasi o Tulafono tuai, ma e le i toe iloiloina pe teuteuina foi. O lenei Tulafono Tau Faaofi o le taunuuga o se galuega na feagai ma se Komiti Faafoe sa tofiaina e le Kapeneta e faafoeina se suesuega ma le iloiloga o le vaevaeina o itumalo faapalota faapea ai foi ma galuega sa feagai ma le Komisi Suesue o Faiga Palota 2016. O lenei Lipoti sa tuuina mai faafautuaga mai i ni mataupu ina ia mafai ai ona toe iloiloina le Tulafono o Itumalo 1963 sa i ai.

Mo le silafia o le Lipoti a le Komisi e Vaevaeina Itumalo Faapalota a Niu Sila, sa fai a latou sailiiliga muamua ma sa faapea ona momoli mai lo latou manatu, a fua i le aofai o tagata, population, faatasi ai ma le fuanumera o nofoa o le Palemene o lo o i ai i le taimi nei, e 3,800 le aofai o tagata i itumalo taitasi. O lea fua ua ogatusa ma faiga faatemokarasi faaonaponei o le vaeluaina tutusa o itumalo taitasi, e fua i le aofai o tagatanuu. O lea fuafuaga e ausia ai ma le tasi o manulauti o le faatemokarasi, o le equal and fair representation, o tagatanuu o se atunu i upufai o se Malo. O lona uiga, e le mafai ona talafeagai ma tutusa taatiaga o lo o taatia ai nei.

Mo se faataitaiga, o le tasi o sui usufono Faleata Sisifo, population e 18,000, ae tasi foi le sui usufono mo Gagaemauga Nu.2 o le population e 864. Mo le Vaimauga Sisifo, o le population e 24,000, a o le itumalo o Falealupo, e 1,000. Ae a tausisia la le fautuaga lea mai le Komisi o vaevaega o itumalo mai Niu Sila, o lona uiga o le a pau maualalo ai le aofai o sui usufono mai le motu tele i Salafai i le 11. Aua o faamaumauga a le Ofisa o Fuainumera lea e faapea mai, e 75% o le faitauaofai o tagata o lo o nofomau i le motu nei o Upolu.

Tulafono Tau Faaofi o Itumalo Palota 2018
– faitauga faalua

E ui i lea, sa fautuaina malosi le Ofisa e faataatia lea fautuaga ae faamuamua i le taimi nei se faasaosaoga o itumalo faapalota ma aveeseina itumalo ia e taua o Urban Seats.

E ono isi fautuaga sa faapena ona saili tofa i ai le Kapaneta ma taunu ai loa i le faataatiaga e pei ona aumai nei. O nisi la nei o fautuaga ma ua tusiaina i totonu o lenei Tulafono Tau Faaofi. Talu lava ona faavae mai le vaevaega o itumalo faapalota, o lo o mataituna pea le 1 talafeagai o faatulagaga o nisi o afioaga i totonu o isi o itumalo. Mo se faataitaiga faafaigofie o itumalo e tu le isi afa i Upolu ae tu le isi afa i Savaii. O se faamaoniga lea e faailoa mai ai, ua tatau ona toe iloilo le faatulagaga ma le faataotoga o i ai nei itumalo faapalota ina ia atagia mai ai avanoa tutusa o le faaleoina o manaoga o tagatanuu i totonu o le Palemene o Samoa.

O le isi vaevaega taua ua talafeaugia i le toe iloiloina o le toe fetuunaiga ma faamausali o itumalo faapalota e fua lea i le feoaiga o tagatanuu. O lo o aumai pea e le Ofisa o Fuainumera le lipoti i le agai mai pea o le mamalu o le atunu mai Savaii ma nuu i tua i Itumalo Tu Taulaga aua aoaoga ma avanoa faigaluega. Ua matua faatapulaaina ai le fuainumera o tagata Samoa ua alaala ma papaaao i nuu tulata i le taulaga, ma ua alagatatau ai ona toe fetuunai itumalo faapalota nei ina ia mautinoa ai pea le avanoa tutusa i le faaleoina o latou manaoga i le Palemene, aemaise ai le avanoa tutusa i le faasafuaina o atinae i totonu o nei itumalo faapalota. O le Tulafono Tau Faaofi o Itumalo Faapalota ua faamaioio lelei mai ai le lisi o itumalo faapalota e fuafua i luga o le numera o tagata o lo o nofomau ai. Ma e fa ni suiga taua o lo o fai ma o le aotelega lea o lenei Tulafono Tau Faaofi.

Muamua, ua suia nei itumalo mai le 49 i le 51. E pei ona tuuina mai i lenei Tulafono e tusa ai ma le Vaega 44 o le Faavae o Samoa, e 51 itumalo o le a vaevaeina ai palota o sui usufono o le Palemene.

Lua, ua tuuueseina ia nuu sa i lalo o le Itumalo Faapalota e tasi ae eseese vaega o le atunu o lo o taoto tonu ai.

Tolu, ua toe tusiaina le vaega o faamatalaga ina ia maioio mo le lisiina uma mai nuu o lo o i lalo o le Itumalo Faapalota.

Fa, e le o toe i ai ni Itumalo Tu Tulaga, aveeseina Itumalo Tu Taulaga ae avea uma Itumalo Faapalota e pei ona vaevaeina i le vaega o faamatalaga.

O nisi o auiliiliga o suiga ua tuuina mai i le Tulafono Tau Faaofi lenei, muamua, faaopoopo le Nofoa faapalota mo itumalo nei, tasi mo Vamauga Sisifo, lua mo Faleata Sisifo ma le tasi mo Sagaga.

Lua, aveesea mai Leauvaa mai Gagaemaua Nu.1 ma avea ma se tasi o Itumalo Faapalota ua faaigoaina o Sagaga 3.

Tolu, tuuina atu Satuimalufulifi i le Itumalo Faapalota o Aiga i le Tai.

Fa, tuuina atu Salamumu i Safata Sisifo ae tuuina atu Nuusuatia ma Vaiee i Safata Sasae.

Lima, tuuina o Faleapuna i le Itumalo Faapalota o Anoamaa Sasae.

Ono, mo Savaii, ua aveeseina mai Tafua ma le Itumalo Faapalota o Palauli le Falefa ae tuuna atu i Faasaleleaga Nu.1 i Sasae.

Fitu, faaopoopoina o Saleaula i le Itumalo Faapalota o Gagaemaua Nu.1.

Tulafono Tau Faaofi o Itumalo Palota 2018
– faitauga faalua

Valu, aveeseina o Gagaemauga Nu.3 ae suia i le Gagaemauga Nu.2.

Iva, tuuina o Tualaele-tai ma Vailoa i Faleata i Sisifo.

Sefulu, sui le faaigoaina o itumalo o lo o i ai i Sasae ma Sisifo ae lisiina faafuainumera e pei ona i ai faaigoaina fou nei.

Muamua: Vaimauga 1, Vaimauga 2, Vaimauga 3, Vaimauga 4.

Lua: Faleata 1, Faleata 2, Faleata 3, Faleata 4.

Tolu: Sagaga 1, Sagaga 2, Sagaga 3, Sagaga 4.

Fa: Aana Alofi 1, Aana Alofi 2, Aana Alofi 3, Aana Alofa 4.

Lima: Safata 1, Safata 2.

Ono: Falealili 1, Falealili 2.

Fitu: Anoamaa 1, Anoamaa 2.

Valu: Faasaleleaga 1, Faasaleleaga 2, Faasaleleaga 3, Faasaleleaga 4,
Faasaleleaga 5.

Iva: Salega 1, Salega 2.

Sefulu: Palauli 1, Palauli 2, Palauli 3.

O nai suiga ia o lo o i totonu o lenei Tulafono ua taua o le Tulafono Tau Faaofi o Itumalo 2018.

Lau Afioga i le Fofoga Fetalai, o le faamalamalamaga lena o lenei Tulafono Tau Faaofi e pei ona tuuina atu.

I le ava tele ma le faaaloalo.

FOFOGA FETALAI: Malo faafetai. Ia, ua manino auofala i le saunoaga a le Minisita. Ia ma o le avanoa lenei e tuuina atu i sui usufono mamalu o le Palemene.

Tulai mai le sui usufono mo Gagaifomauga Nu.3 lau Afioga i le Laaulialemalietoa.

Susuga Hon LAAULI LEUATEA POLATAIVAO FOSSIE SCHMIDT (Gagaifomauga Nu.3): Ailao afua le Atua ua maua, viia pea Lou alofa ma Lou agalelei ua mafai ai ona matou toe fesilafai i lenei taeao fou ma le taeao manino. E manatu foi o lea ua toe faatutao le Maota o tofiga, se i o tatou velo le uluai asomualemalama aua le faaaauauina o le tatou valaaauina aua Samoa.

E ofo alofa atu i lau Afioga i le Fofoga Fetalai aemaise foi lau Afioga i le Palemia ma lou Auvaa, Afioga i Minisita Lagolago aemaise foi sui usufono mamalu uma o le Fonousu a Samoa i lenei taeao fou. Malo le soifua manuia, malo le folau ma le lagi e mama.

Ua ou tulai ma le ava ma le faaaloalo tele i lenei taeao e faaleoina se tuualalo a lenei itumalo. A o se tofa foi ma se faautautaga e tuutuu atu i ina e tuituimalofie ai le Malelega ma le Saunoaga na saunoa i ai le Taitai o le Malo i le taeao lenei, aemaise le folasaga manino a lau Afioga i le Minista e a ia le Tulafono Tau Faaofi. Faamalo saunoa, faamalo fetalai. E pei o le pupula a le la le manino o tuleiga ma saunoaga ua faigofie ai ona fai atu se manatu o lenei itumalo.

Tulafono Tau Faaofi o Itumalo Palota 2018
– faitauga faalua

O le Tulafono Tau Faaofi lenei ou te faatusaina o se vaatele ua toe tu eelele sa folau mai tumutumu o peau mataloloa o le vasa, mai le uluai taimi na tatou Tutoatasi ai na fau ai le Tulafono lenei, e matimati ai le amata mai le Fono Faavae a Samoa, o le Fonousu a Samoa na potopoto uma ai tupu o Samoa, ma Tootooau ma Fuesinaloloa ma Tootoouli o Samoa e omai e fai tonu o le atunu, na omai e momoli mai le tofa ma le faautautaga pe faapefea ona faafoefoe le atunu ma lona faigamalo ma lona Malo ua Faavae. O le agaga faafetai lena lau Afioga i le Fofoga Fetalai, ua toe tomanatu ai o lenei ua pei ua toe foi mai le sa folau lenei i le 2018 se i toe faufau, se i toe matimati, se i toe silasila i mea na tatou asa mai ai i futia ua sola ma aso ua alu, i mea ua matagofie e toe faamatagofie atili. O ni mea ua tau faaletonu, ia tatou toe faufau ma fusifusi le fau o Malo.

Faafetai i lau Afioga i le Palemia ma le faatofalaiga, ua leai lava se mea e tasi e nenefu o le saunoaga. O le agaga faafetai i le toe aumaiga o le Tulafono aoao lenei, tatou tomanatu ia taatia i lagotonu le agaga lea o tatou matua sa i ai i aso ia, e le i faigofie, o le omai o Malo Aufaatasi e aumai le latou fesiligia o Samoa po o tatou o Tutoatasi pe leai. O le tali a Samoa, e tatau ona tatou Tutoatasi, a ia tatou tatao pea i a Tu ma Aganuu. Fai mai Malo Aufaatasi, e leai, e tatau ona fai le palota. O le faa-Samoa ma le tatou nonofo ai, o le palota, o mea a papalagi e le o ni mea a le tatou atunu. A o le sailimalo a o tatou tuaa, na mafua ai ona saunoa, afai o le tatou ala lea i le Tutoatasi o le palota, tatou ui atu ai i i. A uma ona fai le palota ona tatou omai lava lea fai le tatou mea masani. O a tatou mea masani? O le tausiga o le Tu ma le Aganuu o faasamoaa, ma le tausiga o mea tatou te masani ai.

Lau Afioga i le Fofoga Fetalai, o le fatu lena o le atunu. O le faasamoaa ma le pule mamalu a alii ma faipule, filifilia o le Taitai, ma tausi Samoa mo le filemu mo le lumana. Ae peitai o suiga eseese, tatou militino ma Malo i fafo, e le mafai ona tatou taofia, ua tatou faaaogaina ai le system o le Democracy System, ia e le tau fai atu, e le o se system atoatoa atili. E i ai foi faaletonu o le ituaiga system lea o le Democracy System, ae ona ua pau o se system e mafai ona tatou faaaogaina, lea tatou te folau ai nei.

Faafetai i suiga ua tulai mai i le Teuteuga o le Tulafono, ua matua aveeesea ai palota tutoatasi. Ua le o toe i ai nei ni tagata afaafa i le Palemene lea sa tatou i ai, totolua, ma tagata sa vavae i ai le tulaga o le tatou vaavaai, e ese le latou palota, ese le filifiliga a Samoa. Lea ua tatou vaai i le faataunuuina o le Teuteuga lenei, e le toe i ai se palota tutoatasi mo Nofoa Tu Taulaga, ua ave uma Nofoa nei, i itumalo o lo o alala ai tofitofiga nei, o le agaga faafetai lena.

Faafetai lona lua, faafetai i le faaopoopoga o sui usufono o le Palemene, o ai a le manao e faaopoopo sui usufono? E tatou te mananao uma, leaga o le taimi ma le tai, ma le mea e tupu ai, a maua loa le avanoa, tatou faatino. Faafetai o lea ua tulai mai e ui ina e le i oo mai ia le tatou Faavae, a lea ua mautinoa lau Afioga i le Fofoga Fetalai, ua i ai faaopoopoga mai le 49 i le 51. Faafetai foi i le faatofalaiga ua suia le Tulafono, o le 1963 i le 2018.

Tulafono Tau Faaofi o Itumalo Palota 2018
– faitauga faalua

O le agaga faafetai lau Afioga e pei ona saunoa le Taitai o le Malo, e le o le avanoa mulimuli lenei, ua na o se avanoa amata e faaleo ai o matou lagona, ae o lo o i ai le avanoa mulimuli i le Komiti e toe i ai ai nisi o fetuuaiga i le tofa avatu, ma la outou silasila i le mea e sili ona taua, ona fai ai lea o le tatou faaiuga mulimuli.

Ae fa lava nai mea na ona matou tuu atu i lau Afioga i le Palemia, e pei lava o lau upu muamua, e vaatele, ua foi mai fanua se i toe faufau, o le agaga o le itumalo lenei, o mai laia tatou faufau faatasi. Ua matou ooloolo pitovaa atu, a le puna isi, aleaga isi, ona tatou fau faatasi lea o le vaa lea, ina ia aua ne i toe mamaioa, ma mamaitaloa le sa folau o Samoa i le Tulafono lenei, o le agaga lena.

Muamua, na ona matou toe faaoloolomaau lava i le mea lea o le suaia o igoa o itumalo, o le agaga ina ia tumau pea le mamalu o tatou, o tatou o sui faipule, o itumalo faaalalafaga faale-agantu, o le tatou valaauiina lena ma le tatou tofiga. Ou te taofi o oe o le sui faipule faale-agantu, e le na o oe o se faipule sui palota, e le uma loa le palota, uma lou faalupega, o le sui faipule faale-agantu. O lou tofiga e te tausi lou nuu ma tu ma aga faale-nuu, e oo lava ina uma le valaauiina.

O si ou vaivai lena, na ona avatu i ina e toe liuliu i ai le tofa ma le faautautaga a lau Afioga i le Minisita, e pei lava o le augani a o tatou matua, tatou faaaaoga le ala lea. Na tatou foi mai lava lea fai a tatou mea masani. O le faipule, o le faipule o le pule mamalu a alii ma faipule. O le a avatu foi lau faataitaiga, malie Sala, o lea ua faalupe nei pe afai e pasi le Tulafono lea, e te le toe Gagaemauga ua e Sagaga le 4. E faapena foi Salamumu, e te le toe Gagaemauga Nu.2 o le a e Safata. O nai ou manatu, na ona lafo atu po o fea e tosi ai le va nonofo o aiga ma faleupolu. Po o fea e toe tosi ai le tausiga o le nuu, po o fea e agai ai le tautua a le faipule, pe toe agai i lou suafa faasinomaga i lou nuu, pe e te agai loa i le mea lea e taua o le itumalo palota.

Lona lua lau Afioga i le Fofoga Fetalai, o le mea lea o le taotaomia o le aiatatau o le palota a lou auaiga ia te oe ma lau faasinomaga. Ua le mafai ai ona toe omai le fanau a lou uso, ma ou cousin ma tagata e foi i Savaii i le mea o lo o i ai ia lo matou faasinomaga. Afai o lou faaiu tulou le Maota o le Polataivao, o le faaiu uma lena o lea e o uma ai ia ou uso, ma ou tuafafine ma latou. A lea ua fai mai nei le Tulafono e le mafai ona e toe palota i i tusa pe e te faaiu ia Polataivao o le a e palota i le mea na e te nofo ai. E foliga mai ua momotu ai i i, le sootaga a matou fanau, ma fanau ma fanau ma fanau a matou fanau, e oo i le mea na omai ai. E i ai lo matou talitonuga e feola ifo lava tagata e i ai ia tagata e fia nonofo i le taulaga, e i ai foi tagata e fia o i le mea na omai ai.

Afioga Hon Faumuina Tiatia Faaolatane Liuga (Palauli le Falefa): Lau Afioga i le Fofoga Fetalai....

FOFOGA FETALAI: Ia se i malie le sui usufono, se i tulai mai le sui usufono o Palauli le Falefa, tulai mai lau Afioga i le sui usufono mamalu....

Tulafono Tau Faaofi o Itumalo Palota 2018
– faitauga faalua

Afioga Hon Faumuina Tiatia Faaolatane Liuga: Lau Afioga i le Fofoga Fetalai, ou te fia malamalamama, leaga e lua Tulafono ia tatou te talanoa i ai, lea ua saunoa le sui usufono mamalu i le Tulafono Tau Faaofi o tuaoi o Itumalo Palota ma le Tulafono Tau Faaofi o Faiga Palota, ne i te i ua fai atu foi ia matou faamatalaga ae le lavea atu foi le Tulafono la e mulimuli mai, ia ona afaina lea, ae na ona ou fesili atu po o lea ua tatou talanoa faatasi ia Tulafono e 2? Ma lou faaaloalo.

FOFOGA FETALAI: Ia, manaia le tulai mai, o le ala foi lea sa tau so so atu ai le Nofoa, e ui i lea, ua aoga foi le tulai mai o se tasi o sui usufono sinia i lea itu o le Maota, malie, ia o... ua manatu o lo o faapena ona safea le tulaga o Tulafono uma e 2 i tuaoi ia o itumalo palota, masalo e pei o le tulaga lena, ae o le la foi e laa le saunoaga o le sui usufono i le tulaga ia o le Tulafono Autu. Ia ae o le tuaoi ia e pei ona faatusa e i ai le Afioga malie e i ai le Afioga i le Minisita o Tagata Tafafao Maimoa mai Fafo.

Ae o le saunoaga a le faauilavea, ia se i alofa se i... leaga o lea e i ai vala ia e lua o le tatou Tulafono, o le Tulafono o tuaoi o faaitumalo palota, ia ma le tulaga o le Tulafono Autu. O lea e tatou te tagofia le tuaoi faapalota faamolemole le sui usufono mamalu o saunoa.

Susuga Hon LAAULI LEUATEA POLATAIVAO FOSSIE SCHMIDT:
Ia,, e manatu e....

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Ne i te i ua taitaiina mai ia saunoaga a sui usufono, si ou agiagi lea na avatu, ia ona o le tulaga foi e faigofie ai ia te au o lea e ese le mea lea ou te talanoa i ai, o le ala foi lea sa aumai ai le avanoa, ou te talanoa Faa-Minisita.

O lona uiga la o lea sa ou kavaga uma ia Tulafono e lua, ona tasi ai lava lea o le auato ae aafia uma mea e lua. Ae lea faatoa tatou agai tonu lava i le Tulafono, ona sosolo lava lea i luga o le tulaga masani ia i le faasolosologa sue, se i uma ona tagofia le isi Tulafono, ia ona tatou agai atu ai lea i le isi Tulafono.

E pei o le tulaga lena ne i te i ua sasi mai ia sui usufono ona o lea sa ou auatoa uma ia le lua lea Tulafono i le lauga e tasi e faasao ai ia le tatou taimi.

Ia lau Afioga i le Fofoga Fetalai, o le faamalamalamaga lena.

FOFOGA FETALAI: Ia malo, ia e pei o le tulaga lena, i le faavasegaina o tatou mataupu o lo o talanoaina. Ia o le isi foi itu o le tupe, e i ai foi le manatu

o le Fofoga Fetalai afai o lo o lavea mai le saunoaga a le sui usufono i mataupu uma e lua, o lea ua faga uma lou malo i le taimi e tasi.

26 MATI 2018

Tulafono Tau Faaofi o Itumalo Palota 2018
– faitauga faalua

O lona uiga o lea e tau e tasi lau saunoaga ae ua lua ou avanoa. Ae lelei ona e tulai mai se i faatulaga pea o lea o le a faga uma lou malo i mea ia e lua.

Susuga Hon LAAULI LEUATEA POLATAIVAO FOSSIE SCHMIDT:
Faafetai i lau Afioga i le Fofoga Fetalai, o le mea lenei o le toe faauilavea o le isi Savaii i le isi Savaii, ia e le o se mea matagofie i mea faapenei. Ae o lea o le a atagia mai ai, o le a toe fai lava e tatou ia tatou.

Ae ui o lea, o le agaga lena lau Afioga i le Fofoga Fetalai, ia e alofa atu leaga e ogaoga Tulafono e lua, ae maua o le faataitaiga lea na ala ai ona ou agai ai i le isi pito. E le mafai ona manino sau tuualalo pe a ou le oo i tulaga leaga o lea ua tupu, ui o lea, faafetai.

O le agaga lena sa ou taumafai atu ai lau Afioga, i le mafai pea ona agai i o matou aiga, i le tulaga i le mea e matou te i ai i lo matou faasinomaga. Ae na ona avatu i ina lau Afioga i le Minisita, e te silasila i ai.

O le isi mea lea na tulai mai lau Afioga, o le 1 toe i ai o ni fale palota mo Savaii. Lau Afioga, na ona matou talosaga lava ma le agaga faaaloalo, it is not a cheap exercise. Afai o au lau Afioga i le Fofoga Fetalai ou te alu i Savaii i le taimi lenei, tasi le itula e alu atu ai i Mulifanua, itula i le vaa, itula i o, fa itula, foi mai, iva itula. O lena iva itula e i ai lona tau e le i lalo ifo o le \$150 i le \$200 pe a alu le tagata i o. Ae e te le alu fua foi, e te alu ma ave le mea i le aiga ma le oso, i le tagata taitoasi na. O le faipule, a e alu e le i lalo ifo o le \$500 i le \$1,000 lau tupe e te alu ma oe, ma le totogi o lau taavale ma mea uma, leaga foi o le tau lena o le mea. Afai la e faatulaga le mea lea lau Afioga i le Minisita, ua taofi a matou fale palota i Apia, ae matou o uma i Savaii, o au, e 500 nai au tagata palota o lo o nonofo i inei ma faigaluega i inei ma lafo le tupe i Savaii.

A faatulaga la le tau o le mea lea, e le i lalo ifo o le \$100,000 e faatino ai lo matou o i Savaii i le aso o le palota. O le taimi o vaa, o le feoaiga, o le le iloa o ni mea e tupu o ni faalavelave ma ni mea faapena. Afai la na o au le 500, ae o le 21 o Savaii lea e i 200, 300 ta te talanoa i le \$3 miliona e faatino ai le mea lea. Na ona matou faapena atu, e le o ni fuainumera faaataata o fuainumera sao o conservative numbers, lea matou te avatua ia outou silasila. O le a le mea ua toe faapea ai ona fai ia Salafai? O le palota i inei i le 55 tausaga talu ai ae ua oo mai i lenei taimi tou faapea mai Savaii tapena, a tou palota cast le tou votes i Savaii.

Ia talofa, lau Afioga i le Fofoga Fetalai, na ona matou talosaga atu, e le faigofie, o le taimi, o tupe, o mea e felauai ma mea uma, ia na ona matou tatalo atu i le agaga maualalo, toe silasila tasi lava. Lau Afioga i le Minisita, ina ia maua pea lo matou avanoa, e fai ai a matou palota ia vaai ia Niu Sila po o Ausetalia, o fea le state e te nofo ai? E te nofonofa lava i talane o lou moega ma fai mai lau palota. O le a la le mea o le a fai nei? O le a matou toe feosofi i le vaa ma o i Savaii?

FOFOGA FETALAI: Malo, toe lua minute o le sui usufono.

26 MATI 2018

Tulafono Tau Faaofi o Itumalo Palota 2018
– faitauga faalua

Susuga Hon LAAULI LEUATEA POLATAIVAO FOSSIE SCHMIDT:

Ia, o le matapu mulimuli lau Afioga, ina ua uma le palota o le 2016, omai le Puleono i Salafai Aiga ma Salafai atoa o mai e o, omai e o e momoli le tatou sao i le Palemene o Samoa, le Puleono i Salafai matou omai, Tumua, Lufilufi, Saleaula ma Leulumoega, ua o matou omai se i fai ia le matou sao. Ae talofa, ua faalogologo atu nei, o le a aveese le isi nofoa o le matou Pule, Saleaula.

O le a se faitau i le lagona faa-au, o le Gagaee, ma le Gagaifo o le Aiga, Gagaemauga ma le Gagaifomauga o le Aiga e tasi, ma e manatu tele i le vanonofo lea ma le vatapua. E le mafai ona matou nofonofo le Gagaifomauga leaga o le Gagaemauga e tausi e Saleaula lea, o Lavea e tausia le matou fale Gagaifomauga. Malie lau Afioga i le Minisita toe liuliu lau tofa, toe silasila mamao i tulaga ia, ou te faananau e aafia le tulaga o le faaleaganuu, e aafia tele. Ia na nofo nofo lea faapea Salafai matou toe foi atu, malo le galulue. Ua a ua outou omai? Ia ae fesili ifo, ua le atoa tama. Fea le isi tama? Ia ua tusa ai ma le tala ia Iakopo ma lana fanau, fea le isi tama? Ua ai e le urosa, ua le iloa po o fea o i ai. O le agaga lena lau Afioga i le Fofoga Fetalai, ou te tatalo ma lou agaga faaaloalo, e nofo nofo ma mafaufau i le sailiga malo a matua i le uluai Pule, le uluai mau a Pule. O fea? Fea le sailiga Malo? Aisea o le aveese ai Faaolesa? O le a lava le mea ua oo ai lau maemae e aveese le sui usufono e tasi o Salafai? Ia e alofa, ia e alofa i la matou tagi talatala. Amuia outou o lea tou te nonofo i fanua, na ona malama lava o le taeao ki lau taavale toe 5 minute e sau. A o matou, e ta ma au mai i le vasa lea, omai e saili Malo aua Samoa. Ia lafo atu, ou te talitonu e le i soona filifilia oe e le Afioga i le Palemia, leaga o ou faalupega o lea e nofo tonu i le toala faaaautama o Samoa, tua ia te oe le atunu, ia e alofa i le mea lea. Aua e te alu fua i le faatusatusaga a Niu Sila ma Samoa, different, different. O Samoa o Samoa. Pe toatele pe toalaiti, a i ai lava le sao o le nuu, uma le nuu, i ai le faleupolu o le nuu, uma, aua e te oo fua i le fuainumera, o le fuainumera itøs just the number, ae o le mamalu o Saleaula o le Tootooli, e fesili i ai o le uluai Pule lea faafesagai ma Aiga, aua Safotulafai.

Ia lau Afioga i le Fofoga Fetalai o nai manatu na, ou te nofonofo leaga o le nuu, o le motu, ia vaai foi i le upu o le matou pese, -Puleono i Salafai tulai mai lo ta pale i avea, øle tali lena o le pese, pese na fatufatu i le taimi na tulai ai Namulauulu Lauaki Mamoe na fai atu ia Siamani, -Siamani, get out, o ese ua uma lo outou taimi o le a Tutoatasi Samoa. ø O fea o i ai? Iiga Pisa, Namulauulu, Tuilagi, Asiata, na o i Sepania ma feoti ai, na toe omai ma aumai o latou ponaivi i nei. Ona o le a lau Afioga i le Fofoga Fetalai? Saili Malo. Le HRPP, manatua le galuega a Vaai Kolone, manatua le galuega a Tofilau Eti Alesana, aua ne i galo o lea o le a outou aveese, e leai se eseesega ma le faapea mai, ia aveese lou lima, ua lava lena lesi ou lima ma tou vae tou te foi ma outou. Lau Afioga na ona matou tatalo ma le agaga maualalo. Lau Afioga i le Palemia, ia e seu silasila i le tautua a Salafai, ina ia aua ne i aveesea le Nofoa lea.

Tulafono Tau Faaofi o Itumalo Palota 2018
– faitauga faalua

O le tatalo lena, lo tatou motu i Salafai, Puleono, ia o lea ua outou faafogafoga mai, o lea e i ai le avanoa, omai i i e fai lo outou finagalo e faaali i ai lo outou silasila ma lau vaai, i lo ta pale o le a avea. Ae ou te talitonu, e le o i ai e le o faatamala le tofa a le Malo, o le tatou manatu lea ua faaali, ina ia taoto i lagotonu lenei Tulafono.

O le matou tala lea ma le faaaloalo lau Afioga i le Fofoga Fatalai. Manuia le Fono.

FOFOGA FETALAI: Malo. Se i tuu atu le avanoa i le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fatalai, e i ai le mea lea e tatau ona ou tulai atu ai, leaga o lea e taua Vaai ma Tofilau. O faiga ia a Taitai o le Vaega lenei, a uma ona fai Faiga Palota ona fai lea o Komisi Suesue, faiga lea e fou i le tulai mai o le Vaega lenei. O le auau atoa o Komisi Suesue nei, se i aumaia se tofa i le atunu i le tulaga o lo o faagasolo ai pe i ai ni vaega e tatau ona toe teuteu. O le tele lava la o nei teuteuga, o vaega e afua mai i Komisi Suesue, a o le tele foi o Komisi Suesue nei ma fautuaga ia e aumai, e fulisia ia i latou mai Salafai. Ua latou matua fautuaina le mea lea. Ua faafia ona fai Pati i Savaii, 200 e malo ai le sui mai Savaii fai loa le Pati, ae alu atu le iuga o le palota i i, ua 200, 300 e malo ai le tagata lea e toaga lona aiga e ao uma mai tagata eseese, tagata o le itumalo ma tagata e le o ni tagata o le itumalo, lea sa fai ai a tatou faamasinoga.

Lau Afioga i le Fofoga Fatalai pei lava ona ou fai atu. O mea ia e taumafai i ai le Malo, ia aumai ni faatofalaiga lautele mamao, e le o ni faatofalaiga vaapiapi, o mea sa tatou masani ai. O le tulaga lena. E leai se taumafaiga a le Malo, e taumafai ai e vaai vaapiapi i mea nei. A tatou alu ai pea i le ituaiga manatu lea e vaapiapi, e oo lava i le faavavau e tatou te le agai i luma na o le solo i tua. I le taimi lenei, e moomia ai ni taitai totoa, e le o ni taitai e palaai e fai ni suiga. O le ala lea ua ou tulai atu ai, e le faigofie mea nei i le Kapaneta, aua foi o le natura lea o le soifua, e tatou te taumafai e tuu pea i le mea o i ai, a o lea ua uma lea Faiga Palota, o le tagi mai lava lea mai Salafai. O le a ea se faiga o le a fai e taofi ai nei mea? E sue ane tagata ia, o uo, o isi tagata o tagata faigaluega ua aumai uma lava tagata faigaluega e tau i le sui lea ua nofo ma talau solo mai ia tagata i nei e faapalota i inei, ona a tuu atu i le nuu ma le itumalo, latou te iloa lelei ia tagata, ae avatu le Lola e matua le malamalamama i nei tagata, e avatu na faalesitala e i latou i inei i Upolu nei. O mea la nei e faavae ai lau Afioga ia fautuaga nei, o fautuaga mai i a tatou Komisi Suesue. Ua le tasi le lua Komisi Suesue e tuualalo mai ai pea le mea lea, le mea lea o le faaeteete o mea nei o fale palota faapitoa, leaga o i lea e sao ai le amio piopio, o i tonu i i e faaaoga ai tupe. Ma a outou vaavaai nei i ai i tagata e malo i i mea ia o le toatele o tagata, o tupe ia e faaaoga.

Tulafono Tau Faaofi o Itumalo Palota 2018
– faitauga faalua

O lona uiga, a faaaauai ai pea a tatou faiga palota i faiga nei, e i ai le aso, e i ai le tausaga e le toe sao mai le tagata o la e i ai le tofa mamao i totonus o afioaga, na o e lava e nonofo i inei e tele le tupe, tele tupe e faaaoga e faatau ai palota.

Lau Afioga i le Fofoga Fatalai, o le mea lena o lea e taumafai i ai ia le Faigamalo lenei. A o sui lava o Salafai, lea na latou matua iloa lelei le mea lea, o isi lava o sui o afioaga. E sili ia ona avatu i Savaii, avatu ia palota se i o matou tilotilo mai po o ai tagata nei, ua matua matou le iloa po o ai nei mau tagata, o le tele o nei tagata e le Samoa ia foliga e le Samoa igoa, a o le faaaoga o le seleni lea e mafua ai. O lona uiga, a alu pea tatou, talofa i le atunu. Talofa i le tofa la e liliu mai tua, o latou leia e aafia tonu, a o la e pulea mai fafo aiga.

Lau Afioga i le Fofoga Fatalai, o le mafuaaga lena lea e taumafai ai e tali atu i le fanoga le olega a i latou mai Salafai ua matua ifi i i i le mea lea. Ae mafua i le a? E mafua i mea o fale palota faapitoa. O lea la e taumafai le Malo, e tatou te vaai i se vaaiga lautele, ae le o le vaai i lou lava pausisi. O i ina tonu lea e mafua mai ai le tele o faafitauli nei e tatou te talanoa ai. Se le o le malosi o le leo ma le lauga ina ia faatosina mai ai ma faapea ai, talofa e, talofa e, ae i ai lava toeaiina o le nuu, aua ne i tatou faatamala ai, aemaise lava tatou nei e aoaoina, aua, aua, aua ne i tatou vaai maualalo ia i latou o toeaiina e fafau ae lo latou olaga i totonus o nuu. O le tofa ma le faautautaga la e i ai, o le matua loloto tele lava, e matua faitauina lou tagata sa aoga, ae e alu atu avatu ni ou mafaufauga e le talafeagai ma le vaai a toeaiina, e faitauina oe mai lou muaulu e tau i ou matiutiuva e toeaiina na fau ae lava lo latou soifua i totonus o nuu. Ma le latou taumafai ina ia puipua a tatou tu ma tatou agaifanua. E faigofie tele ona malamalamo toeaiina ia e i tua i le mea amiontonu ma le mea e faafia amiontonu.

Lau Afioga i le Fofoga Fatalai, o le tulaga lena e le mama i le Malo. O lea ua taoto le Tulafono, e avanoa o tatou sui e avatu ai nisi manatu i o i le Komiti, ia ona aumai lea e tatou te veloaso i ai i le aso e toe foi mai ai le Tulafono i inei. A o le Kapaneta o le Kapaneta e fatalai, o le uta a le poto e fatalai, e fatalai le tofa o lo o i le Kapaneta.

O le mea lea lau Afioga i le Fofoga Fatalai, o le tuualalo lena, ina ne i soona fua le Tulafono, a o lea ua manino le tulaga, e le o avatua i se tulaga faafinavale, a o lea e avatu i le tulaga ina ia amanaia ai le tagi mai o sui e tele ina o atu i totonus o mea nei o Komisi Suesue ma tautino atu ai o latou finagalo moni i le mea e tatau ona fai.

Lau Afioga i le Fofoga Fatalai, o le agaga lena o le tulai atu i le mamalu o le Maota ma le faaaliga o finagalo a o lea ua taoto ia mafaufauga foi na fau ai a tatou Tulafono.

FOFOGA FETALAI: Malo faafetai.

Susuga Hon Laauli Leuatea Polataivao Fossie Schmidt: Lau Afioga i le Fofoga Fetalai, na o nai minute lava faamolemole.

26 MATI 2018

Tulafono Tau Faaofi o Itumalo Palota 2018
– faitauga faalua

FOFOGA FETALAI: Malie le sui usufono, se i tau fesoasoani atu, ona o lea foi ua tatou taunu i le tatou malologa, ae tatou te le i see atu i le tulaga o le tatou malologa, e ao lava ona avatu se tuualalo ma se fautuaga foi a le Nofoa. Ona o le tatou galuega e faapena, e le tuufaua foi lagona o sui usufono mamalu, e i ai foi le manatu ma le faaeteetega o le Nofoa, i avea foi le naunauta o le sui usufono e faapena ona see ese mai ma galo ai foi i lona finagalo tulaga e ao ona matou faamanatu atu, ona o lo matou tiute lea, o le fesoasoani atu i sui usufono mamalu ina ia tau tuutuu mai o outou finagalo e tusa ai o le tatou mataupu. Ae matou te le aiaina le faaaliga o lou finagalo, ae talu ai ne i maitau sese mai e le atunu, ou te faamalulu atu i le sui usufono mamalu, e malie lava le sui usufono se i faauma atu pea lau fesoasoani. O le tatou Tulafono, o le Tulafono Tau Faaofi o Itumalo Palota 2018, e i ai lona eseesega o le mea lea e faaali mai ai finagalo o sui usufono, leaga o lea foi e tulai mai le Malo, e faigata ona ou tuu atua foi aua e tatau ona ou fesoasoani atu ma faasao, leaga e le tuumamaina e le Malo le eseesega o finagalo ia, o Itumalo Faaalaalafaga ma le Itumalo Faapalota, o lona eseesega lena. O lea la e mafuli le finagalo o sui usufono aemaise o le saunoaga a le Afioga o lo o....i le Itumalo Faaalaalafaga e pei ona sa tatou sau ai i fatia ua sola. A o le tatou Tulafono, o lea ua aumai le Tulafono, o tuaoi o Itumalo Faapalota. O lona uiga, e na o le palota e le o aafia ai le tatou aganuu ma le tatou faasamo, e pei o itu la na. Ae tatai pea i le tulaga o le tatou Tulafono, leaga e tatou te see ese loa mai tatou Tulafono, lavelave ma e taitaisese ai le finagalo ma le tapuai mai a Samoa.

O le isi itu ou te faamanatu atu, ia o lea tatou te talanoa i tuaoi faapalota, ae o lea e aafia ai ma le isi a tatou Tulafono lea o lo o sau ai i tua e uiga i le Tulafono o Faiga Palota i le tino o le Tulafono. O lea lava ou te tau maitau malie, aua e oo loa le sui usufono i ina, ia ona ou iloa lea ua uma foi lou avanoa i le isi a tatou galuega lea e sosoo mai, aua e le mafai ona e toe saunoa faalua e taua tulaga ia.

Susuga Hon Laauli Leuatea Polataivao Fossie Schmidt: Lau Afioga....

FOFOGA FETALAI: Malie lava le sui usufono. Ona ou faamalulu atu ai lea, malie lava le sui usufono, ona ou faamalulu atu ai lea, e faapena taga o le tatou glauega o le a tatou o ai, e te soona laa loa i le isi a tatou mataupu lea e le i faitaua, ia o lea ua maua ai foi ma ou avanoa o lea ua fana uma lou malo i lau saunoaga lea ua faatino nei. Talu ai o le a tuu atu le avanoa pe a tatou taliu mai i le tatou malologa.

E talu ai o lea ua tatou taunu i le tatou malologa masani, o le a faataatiae Galuega mo le tatou malologa masani, faafetai.

Na faataatiae fefafolafoaiga a le Fono Aoao mo lana malologa masani i le itula e 10:51 i le taeao ma toe faaauau i le itula e 11:29 i le taeao.

26 MATI 2018

Tulafono Tau Faaofi o Itumalo Palota 2018
– faitauga faalua

FOFOGA FETALAI: Ou te faasilasila atu ua toe amatalia Taualumaga ma Galuega a le Fono Aoao Faitulafono.

Ma e faia le malologa o tulai mai le sui usufono mo Safata Sasae. Ou te tapa lau Afioga i le sui usufono.

Ia se i toe tuu atu le avanoa i le sui usufono mo Gagaifomauga Nu. 3. Tulai mai lau Afioga i le sui usufono.

Susuga Hon Laauli Leuatea Polataivao Fossie Schmidt: Faafetai i lau Afioga i le Fofoga Fetalai ua toe maua se avanoa. E leai lava se agaga lau Afioga matou te faataumatatao pe matou te tau le pua ma lafo i le saunoaga ma le tuleiga a le Malo. E mama mea uma lau Afioga i lo matou taumafai atu. Lau Afioga i le Palemia, ia malu ave i fale lou finagalo, o le manatu, ma le vaivai ma le tuualalo o lo o ou fai atua nei, o la e tapuai mai si ou itumalo, e leai se isi e na te le o silafia lagona ia e avatu i lau Afioga. A o le agaga....

FOFOGA FETALAI: Ua ou faamalulu atu i le sui usufono mamalu, ona o lea ua maea foi ona saunoa le Afioga i le Taitai o le Malo i mea sa laga e sui usufono mamalu, ma e faapea lava uiga o le galuega e pei lava foi ona silafia e lau Afioga i le taimi foi o e seei i le taitaiga foi o le Palestene, e faapena ona tuuavanoa i le Malo e faamalamalama ma faasao mea sa laga e sui usufono mamalu. O le ala foi lena e i ai le faaeteetega o le Nofoa, aua o le tele lava o avanoa e tuu i sui usufono o le Palestene e saunoa ai, a i ai se mea e maitau atu e le Malo e see ese ai mai le faamalamalamaga a le Malo, o le tiute o le Malo e tulai atu e faasao ma faamalamalama a o faafofoga mai Samoa. O le mea la lea afai tatou te toe oo foi i le tulaga lea pei ona i ai lou finagalo, o lona uiga e toe tulai atu foi le Malo.

Susuga Hon Laauli Leuatea Polataivao Fossie Schmidt: Lau Afioga o lau faatoesega lea e tau faamalamalama atu. Na o si mea laitiiti lava lea...

FOFOGA FETALAI: O la e ua faafofoga mai Samoa, e faapena ona faamasino mai latou. O lou lava lea finagalo i le tulaga o lo o i ai...

Susuga Hon Laauli Leuatea Polataivao Fossie Schmidt: Lau Afioga i le Palestene o le agaga lena, e pei lava ona e saunoa i le tulaga o lea sa i ai faaeteetega ona o fale palota lea o lo o i ai ni faiga piopio, lau Afioga e leai se mea faapena. O le tulaga lea sa popoe i ai, O au nei ma lou sui usufono, sa ou malo mai lava i Savaii, ou te le faatuatua i tulaga i i o lo o i ai le tulaga i le tatou Malo...

FOFOGA FETALAI: Se i tulai mai le Palestene.

26 MATI 2018

Tulafono Tau Faaofi o Itumalo Palota 2018
– faitauga faalua

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afiofa i le Fofoga Fatalai, o le mea lea na ala ai ona ou fia tulai atu. E le o faasino lau upu i le sui usufono o lo o saunoa nei, a o lea e agai tonu lava i taualumaga o faiga palota e tele ua tuanai, lea e mafua ai ona fai Komisi Suesue nei o faiga faavae ia na matou faia mai le taimi o Vaai. E pei foi ona silafia na molia foi Vaai i le tulaga o le faagaulemalie foi o isi o le itumalo, lea la na molia ai Vaai. E le mama la ia i matou i le taimi lena ona tilotilo i auala e mafai ai ona foia vaega ia e tutupu ai moliaga. O le mea aupito sili ona matuia i le taimi lea, o le tapuni ane o le avanoa, a ua 11 moliaga o matou, a o lea le aofai o le 47, e 24 matou 23 le Itu Agai. O lona uiga la, e tasi lava le palota e pau malo ai, pau loa ma le Malo. O le tulaga maoae lena sa tupu, faatoa tupu lava lea o se mea faapea, o le uma ane ua 11 sui o le matou Vaega ua molia, a ua uma ona fai le matou tonu e faatamalii, e leai se isi e suia. O le a leai se isi e suina le Itu Agai. Ae talu ai la ona o lea ua taoto su ae ua tapuni, o le ala lena lea na toe fitivale ai matou i le taimi lena. Toeitiiti ta le 2 i le po, 3, o lea lava e fono matou i le mea a fai. Ona taunu ai lea i le tonu lenei, o le a siaki tonu lava i tai po o sao aso ia e tapuni ai. E siaki atu, e i ai le mea ua tupu, o lea e alu le Ofisa o lo o nafa ma palota i le taimi na aveane ai le faasalalauga e amata faitau mai ai aso i ina i le 2AP. Ae avatu, ua tapuni ia polokalame a le 2AP, e le i faasalalaua la i le aso lena ae faatoa faasalalau ia Iuga o Faiga Palota i le aso na sosoo ai, amata ai loa ona faitau mai ai aso e taofi ai e tapuni ai moliaga. O lona uiga ua sasi ia le Malo i le aso e tasi. O le aso la lena e tasi lea na toe maua ai le matou avanoa, ona fai ai lea o moliaga, e uma ane le aso, ua 11 foi a matou moliaga ua i ai, a o lea la ua even ai matou ma le Itu Agai, talu ai le sasi na i ai i le taimi lena. O lea la na fai ai ma le iuga, o le a toe tilotilo le Malo faataoto Komisi Suesue ma toe teuteu atoa ai ina ia faataoto lelei le faiga lea e mafua ai ona molia le matou Taitai. O le a fai Ids, amata ai ona fai Ids. Na matou pepese aleluia, o le faiga lea o le a maua ai le toofilemu. A o le a le mea ea tupu? E aumai le mea faapea o le a manuia ai le atunu atoa, ae atili malaia ai. O le tasi la lena faiga o lea e sosolo lava i le taimi lenei, o lea e tau faatonutonu atu e le tatou Malo.

O le ala lena na ala ai ona faataoto mai mea nei o faiga Komisi Suesue semeamanu la e felesi mafaufau o tagata. Na ala ona faataua ia te au, ona o le saunoaga a le sui usufono e pei ona ua ia tuuaia ai au, ua tulai mai lou taitai ua ou see ese ma faiga faavae, e tatau ona ou malamalamama lelei i faiga faavae. Aisea? Leaga toe o au lea e totoe mai totonus o le Palemene lea sa i ai i le taimi lena. Toe lava o au lea e totoe, o lea ou te malamalamama lelei i faiga faavae na sau ai le Vaega lenei. A ou tautala la i se mea, ou te le tautala faapaoe.

Lau Afiofa i le Fofoga Fatalai, o le tulaga lena. E le i faapea ua ou see ese i faiga faavae, ae matuia tuuaiga a le sui usufono. O le sui usufono sa ou tofia i

totonu o le Kabeneta, sa i ai lou faatuatuaga, ou te le i manatu e faapea le saoasaoa o ana saunoaga i totonu o le Maota lenei. Sa fai foi ae sa tatau ona fuafua.

26 MATI 2018

Lafo mo le Faaauauina o Itula o Fonotaga

FOFOGA FETALAI: Malo faafetai. Ou te faamalulu atu i le paia i lau Afioga i le Palemia....

Susuga Hon Laauli Leuatea Polataivao Fossie Schmidt: Lau Afioga i le Fofoga Fetalai, ua uma atu se upu a lenei itumalo.

FOFOGA FETALAI: Malie le sui usufono ua ou faamalulu atu...

Susuga Hon Laauli Leuatea Polataivao Fossie Schmidt: E avatu le matou faamaualaloga, afai ua sala, ia sala ia Vala. O le a se upu ua avatu Toleafoa, a o le Atua na te silafia. O le agaga ma le auauanaga a le itumalo lenei, e tumau. Ma le agaga faaaloalo.

FOFOGA FETALAI: Malo faafetai. E faapena uiga o le tatou galuega, leaga e le mama foi tiute o le Malo. O le tapenaina mai foi o Tulafono ma galuega i totonu o le Palemene, e le tasi se taimi e lauiliu ai le tofa ma le faautaga, e le tasi foi se itu ae le toatasi foi latou te galulue e saili itu eseese ina ia tuuina mai se galuega e faapena ona saili ai se manuia mo le agai i luma. Aua so o se mea lava e taumafai e sui, e mafua mai i ni faiga i se tulaga sa faapena ona silasila i ai le Malo i fatia ua sola e avea ma lape ma tulaga le manuia.

O le mea la lea, e faamalulu atu ai foi i o outou finagalo, aua tou te naunauta, ae seu le manu ae tagai i le galu e pei o ia upu, aua e le faigofie i le Malo le latou galuega fai. Faamolemole ou te tapa lau Afioga i le Palemia mo se lafo.

LAFO MO LE FAAAUAUINA O ITULA O FONOTAGA

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai ou te tulai atu ma le faaaloalo e faatu le lafo, *Ina ia faaauau Itula Fono o a tatou Fonotaga mo le aso seia maea ona tagofia Tulafono Tau Faaofi e pei ona i ai Pepa o Galuega, ona manava ai lea o tatou galuega.*

Faaluaina e le Minisita mo Pisinisi, Alamanuia ma Leipa ma le Minisita mo le Soifua Maloloina.

Na faamaonia le lafo.

FOFOGA FETALAI: O le a faapena ona tatou galulue fuafua i ai, ma ou te tapa le sui usufono mamalu mo Safata Sasae e te tulai mai.

26 MATI 2018

Tulafono Tau Faaofi o Itumalo Palota 2018
– faitauga faalua

Tofa NONU LOSE NIUMATA (Safata Sasae): Lau Afioga i le Fofoga Fetalai ma le mamalu o sui usufono o le Palemene, le paia o Samoa ua potopoto, ou te faatulou atu i le mamalu o Safata, le Aiga Sa Tunumafono ma le Faaululuga, Tapaua o le Alataua, Taulauniu ma le Aitu Tagata ma le mamalu i le Alataua. Ou te faatalofa atu i le mamalu o lou itumalo o Safata Sasae i paia ma mamalu faalupe mai Niualama e oo i Fatipule o le a nuunu atu.

Ou te faafetai atu i le Minisita e ona lenei Tulafono Tau Faaofi. O le sini o lenei Tulafono Tau Faaofi, muamua, fuafuaina o itumalo palota. Lua, siitia le numera o itumalo mai le 49 i le 51. Tolu, igoa o itumalo. O le effect o lenei Tulafono Tau Faaofi, o le a taatia nisi o itumalo, ae mo Safata, muamua, o le a faaopoopo le numera o Safata Sasae. O lona uiga, o le a faaopoopo Nuusuatia ma Vaiee, lua, Safata Sisifo, o le a faaopoopo Salamumu ae toesea Vaiee ma Nuusuatia. Tolu, o Safata Sasae o le a faaigoa i le Itumalo Palota 21, po o le Safata 2. O nuu e i lalo o Safata 2, o Mulivai, Tafitoala, Fausaga, Fusi, Vaiee ma Nuusuatia. Ma Safata Sisifo o le a faaigoa o le Itumalo 20 po o Safata 1. O nuu e i lalo o Safata 1, o Lofotaga, Sataoa, Saanapu ma Salamumu. O nisi o aafiaga o lenei Tulafono Tau Faaofi, ia sagatonu itumalo palota. O le palota 2016 o le eseesege i le va o Safata Sasae ma Sisifo, e 1,050 voters. E foliga mai o le eseesege ina ia faaopoopo nuu o Safata Sasae. O Salamumu, e le o se nuu o Safata, e le o se nuu foi o Lefaga. O Salamumu e fesootai ma eelele o Safata ma Salamumu. O le nofoa lea na aumai mai Savaii, sa ou faapea o Salamumu o le a faaipoipo ma Leauvaa.

Lau Afioga i le Fofoga Fetalai, sa ma talanoa ma le sui usufono mo Safata Sisifo, le Afioga ia Leana, sa ou manatu e alu Salamumu i se isi itumalo, ae sa tali mai Leana, o Salamumu e uso lelei ma ia. O lona uiga, o le a aveese nisi o nuu o Safata ae faaopoopo Salamumu. Ou te lagolagoina le faaopoopo o nuu o Safata Sasae, ou te lagolagoina le faaopoopo o Salamumu ou te lagolagoina foi le numera o palota e 51.

Lau Afioga i le Minisita, ou te lagolagoina le Tulafono Tau Faaofi. Lau Afioga i le Minisita, e lua fesili i lenei Tulafono Tau Faaofi. Muamua, ia tutusa le numera o itumalo faapalota. E foliga mai o nisi o itumalo e i lalo ifo i le 1,000 ma nisi o le va o le 1,000 ma le 2,000, o nisi o itumalo e i le va o le 2,000 ma le 3,000, ma nisi o itumalo i luga i le 3,000. Lau Afioga i le Minisita, o lo o i ai se faiga po o se system foi lea ina ia tutusa le numera o itumalo palota.

Lua, po o i ai se permission foi nei o itumalo e lua pe tele atu sui usufono. Pe leai se mea foi lea e faaopoopo ai itumalo foi ia e pei la o Safata. Lau Afioga i le Fofoga Fetalai, ua uma, faafetai tele mo le Tulafono Tau Faaofi.

FOFOGA FETALAI: Malo. Tulai mai le sui usufono mo Alataua Sisifo ona faasolo atu ai lea...

26 MATI 2018

Tulafono Tau Faaofi o Itumalo Palota 2018
– faitauga faalua

Afioga ALIIMALEMANU ALOFA TUUAU (Alataua Sisifo): Faafetai mo lou avanoa se i fai atu ia se manatu o Alataua Sisifo ne i te i ua toe tuu mai foi na o le tasi sota minute.

Ae e lagolagoina le suiga o le Tulafono i le vaevaeina o Itumalo Palota e fua i le aofai o tagata palota. Peitai e i ai manatu e fia faaalia mo le faaleleia atili o le Tulafono pe a talafeagai ai. O le vaevaeina o Itumalo Faa-Faipule fuafua i le aofai o tagata i le itumalo, e le o se manatu fou e pei ona sa maua i le saunoaga a le Afioga i le Palemia. Sa leva ona manatunatu i ai tuaa ua mavae atu ua taooto mai tiasa, e faapea foi tamalii o le atunu, o e sa tapenaina le Faavae o lo tatou atunu. E i ai se tusi sa ou faitau ai i le fausiaina o le Faavae o lo tatou Malo Tutoatasi, lea sa Taitaifono ai le Afioga ia Malietoa Tanumafili II. Fai mai le latou fuaitau, o le tufatufaina o tofi i le atunu, o le mea lava na faia e tusa ma le finagalo o tagata Samoa o le atunu, ma e aua ne i talanoaina le mataupu lenei e fuafua i le faitauaofai o tagata i le itumalo. O le vafealoai lelei i le va o tagata, e ao ona tausisia, aua o le toe fesuiai nei o tuaoi o Itumalo Faa-Palota, atonu e tulai mai ai se tulaga faaletonu. E au lava ina oo mai le taimi e lagona ai lava e le tagata latou le tulaga le fetaui o le aofaiga o tagata i lea itumalo ma lea itumalo, ma o le taimi lena, e fai ai lava a latou fesuiaiga. E talitonu o le taimi tonu lenei ua tatou i ai, o le taimi mo le fesuiaiga e fua i le faitauaofai o tagata o le itumalo, lea sa i ai le tofa ma le silasila mamao a taitai o le atunu i lea vaitau, lea ua tatou i ai tonu lava ai i le vaitau lenei o tatou o taitai ia o le a faia suiga ia sa valoia e tuaa i ia onapo, ae sa i ai foi ma nisi o sui sa malosi le faalavelave a o galulue le Komiti ma taitai o le Malo i le fausiaina o le Sa o Samoa mo le Tutoatasi. O le malosi o le aave o finagalo o Tumua ma Pule, o le latou mau, ina ia saga faatumauina le faaaloalogia ma faaauau ona aloaia o lea foi vaega, ma lo latou taofi, ana le seanoa le lagolago malosi a Pule ma Tumua, e le tuvae Samoa i le tulaga lea, ua i ai lona atinae, tau faiga Upufai o Malo ma ia tumau pea ona matala le faitotoa ina ne i sui mafaufauga i se taimi. Ae fai mai nisi o taofi i lena vaitau, aua ne i iloiloina le tulaga ia Pule ma Tumua, aua o lea lava e maua lona tulaga taualoa na faaaloalo i ai i mea tetele faasamo. O se lagona, ia vaavaalu pe a le aganuu ma suiga faaneionapo, ae peitai o nei suiga, ia o faatasi ae aua lava ne i lava ne i faamalosia i tagata, ina ia tatou talia suiga i le taimi nei.

Ia ua uma upu tomua o le folasaga lau Afioga i le Fofoga Fetalai, ua ala ona ou aumaia ia fuaitau ma mea na tutupu i le tuanai, ona e faavae ai ma faapupuu atu ai se manatu o Alataua Sisifo, e fesoasoani i le tatou Tulafono pei ona taua e lagolagoina le vaevaeina le aofai o tagata i Itumalo Faa-Palota. Pau lava lea o nai manatu ia tuutuu atili i le loloto le iloiloga o le vaevaega o Itumalo Faa-Palota. E leai se manatu o Alataua Sisifo e suia le aofai o sui a usufono, ae ia tumau pea i le 49 sui usufono o lo o i ai i le taimi lenei.

Tulafono Tau Faaofi o Itumalo Palota 2018
- faitauga faalua

Ona o le tulaga lea, a alu alu ai pea le sui usufono mai lea Paeaiga ma lea Paeaiga, o lona uiga e iu ina oo oo atu i le 60 sui usufono i se isi tausaga, e tele tupe o le a alu ai i nisi o Nofoa fou, aemaise o le a faaitiitia ai le aofai o tagata palota a le itumalo on an average basis pe a fua agai i isi atunuu o le Pasefika, o se manatu, suisui malie. O se vaivaiga pe a fuafua pe fia le aofai, ae a pe a se i fuafua, fua i le aofai o tagata, population base, e mafai ai ona taua, o se itumalo o le itumalo palota. Aua a oo foi ina fai le tautua a le sui usufono e fua i le aofai o tagata o le itumalo, ae le fua i le aofai o tagata palota. E tatau ona i ai le fua i le aofai o le mauualalalo, ae fia foi le maualuga e mafai ona taua ai, o se itumalo palota. Afai e 1000 le mauualalo, ia faagata i le 4,500 po o le a lava ia le fuafuaga e i ai. Afai la o Savaii lea e 21 ona sui usufono, ia ona vaevae lea, fua i le aofai o ona tagata, pau le mea ia ausia le first hold lea, e qualify ai mo le itu palota. Afai lava e uma ae na o le 20 sui fua i le aofai o le population, ia ua uma foi se manatu o Alataua Sisifo i lea itu. Ae tatau lava ona vailili lelei tagata o lo o i ai nei i piitaga i tua i nuu. O le itu e taua ai le Tulafono lenei, pei lava ona folasia itu lelei. O le mea foi lea e ala ai ona lagolagoina le Tulafono, ona o itu lelei ua tatau ona faatinoina i lo tatou vaitaimi. E talitonu a oo nei nei ina fai le uafu i Asau ma Salelologa, ia e iu lava ina toe foi le toatele i Savaii ma e taua ai lava i le mafaufau le fuafuaga lea, e iloilo nei suiga tai sefulu tausaga. Mo Upolu lea e 28 ona sui usufono, ia e faapena foi ona fuafua ia le vaevaeina i le aofai o tagata o i ai i inei i Upolu, suisui malie, atonu oo atu talia le Tulafono, atonu e oo atu i le isi Paeaiga, ua taatia tonu mai lava le mea lea e tatau te mananao i ai.

O nai manatu na mo lenei taimi. E faaputu manatu ma fesoasoani i le tatou Tulafono Tau Faaofi. Ia alofagia le tatou faaaliga manatu i lenei Tulafono Tau Faaofi taua tele. Ia maua le filemu o le Atua ma maua le tomai e faailoa ai manatu, manua tele Taualumaga o lenei aso i le Fonousu a Samoa. Faafetai mo le avanoa.

FOFOGA FETALAI: Malo faafetai. Se i tulai mai le sui usufono mo le Itumalo Taulaga i Sisifo, ona sosoo ai lea ma le sui usufono mo Salega, ona sosoo ai loa ma le Sui Fofoga Fatalai.

Afioga FAUMUINA ASI PAULI WAYNE FONG (Itumalo Tu Taulaga i Sisifo): Faafetai tele i lau Afioga i le Fofoga Fatalai, e faafetai atu foi i le la itu le afio o le Afioga i le Palemia, le Sui Palemia ma le Kapaneta, faapea foi le susu i le susuga i le Minisita o le e ona le Tulafono Tau Faaofi. E muamua ona momoli atu le agaga faafetai i le Minisita ona o le toa o lona loto i le faia o Tulafono nei, e manaomia ni Minisita faapea pei o Loau, a uma le fono e tatau ona oulua o i o i Wales e tapuai le fusuaga a le tama leaga o oulua e toa.

Ae o lenei aso lau Afioga i le Fofoga Fatalai, ua ou tulai atu, ona o lo o silafia e le mamalu o le Fonousu a Samoa, e tulai atu lava ua leai sou itumalo,

ua leai se itu Taulaga i Sisifo, e faafetai atu foi i le Afioga i le Palemia ona ua aveese le itumalo ae tuu ai pea ia le tagata na sau i le itumalo.

26 MATI 2018

Tulafono Tau Faaofi o Itumalo Palota 2018
– faitauga faalua

O lea la e i ai au nei i lenei aso, e tatau ona momoli se faafetai i le itumalo, Lautinalaulelei o i latou o lo o alaala i Faleata Sisifo. O le manatu mai foi i le tulaga o le tatou itumalo fou.

Ae o le itumalo lenei, sa fesiligia mai lava i le amataga ina ua pasia le Tulafono, a tilotilo atu i i, faatoa fitu masina talu ona pasia le Tulafono ae fai le Faiga Palota. Ia e le i sauniumi, sa fesiligia ai foi po o le a le mea ua ala ai ona fai lenei itumalo, pe i ai se mea ua fai faapitoa ai ia le itumalo lenei o itu Taulaga i Sisifo, aemaise foi ma Sasae. A o le taua, o lea ua ou oo mai ai i le fono i lenei aso. O le itumalo lenei, e leai lava se eseesega ma le tala i le tupu ma lona afafine. Ina ua manaomia e le tupu se isi e nonofo ma lona afafine, sa ia fai atu i le nuu, e i ai le vaitafe o i autafa i ina, a i ai le tagata e mafai ona ia kolosia le vaitafe, a o le vaitafe e tumu i kolokokaila, ioe, o ia o le a nonofo ma le afafine o le tupu. Sa tutu ai la i ina le tamaitiiti Vaigaga i autafa o le vaitafe, ae tulei e le tagata i totonu o le vaitafe e le i sauni. O le a le mea na tupu? Aau atu lava tau i le isi itu. Fai mai loa le tupu, Faumuina, sau o oe o le a e nonofo ma lou afafine. Ae fai atu Faumuina, ou te le fia nofo i lou afafine, pau lava le mea lea ou te fia maua, o le fala na tuleia au i totonu o le vaitafe. O lea la e i ai le tatou Tulafono lea sa sau ai au i le Faiga Palota lea na tea nei, o ai la na faia le Tulafono? Ae o le a le afaina. O lea ua maea, o lea foi ua ou tulai mai, ia sa ou aau mai i le vaitafe na i ai kolokokaila. O lea la ua toe sui i le taimi lenei, faafetai i lau Afioga i le Minisita, lea ua taatia tonu lava ia itumalo i le mea e tatau ona i ai, o lea foi e tau itumalo, o Itumalo Palota, tatou te le o taua o Itumalo Faaalaalafaga, taatia faaalaalafaga, o lea foi ua uma ona faamalamalama mai e le Afioga i le Palemia, a o lea e le o toe malamalamalama lava le tatou fono i lenei aso. Ae le afaina, o le faatofalaiga mamao lea na saunoa mai ai le Palemia, o lena ua i ina i lau Afioga. O lea la ia lo matou Itumalo Tu Taulaga, o lea ua sui tatou, lea ua foliga mai o lea ua taatia tatou ia Faleata i Sisifo Nu.2 po o Faleata Central, o tatou e tu i le ogatotonu o Faleata, o lo o afifio ai foi i inei ia....o lea foi e afio ai le Afioga i le Palemia i lo tatou itumalo, o lona uiga, e le o se itumalo vaivai, o le itumalo malosi. E afio lava le Palemia i Lepa ma si ona aiga, ae tuu pea tagata o lona aiga i inei i le matou faiga palota.

O lea la e momoli atu ai le faafetai tele i lau Afioga i le Minisita, aua ne i toe suia le Tulafono lenei, o lea foi ua taatia lelei, ia alu lava le tagata ia e vaai lona ia itumalo. Sa i ai le mea sa tupu, e i ai le nusipepa lea e masani ona pue mai ai ata o tagata foi na e o complain, fai mai ua leaga le auala, leaga le auala, e tilotilo atu i le suafa o le tina na sau ai, se ua ou fiu e sue i totonu o le Lola palota, ua ou fealuai i Siusega ma tua i o, e le maua, ae te i ua maua ifo fai atu, se faamolemole lava, o oe lea sa e tusi complain i le....ioe, o au, leaga le auala. O fea sa e palota ai? Palota i Savaii. Oi alu la i Savaii e aumai le faipule Savaii e sau e fai lou auala. Leaga e le faapea e alu lou malosi i Savaii, ae alu au e sue le mea e fai ai le auala.

26 MATI 2018

Tulafono Tau Faaofi o Itumalo Palota 2018
– faitauga faalua

Lau Afioga i le Minisita mo Galuega, Felauaiga ma Atinae Eseese, lo ta itumalo lea ua taatia mai i le tulaga e tatau ona i ai. A i ai loa ma tatou auala, faafetai, ioe. O le auala o Falelauniu, auala o Siusega, auala o Ululoloa, fai uma auala na lau Afioga, leaga foi o lea ua palasi tonu lava le itumalo i le mea lea o lo o aoga i ai le faipule. Pe ou te toe sau pe ou te le toe sau, ae o lena ua uma ona fai atu le talosaga e fai le auala.

E pau lea o se manatu lau Afioga i le Fofoga Fetalai. Ia manuia lava le tatou Fonotaga i lenei aso, ia soifua.

FOFOGA FETALAI: Malo faafetai. Tulai mai le sui usufono mo Salega Sisifo.

Afioga TOOMATA AKI TUIPEA (Salega Sisifo): Faafetai i lau Afioga i le Fofoga Fetalai mo le avanoa. O paia ma mamalu o le Maota, ae tainane foi le faafogafoga mai a Samoa i ona tulaga faalupe, o le a le oo i ai se faamatalaga, aua o paia lava ma mamalu e tumau e oo i le faavavau.

Ae o se manatu e fia fesoasoani ai i le Tulafono Tau Faaofi ua lauiliuin e le Palemene i lenei aso. I le tulaga o le faatulagaina o Itumalo Faapalota, o le a soloaesea ai ma le Tulafono o Faiga Palota 1963. I le faatulagaina o nisi o itumalo o nisi o nuu ma afioaga pei ona faataatia mai ai, e lagolagoina e lou nei sui usufono. Pau lava le atugaluga sa ou nofo ma au, ona ina ne i avea fetuunaiga o nei nuu ma afioaga itumalo e le masani ai, e le o ni nuu fou e aafia i totonus o tala faasolopito o itumalo, e afaina ai le lumanai o le faasinomaga o latou tagata, aemaise o le tagata ma lona nuu, o le tagata ma lona faasinomaga, o le popolega lea sa ou nofo ma au. Ae peitai ua malamalamama ma manino le faamalamalamaga a le Taitai o le Malo, o le a le afaina lea itu. Ae i ai lava le popolega, aua e tatou te le iloa mea e ono tutupu ma aliali mai i le lumanai, o fanau o lo o lalovaoa. Mo se faataitaiga na ona tuu atu i luma o lau Afioga i le Taitai o le Malo, o le a ou faaaogaina Leauvaa ma Aleisa. Ou te talitonu, e i ai se taimi oi luma e ono fananau mai ai alo o nuu nei o Leauvaa, ua alu alu ua galo ua vaaia ua le o toe agai i Savaii, ona fai atu lea i ai o se tala i se aso, ae fai mai, leai o le matou faasinomaga Aleisa, na matou feola mai lava o Aleisa matou te palota i ai, ae matou te le palota i Savaii. Ona ua amata ona galo atu ma mou atu le faasinomaga lea, faasinomaga i aiga, faasinomaga i fanua, aemaise o matua o matua o latou matua, e mou atu. E moni e ono le tupu, ae leai se mea e atoatoa e faia e le tagata i lalo o le la, e na o le Atua e atoatoa. O lea e tatou te faamoemoe i le Agaga o le Alii ia taitaiina ai o tatou tagata, ia tumau lo latou faasinomaga i nuu ma afioaga na fananau mai ai pe na fuafuaina mai ai o latou olaga, e o latou matua, ma matua o latou matua....

FOFOGA FETALAI: Malie le sui usufono o lo o saunoa e ao ona ou fesoasoani atu, leaga o lou tiute lea, aua a ou le fesoasoani atu e tulai mai le sui usufono ia le Afioga i le Minisita po o le Malo.

26 MATI 2018

Tulafono Tau Faaofi o Itumalo Palota 2018
– faitauga faalua

Ae ou te fesoasoani atu ne i taitailimaseseina le faafofoga mai a le afioaga, leaga o lea ua taua le afioaga, ae manatua foi o Itumalo Faapalota e tasi lava i le lima tausaga, a o le mea lea o le osi aiga, ia e osi nei, osi taeao, e osi lava i aso uma. E pei o le faasaoga lena e ao ona faasao atu ai, ne i feniniae ai i se faiga foi lele, ia ae eseese mamaoa lava Sasae ma Sisifo i le tulaga o lo o i ai. E faamalulu atu i lau Afioga i le Minisita o lea ua ou fesoasoani i le tulaga, ae afai e te fia saunoa lelei, masalo le tulaga lena, leaga e le tuuaunoaina e le Minisita le tulaga lea leaga o lea ua e taua le afioaga o Satuala aua Tevaga ma Vaifale, Salemuliaga e puipui e le Nofo a Matua, leai o le palota lava ia e tatou te faia e lima tausaga ma fai, a o le osiosiga aiga e osi nei, taeao, ma ona tala atu e osi lava i aso uma se i vagana ua valaau le Atua. Ia tulai mai le sui usufono.

Afioga TOOMATA AKI TUIPEA: Faafetai i lau Afioga, ia e faamalulu atu i lau Afioga i le Minisita, leai e na o se faataitaiga foi lena, ina ne i tupu mai, ae e pei ona ou faaalia, o lea ua malamalamama lelei lou sui usufono, i le faamalamalamaga o le uiga o le Tulafono, ae ina ne i ua tupu mai, ia a ua tea le taimi.

O lona lua, ou te lagolagoina ia le toe fetuunaiga foi o sui faipule i le 51 e pei ona i ai i le 49 sa i ai muamua. Pau lava o lea, o se tuualalo o le sui usufono o Salega, o le a fa au, lau Afioga i le Taitai ma le Kabeneta, e auala atu i lau Afioga i le Fofoga Fetalai, le Nofoa e tasi o Salafai. O le a mou ese ma le talitonu o lo o i ina le uta a le faimea. O lo o i ai le tofa fetalai, le tofa fetuutuunai, ina ia mafai ona faatumau, le Nofoa o Salafai, le itumalo o lo o i ai Saleaula. Ia ou te talitonu lava lau Afioga i le Fofoga Fetalai, o lo o i ai le agaga o le Alii, i le taumafaiga o lenei Tulafono, aua lava le agai i luma, ina ia maua le nofo lelei, le nofo fealofani ma le feoeoeai o tatou tagata, aua ne i i ai ni vevesi e tulai mai. O mea ia o lo o puipui i ai lo tatou atunu, aemaise o Afioga i tatou Taitai, ina ne i tutupu mai ia faaletonu i itumalo, ae ou te talitonu, ua matua malamalamama lelei i le faafogafoga mai o Samoa, i le agaga moni o le Tulafono, ua lauiliuina nei e le Palemene.

E avea foi lenei avanoa, ou te faatalofa atu ai ma avatu moomooga i lau Afioga i le Fofoga Fetalai, malo le faatoatoa, malo le onosai, faafetai le tauatai. Talitonu lava, i le faafoeina o le fono usu a Samoa, ua maua ai le toafilemu ma le amiontonu. Ou te faaaoga foi lenei avanoa, ou te faatalofa atu ai i lou itumalo, Salega i Sisifo, o lea o le a suia ia Salega Muamua, ia, malo le tapuai, ua manua ai faiva o la outou sui usufono. Ou te talitonu lava o a outou tatalo, ua maua ai pea le malosi, maua au le lototele, e faataunuina ai tiute ua outou valaauina ai o au, ia faafetai.

FOFOGA FETALAI: Ia, faafetai, tapa ma le faaaloalo lau Afioga i le sui usufono mo Gagaemauga Nu.3, lau Afioga i le Sui Fofoga Fetalai.

26 MATI 2018

Tulafono Tau Faaofi o Itumalo Palota 2018
– faitauga faalua

Tofa NAFOITOA TALAIMANU KETI (Gagaemauga Nu.3): O iuleo taofi o le mafua na ala o le taeao, e le milia faauu upu o le Maota lenei. O iuleo ia o lea e taofi e Gagaemauga, malele i ai ia le Taitai o le Maota, na i ai lea o le lagona o lou sui usufono, tepa ia i mauga, e oo mai ai lou fesoasoani. O lou fesoasoani e mai ia Ieova lea, o le Faipule o Faipule, a o Ia foi o le Silisili Ese.

Lau Afioga i le Fofoga Fetalai, a ua se toa ma lau Afioga, tau faafoefoeina o le fono usu. Malo le fai o le faiva! E le tau faafulu lava le pasina ia, aua o oe o le toe ulutaia o le siliaga, ua leva ona galue i le Maota. O lele ua maea ona e faautuutu le salefu ma ua e tapa foi le tulia le ta, ua e sagi foi ma ave ia le faapolo, i le Atua o le Ola. E afua ai ona sootuli ma malu tauuee ia le Maota o Samoa i Tiafau tauave nei, ae a ina ua taitai manuia ia faigamalologa, le paia o le Palemene, lena vaiaso seja oo mai i lenei vaiaso fou, malo tapena. Malo le soifua! Malo foi le faatoatoa!

Ou te faafeiloai atu i lena Itu o le Maota, leaga o lea faatoa maua so matou laolao, ua leva ona tauasa. Afio lau Afioga i le Taitai o le Maota lau Afioga i le Palemia, Sui Palemia le aiga Kapaneta, Sui Minisita malo fai o le faiva. E le faigofie lo outou tiute, aua le taimuaina o le sa tele o le atunu i lona tau atinaeina. E ia te au foi le agaga faaaloalo ou te faatalofa ma faafeiloai atu, le paia o lenei Itu o le Maota, afio i o outou Afioga i Taitaifono o Komiti Faapalemene, aemaise sui usufono mamalu uma o le Palemene. Se malo fai o le faiva, tele foi outou tiute tauave. Malo foi lauga, ua fia faalogologo lava i lenei taeao ma lena vaiaso. E ia te au foi le faaaloalo ou te faafeiloai atu vae ma lima o le Palemene, aemaise le Malo, Faauluuluga o Matagaluega o le Malo, faapea foi Faalapotopotoga Tumaoti. Malo le galulue, ua tino faiva o le Palemene ma le Kapaneta ona o lo outou galulue punouai, faamanuia le Atua i la outou galuega.

Lau Afioga i le Failautusi, Sui Failautusi ma le Ofisa o le Fono Aoao, tautuaina o le Fonousu a le atunu, e le galo i lau faamatalaga, malo faafetai, faigofie faiva o toeaiina, ia ona o la outou tiute fai.

E ia te au foi le agaga faaaloalo ou te faapai ai i le tapuaiga mamalu o le atunu, Le Ao Mamalu O Le Malo ma le Masiofo, ia ae faapea foi Sui o le Fono a Sui Tofia ma o outou Masiofo, le paia o le au Sa Levi, e a la outou matafaioi, momoli atu aloaia le sui usufono o Gagaemauga Nu.3, faafetai tele, leaga e masani Gagaemauga i le tau. E le sili le tai i le tapuai, o upu ia o le atunu, ua manuia faiva o le Palemene ona o lo outou po po mai le fala ma feula le mulila. Faafetai tele i le faafofoga le aiga Sa Peseta ma lo outou Maopu, Tama Faasausau, Nofo a Usoalii le Faleiva, ma le igoa mamalu le igoa tau o Matautu. Malo tapuai! Malo le onosai, ia ae faapea foi le tapuaiga a oe le Matua Saleaula. Ia o la outou faafogafoga i lenei taeao, ae tapuai mai

pea. E le i oo i le taunuuga o le faamoemoe, o le mea lea, ia, o lea o le a alo lo outou sui usufono, ia aua se faamoemoe e pei ona nofoia ai lo outou nofoia i lenei tausaga.

26 MATI 2018

Tulafono Tau Faaofi o Itumalo Palota 2018
– faitauga faalua

Lau Afioga i le Fofoga Fetalai, ina ne i ou momoo i ia o le loloto, ae galo ia te au figota o le aloalo, leaga o figota e tali ai le galala ma le fesoasoani, o le fia maua o le fesoasoani i lea aso ma lea aso, leaga o lea faatoa maua so matou avanoa, ae le o po lava Malae i le Maota lenei, pau lea o le sui usufono sa galue i le Matagaluega o Leoleo. E fia oo la i ai sa matou faamatalaga e tusa o mea na tutupu ma faalogo i ai. O le mea lea lau Afioga i le Komesina, Leulumoega Tuaena, ma le paia o le Matagaluega, malo le faatoatoa, ua uma lauga a faipule e le i oo lava i le Matagaluega, e na o lauga e fitoitonu i o latou afioaga ma o latou itumalo. A o lou tulai atu ma le taua o le suafa mamalu o le Matagaluega, ai e galo i sui faipule, o le Malu o le Malo, na to atu e Tumua ma Pule, toeaiina na asa le gasu o le taeao, e a le tofiamalie o le atunuu, na e i outou aao. Ua ou maua tala ua outou manunua sa ou manua foi, ae tou te le i faatafa lava. O le mea lea, se o maosiosia lena o le galuega, o suamalie na o le galuega faamalu o le Malo. Lea ua saunoa atu lo outou Minisita, taliga e fia logo, e pei o le tala i mauga o le matou atu Salafai. O le mea lea, ia faatoa ia lo outou loto. Fuiavailili o oe le tama na saesae laufai i ai Tumua, na fesili po o ai oe? A o ou mama na, aua tou te solomuli, *'law must prevail.'*

La outou Afioga, Tuaena, faafetai, malo galulue, pau lava lea, faafetai i le Komiti o Atinae, lea ua ou vaai i le lipoti, lea o le a fofola i luma o le Maota lenei, le siitia o outou totogi, e lagolagoina e le sui usufono o Gagaemauga Nu.3. Faafetai i le Afioga i le Minisita o lea o le a faataoto le Tulafono lea ma le faamoemoe lea o le lipoti a atinae a le Malo. O lona uiga, ia o lea ua tepaina lo outou maosiosia i le galuega o lea o le a sii o outou totogi. Ia ae...

FOFOGA FETALAI: Ia, faatea ia le saunoaga a le sui usufono i le tatou mataupu leaga e...

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga o le mea tonu lena ua ou tulai atu ai, po o le a tonu le Tulafono lea e saunoa ai le sui usufono?

Tofa NAFOITOA TALAIMANU KETI: Lau Afioga ma le faaaloalo i lau Afioga i le Fofoga Fetalai, o lea lava e faasolosolo lava e pei foi ona saunoa le Taitai o le Maota, e faasologa sue lava ia le lauga a Gagaemauga Nu.3.

Ia ona ou oo mai lea i le Tulafono e pei ona i lumamea lau Afioga, i le vaavaai totoa i le tulaga ua aumai ai le Tulafono, e momoli atu le faamalo i lau Afioga i le Minisita. E le faigofie ma e tele se tapenaga na faia, maua foi tala sala tua e lua Komiti tetele na faatino ai lenei faamoemoe. O le mea lea e

momoli atu ai le faamalo ma le faafetai i le tapenaga o lenei Tulafono e le faigofie. O le agaga lava o lenei itumalo, na ona tautau le mau lava, na ona fautua atu, ae o na i na le utu a le faimea. O le tofa e faatino ai ma taitai ai le Malo.

26 MATI 2018

Tulafono Tau Faaofi o Itumalo Palota 2018 – faitauga faalua

Lau Afioga e tolu lava mataupu tetele o lea e talanoaina i le Tulafono lenei. O le suia ma le soloia o le Tulafono faa-alalafaga 1963, o lona lua, o itumalo palota o le a le toe igoa i itumalo faaalalafaga, lea e taua ai le numera e 51, e pei ona sauva foi i se taimi ua sola. Ia ma le lona tolu, ia o itumalo ia i nuu ma alalafaga lea ua faavasega mai e lau Afioga ma le Komiti, Komiti Suesue sa faatinoina lenei faamoemoe, e momoli atu le faamalo ma le faafetai, manatu vaivai o lenei itumalo, e lagolagoina le tele o suiga. Tasi lenei o sui usufono, e lagolagoina mea nei o suiga, a o suiga mo mea lelei, peitai, e i ai lava suiga e tatau ona toe tagai i ai.

Lau Afioga i le Minisita, o le aveesea ai o le nofoa o le Matua ia Saleaula, e le lagolagoina, ou te tatalo atu, a silasila ai i le nonofo ai ma le faavasegaga lea ua aumai e lau Tulafono lea, lea ua omiomia faaniualeale le Pule Faavae i le Puleono i Salafai tulou o le gutu ma le afi, Saleaula ma lana faatufugaga. O le popolega lea i lou sui usufono, leaga e ui lava e le o afaina lou itumalo ia Matautu, ae o le matou nonofo ai i le Matua ma Matautu, e tua Vaituutuu i Falefagamalo. E tua Falefagamalo i Satoalepai, e tua Satoalepai i Malaeola ma Nafoaga, le itumalo o Gagaemauga lena, le matou fetausiaiga.

Ae peitai, o lea ua atagia mai i le Tulafono lea, ua omiomia faaniualeale le Matua ma lo matou nonofo ai faa-Matautu. O le agaga e fia faasoso atu ai ma le faaaloalo, pe a tusa ma le tofa a lau Afioga, se i toe tagai lava i le Nofoa o Saleaula, leaga o lea ou te vaai atu e le o nofoia le Nofoa i le tofi le Tofa i le Matua ia Faasootauloa, leaga o lo o i ai nisi tuatuagia i atunu i fafo.

FOFOGA FETALAI: Ou te faapai malu i le saunoaga a le sui usufono, manaia le saunoaga ae faafogafoga aua le tapuai mai a le itumalo, amuia foi le itumalo o lo o faapena ona tulai mai le sui usufono e saunoa ma oo le saunoaga i le itu lea o le tatou aganuu ma le tatou tausiga.

Ia ae talu ai e le tuumamaina e le Malo le tulaga o le saunoaga, e ao foi ona matou fesoasoani atu ina ia faapena ona faagasolo le tatou galuega, ae o le avanoa e pei ona tau ai le toesea o se tasi o tama matua o le Maota e faasino tonu ia Saleaula, ia o lea e maua o le tulaga o le Tulafono lenei, a uma ona faitau faalua ona tuuina atu lea i le Komiti latou te iloiloina ma toe lipoti mai i le Fonotaga o lo o sosoo. Ia tasi ia avanoa, e affio i ai sui usufono mamalu o le Palemene, ia faapea foi ma sui o le atunu o latou faafogafoga tapuai mai. Ia a maea ona toe tuuina mai lea ona toe o i le iloiloga auliili ia toe maua isi avanoa tai lua minute tai 15 minute, a lua avanoa tai 15 minute. Ia e tele avanoa mo lenei lava mataupu, ia ae manatu i le tatou galuega, ia na ona toe faapupula atu o itumalo palota e 5 tausaga ma fai. E pei e faapena, ua alu ese mai i le mea foi lele o le itumalo faa-alalafaga e osi lava nai o tatou sootaga ma tulaga faapena i aso uma, a o le palota, ia e lima lava tausaga fai le palota,

sau le toeaina ia osi ana auala ma ana laulautu ma aliitaeao ae se i tulai mai pea le sui usufono, e fesoasoani atu.

26 MATI 2018

Tulafono Tau Faaofi o Itumalo Palota 2018
– faitauga faalua

Tofa NAFOITOA TALAIMANU KETI: Faafetai i lau Afioga lea foi ua manino auofala, ae le toe faasili se matou faamatalaga o le a faaauau pea le lauga a lenei itumalo. Le aotelega o se manatu i lau Afioga i le Minisita, o lea ua taoto mai ai ia le 51 o sui usufono mamalu o le Palemene, o saunoaga o le taeao lenei, ia avea i tatou ma tagata totoa. Ia lea foi ua taua e se tasi o sui usufono mamalu, o oulu ma le Minisita o Aoga, e lagolagoina e tatau ona oulu malaga i le fusuaga e pei ona loma nei i le alo o Samoa o Luplesoliai.

Ae o le agaga e tuu atu e lenei itumalo, afai o le agaga lea e silafia e lelei ai, pau lava lea o le matou tautau le mau, o le tatou Palemene nei e faia suiga, o le a le mea e le lua ai? E i ai se leaga o lena mea? O lea ua ou manino i le tulaga e ala ai ona 51, lea ua ou manino i ai, ona o le tulaga o nofoa faapitoa mo tina, ua uma ona fau lo tatou fale i le Palemene fou, o la lava ua faavagavaga, ae o le talosaga ma le tautau le mau a lenei itumalo, afai o le tulaga lea ua silasila i ai, o le agaga lena. O le a le mea e le 52 ai sui usufono mamalu o le Palemene?

O upu a le atunu lau Afioga i le Minisita, o le tele o sulu, e maua ai figota, e maua ai manatu lelei, a o mea lava e fai e tatou. Afai o le faamoemoe lea, ia o nofoaga faa-itumalo, ia o le agaga lena, taofi pea le sui usufono, leaga o le silasila a Savaii, tasi lea Pule Faavae o Saleaula. O la foi e i ai ia nuu tuaoi, a o le momono i lalo o le Aiga Satuala tulou le gutu ma le afi, o le agaga lena. A silasila i le faavasega mai, e mulimuli Saleaula, Samalaeulu, Patamea, Mauga Saleaula. Tasi lea mea e avatu ai le fautuaga, se i silasila ane, aua po o fea lava e tatou te agai i ai i le faitauga faaitumalo, o tagata palota, ia e i ai lava vaega e le tatau ona tatou o ese ai. Ae o lau fautuaga, afai o le tulaga lena, amata mai ai Saleaula, amata mai ia Saleaula, ia ona o mai ai lea o Samalaeulu, ia ma isi afioaga e pei ona taumafai atu.

FOFOGA FETALAI: Ia malo, ua maea foi le taimi o le sui usufono.

Afioga Peseta Vaifou Tevagaena (Faasaleleaga Nu.4): Lau Afioga i le Fofoga Fetalai...

FOFOGA FETALAI: Ia, se i.. e le i maea le taimi o le sui usufono, toe lua minute o le sui usufono.

Afioga Peseta Vaifou Tevagaena: Ia e na o se mea e fia faasao...

Tofa NAFOITOA TALAIMANU KETI: O le agaga lena lau Afioga, o le a faalavelave le sui usufono lea e tau faamaea atu.

Afioga Peseta Vaifou Tevagaena: Ia e na o se mea e fia faasao lau Afioga...

FOFOGA FETALAI: Ia o le a faasao o la e manaia le saunoaga a le sui usufono, e ui lava ina, ia saunoa ia e faasao.

26 MATI 2018

Tulafono Tau Faaofi o Itumalo Palota 2018
– faitauga faalua

Afioga Peseta Vaifou Tevagaena: Ia ona o le taotoga o le nonofo ai o Satuala ma Saleaula, ona o lea lava o lo o manino i lalo o le Faavae. E muamua ona e taunu ia Samalaeulu ona faatoa e taunu lea ia Saleaula, ma lou faaaloalo lava.

FOFOGA FETALAI: Ia se i tulai mai le sui usufono.

Tofa NAFOITOA TALAIMANU KETI: Faafetai, e faapea lava ta ita ia ai e aanoa le... o le mea sili o la e malamalama lo matou nonofo ai, faafetai.

FOFOG FETALAI: Malo...

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai...

FOFOGA FETALAI: Ia, se i tulai mai le Afioga i le Taitai o le Malo.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Ma o le agaga foi lena, e alo alo sa ai se upu, i tulaga faale-aganuu, ona e na o mea tau le palota lea e tatou te talanoa i ai. E toso mai loa ma le aganuu i le palota ona faigata lea o mea faigofie. Ae pei o le tulaga lena, e le o... o le ala foi lena o lea sa.. o lo o taoto atu ai igoa o mea nei o lo o tatou talanoa i ai, e na o le palota lava. A uma le sui usufono filifili le sui usufono, ona sau lea o le sui tamoe e alu e fai mea ia. Ia afai lava e palapala ai, i le faaleleia o galuega ia e aofia ai tagata o lea ua i totonu o le itumalo faapalota, o lana galuega lena e fai.

Ae e pei o le... ou te manatua lava le tala a Tofilau, a faaliu tupe le tulaga o le a foi o le faipule, e fia se tulaga tau tupe e faaliu tupe ai lona taua? Fai mai Tofilau, e faalupe loa afio mai lau Afioga i le alii faipule o le tupu o le itumalo, o le e faalogo tasi i ai le itumalo, o le tama o le itumalo. A value ia le faalupega lena, e miliona tala. E na o le pau lava lena o le mea lea e tagofia, e le o tagofia lava... ia o mamalu ia faale-atunu e tumau lava, e faavavau. E leai lava se isi na te lotea ma suia ia tulaga faale-aganuu. Ae na o le pau lava lea o le mea lea e laga i ai e faaeteete lava i le agai e toso mai ia le faale-aganuu i totonu, o le ala lena o lea e... ua suia ai le igoa o itumalo faapalota o le igoa faigaluega. O le igoa faigaluega a le o le a filifilia, ia e sau e te alu e te galue faataulealea, aua le tosoa tulaga mamalu. O le ala foi lena lea na sui ai e le Malo le upu o le pulenuu, ae tau o sui o le Malo, ona ua avea le upu lena o le pulenuu ua toso mai ai le pule ona pei lea e pule i le nuu le tagata lea, ona ala ai lea ona lavelave. O mea lava o faalupega, o mea o igoa, leaga ua

mamao tele i sini le saunoaga a le sui usufono e toso mai totonu le aganuu. O le ala lena lea na aloalosa ai lava le Tulafono se na o mea lava o palota, na o tagata faigaluega a le itumalo latou uma na palota maia tatou. Ae toso loa le faalupega ma le faataua, oti atoa lava le faataua, ona pei lea o tatou ua pule, a ua galo ia i tatou o tatou ua na o ni auaua.

Lau Afioga, o le ala lena, O mea nei o sui palota, o auaua a itumalo. E tutusa lelei lava ma le mea lena na fai e le tatou Alii, outou le aufaigaluega paia, fai le mea lea. Ona nofo loa lea o le Alii ma aumai le apafafano, ona alu ifo lea o le Tupu o Tupu ae alu ane fufulu vae o ona soo. O lea e tau mai ai, o outou o le aufaigaluega tou te fetolofi i lalo e fufulu vae o tagata. Tofo la ae alu i lau faifeau fai i ai, se na ou sau faatoa ou foi mai lava i lau galuega, ua matua palapala ou vae, se i asu mai lava sau vaifafano ma sau solo, sau se i e fufulu ou vae. O le mea e oo ia te oe, o le taumatau e le faifeau.

O le tulaga lena lau Afioga, o tatou o auaua tatou te fetolofi, tatou te o e fai galuega mo i latou na palotaina mai tatou, ae le o aafia lava tulaga faaleaganuu e tumau e oo i le faavavau.

FOFOGA FETALAI: Malo faafetai. Ma ou te fautuaina foi lou uso o lo o tulai mai le Sui Fofoga Fetalai, manaia le faaaoga o le fautuag alea a le Palemia, ae aua e te faaaogaina le fautuaga a Faasaleleaga Nu.4 e tupu ai le vevesi. Ae tulai mai e faaiu mai lau saunoaga.

Tofa NAFOITOA TALAIMANU KETI: Ia, ua maua ma ua manino lelei le... Faafetai. Ina ne i faoa i le ta pe tee le uluga i le Palemia. O le agaga lava e tuuina atu, e pei ona ou fai atu i le taimi ua sola, tasi lenei sui usufono e talia suiga lelei. Ae a i ai ni mea e tuualalo atu ai, o le agaga lena o le naunau atu. Lau Afioga i le Minisita, Alosina ma le Vainalepa ma le Fuaifale o Salevalasi, o ou mama na. E le i faigofie lau Tulafono, a o nai motugaafa na a Gagaemauga Nu.3, se i toe silasila ane lava i avanoa o lea e maua.

Lau Afioga i le Fofoga Fetalai, o le a foi Sina i Futu. O le a foi Gagaemauga ma le agaga, o lea ua tatala le taafi, ua faafogofa lau Afioga i le Minisita aemaise o si o matou itumalo ma le Matua ia Saleaula. Faafetai.

FOFOGA FETALAI: Faafetai. Se i tulai mai lava sui usufono se i fua i ai le tatou galuega. Ia e le toe toatele toe toafa.

Afoga Alaiasa Muagututia Moefaauo Malagaitutogai Sepulona Moananu (Anoamaa Sasa): Lau Afioga i le Fofoga Fetalai e te le o silasila mai i lenei Itu o le Maota. Ou te le o malamalamā po o le a le mea e lauga ai tagata e le o aafia o latou itumalo i lenei Tulafono Tau Faaofi. Ia, ma le agaga faaaloalo.

FOFOGA FETALAI: Ia, e le toe toatele toe toalima sui usufono. Ia se i tuu atu le avanoa i le sui usufono mo Salega Sasa.

Tofa OLO FITI AFOA VAAI (Salega Sasa): Faafetai i lau Afioga i le Fofoga Fetalai ua maua so matou avanoa e avatu ai foi ni nai vaivaiga o lenei itumalo e tusa ai ma lenei Tulafono Tau Faaofi taua.

E le umi se faamatalaga a lenei itumalo lau Afioga ona o lo o taoto pea Salega i ona taotoga talafeagai e tusa ai ma tu ma agaifanua aemaise o le

faasinomaga o Salega. Ae na o ni vaivaiga e tau ina faafulu atu ai le pa fagota a lau Afioga i le Minisita, atonu e faiva ese Lopepe i lau silasila i le sui usufono mo Salega i lenei vaega o le aso, e maua penina i tifa.

E talitonu ua manino le auga o aute i le faamoemoe o lenei Tulafono ua sui atu ai ma le tatou Faavae i le saofaiga mamalu a Samoa i totolu o le Fono Faitulafono. Ua tuuafatasi isi nuu ma nisi alaalafaga ona o aga ia ma faiga fou nei e fua i le fuainumera, ae ou te talitonu o aga ia faapapalagi. Ma ou te ofo foi i le maemae o lau Afioga i le Minisita ma lou lototele foi e fai mai lenei suiga.

Lau Afioga i le Fofoga Fetalai e manaia le tofa ua ae, ae i ai lava nai ela i fuafuaga lelei. O le ela muamua, e le faatusalia le tatou atunu ia Niu Sila ma faiga palota a isi atunu leaga e unique Samoa i lana aganuu e afifi ai faiga faapea. O le ela lona lua, o le Palestene ua uma ona totofi ona pou lauga i totolu o le Maota Fono lenei, ma e leai lava se poto po o se atamai na te toe sua. E moni o faiga palota e fai mai tua i itumalo faa faiga palota e taitai ai tatou faiga palota, a o le saofaiga i totolu o le Maota lenei, o le saofaiga i itumalo faaalaalafaga e mamalu. Ma po o a foi tatou mea e fai i tua, tatou te omai lava i inei e avatu ai le faalupega o le itumalo mamalu o lea itumalo ma lea itumalo.

Ou te manatu foi lau Afioga i le Fofoga Fetalai, e le sui momoea sui usufono o itumalo. E taua le aganuu i totolu o le Palestene lenei, a lea e mafua ai ona malu le tatou Palestene fua i isi Palestene e fai fusuaga. Ona o le avafatafata i matai i totolu o le saofaiga lenei faapea foi le va tapuia i totolu o saofaiga masani. Lau Afioga i le Fofoga Fetalai, e pei lava ona fai atu sau tala i le taimi na tatou soalaupuleina ai le iloiloina o le Faavae, o le aveeseina mai o le upu itumalo faaalaalafaga ua opeopea ai mamalu ma paia o nuu ma itumalo. Ioe, o le tauga ma le faaaogaina o le gagana faaalaalafaga, o le taua ia. E amanaia foi, ae o lo o taui ai i ina mamalu e pei ona fai atu se matou tala.

FOFOGA FETALAI: E faamalulu atu i le sui usufono, ou te le tuuloloaina le saunoaga. ua ou manatu e faaaoga tatou Tulafono Tumau ina ia tuutuu mai i totolu saunoaga a le sui usufono mamalu. E i ai lava taimi e tiutalaloa ai tatou galuega, o le manatu lena o le Nofoa, ae o lo o i ai tatou Tulafono e puipui ai felafolafoaiga mai le taua soo i se faiga faasoesa ma taua soo i se faiga foi lea e faatupu vevesi, se mataupu e faatulai mai i se finaug a le sui usufono e lagaia ai le feeseseaiga ma le tulai atu o le Malo e fai le... Ioe, o le mea la lena e le mafai ona ou toe tuulafoaiina saunoaga o le fonotaga lenei, masalo o sui usufono uma lava sa saunoa sa latou taua le tulaga lea o itumalo faaalaalafaga, a o lea ua faasao atu. O lea tatou te o i le suiga lea e aumai o itumalo faapalota, leaga e tuu foi le avanoa i le Malo e saunoa ai. O le mea la lea ou te fautuaina le sui usufono, laa ese mai le tulaga lea faamolemole.

Tofa OLO FITI AFOA VAAI: Lau Afioga i le Fofoga Fetalai, ou te le ulutoaina le tofa i lau Afioga ou te ava. Ae maitauina lava ma le faanoanoa le tulaga lea. E ui i lea, o le a faaaauau pea se matou faamatalaga... O le fesili la a Salega Sasae ae tuu le lua lea e aumai nei, o le a le mafuaaga ua tatou soloia ai nofoa nei tu taulaga? Ia o lea ua aumai nei i totolu o le Tulafono, o le mafuaaga o le ave o le tatou faamuamua i tu ma aga o le aganuu a Samoa i

totonu o le Maota, a o lea e pei e foliga o le a toe solomuli i tua. E ui i lea, o nai vaega na o nisi o le matou faamatalaga.

Lau Afioga i le Fofoga Fatalai, o le suiga foi lenei, e talafeagai i nisi itumalo, ioe, a o le pule lea e pei ona ttau e nisi sui usufono, e tatalo atu, e toe malagalaga ai Leaula ma Letufuga i le mea lea, leaga e le o talafeagai. Ia saga fai lava i nisi nuu, a o le pule o Salafai, na ona matou faaoooloomaau atu. Ou te tautala lava au o au o le tootoo o Faletoi, leaga e malu ia matou Puleono i Salafai. O le upu moni foi lau Afioga i le Fofoga Fatalai, a misi se Tumua pe misi se Puleono i totonu o le Maota lenei, e le faia se Fono a Samoa.

FOFOGA FATALAI: Ua ou manatu e silasila foi i le isi itu o le suiga o Aana, o la e ua tuufaatasi Aiga ma Leulumoega. E le o vavaea ai le paia o Aiga e fa e tausi e Leulumoega lima ia Aiga i le Tai ma le nofo a tootoo. E leai, tatou te o lava i le sami ma a tatou aganuu, a o lea e tau fuafua atu ma fesoasoani atu, leaga e malu i saunoaga ae limataitaiina ai le faafogaga tapuai mai a Samoa a mea tatou ua tatou taumafai e talepe le tatou agaifanua ma le tatou aganuu. O le tatou palota e ala i le Tulafono, e lima tausaga ma fai faatasi a o le tatou osiosiga itumalo ma osiosiganuu, e fai lava i aso uma, aso uma, aso uma, ioe, lea o lo o fausia ai le tatou Malo Tutoatasi, e fausia i luga o le talitonuga faakerisiano o tu ma aganuu ma le Tulafono.

O le mea la lea, ia faafetai atu i le sui usufono ua logosaia foi se fautuaga a le Nofoa. O outou lava o le aumatutua e sulu atu i ai le Nofoa. O ai ea a ou malu ai? E malu ia outou. O le mea la lea, e faafetai atu i le sui usufono mo Salega, o lea ua maea lou taimi. Ia se i faauma mai Salega pe afai o totoe se mea.

Tofa OLO FITI AFOA VAAI: Faafetai. A aluatu loa le isi au lua minute lea ua atoa lau fa, ona uma ai lea o au lau Afioga. O atugaluga lau Afioga i le Fofoga Fatalai, silasila foi i le itumalo o Aiga i le Tai ua ou ttau ma le itumalo lea o Safata 1 o lo o filogia i ina. E le o tusa ai ma faasinomaga o itumalo ia lau Afioga. Muamua, e le toe sogi Saleaula i Tumua nei po o Salamumu i se tofi faipule. Aisea? O lea ua ova ma le 2,000 tagata palota o Safata, ae pe na o le 400 ea le nuu lea o Salamumu. E faapena foi i Saleaula i Salafai. Toeitiiti 2,000 Lealatele, ae na o le 600 pe lata i le 700 palota. O le mea lena o lo o atugalu ai sou taofi ta te alofa i le itumalo, a o le Pule le mea.

FOFOGA FATALAI: Ia, o lena ua e faia le faaiuga a le Atua na o le Atua na te faia le faaiuga lea lena e atugalu i ai lou finagalo. E te atugalu i le faaiuga na o le Atua lava na te faia le faaiuga lena, aua foi a faatu e le Atua le sui e valaaau lava le Atua e le i pau. E oo mai lava le valaaau e le i pau, ae a faatu e le tagata, e sui taeao i le isi faiga palota. Aua le atugalu lou finagalo le sui usufono mamalu i le itu lena, o mea na tau le Atua.

Ae faaiu maia lau saunoaga, leaga ua ou avatua le itu lea leaga e lagalaga ai finagalo, e le gata i le sui usufono mo Safata, ae o Saleaula aua o latou na. Malie le sui usufono aua tatou te taumafai e create se mea e faapena ona faamanuaina ai finagalo o sui usufono mamalu, ae faamaea mai lau saunoaga.

Tofa OLO FITI AFOA VAAI: Faafetai. Ia, o se fesili faataitai; a faapea nei la e tulai mai se sui o Salamumu e avea ma sui o Safata i totonu o le Maota lenei, o le a la le faalupega o le a faalupe ai? Faamata o se mea e

talafeagai ma logomalie ia Safata ma Saleaula pe a ou faapea atu nei, ia talofa lau Afioga i le sui usufono, afio mai oe le Matua po o le pule o le Aiga Sa Tunumafono ma le Alataua. Ia ailoga e fiafia i ai? Aua o mea na e fai atu e sui usufono i i o le faalupe o latou sui usufono i faalupega i o latou faasinomaga.

Na o le fautuaga e faaooololomaau atu i lau Afioga e faauma atu ai se matou tala, e manusina le soa lava sui usufono nei ma lau Afioga i le Minisita....

FOFOGA FETALAI: Se i tulai mai le Afioga i le Palemia.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, na pau lava le tulaga ou te tulai atu ai, o lea lava e manino le tatou Tulafono Tumau e faalupe a le itumalo e te sau ai. O le tatou Tulafono Tumau lena e faatonutonu tatau ai mataupu ma taualumaga o le Fono. Ua leva ona e... ua fia nei ou tausaga? Ua matua tele lava ou tausaga. E nofo nofo i i leai sou oo, e alu i o. E le mafai ona manuia lou tofi leaga e te fealoalofai. O lea lava e manino a tatou Tulafono Tumau i ituaiga faalupega e fai i totonu o le Maota lenei.

FOFOGA FETALAI: Malo faafetai. O lea sa ou tau sailia le vaega lea sa e saunoa ai po o le a la le faalupega o Salamumu pe a see i tua. A foi o Safata 1 lea ua i ai Salamumu. Afio mai lau Afioga i le sui usufono mo le itumalo faapalota o Safata 1. Ia o le igoa lena. Faaii maia lau saunoaga. Se aua ta te finau, o taua o le aumatutua.

Tofa OLO FITI AFOA VAAI: O le mea mulimuli lava i le Tulafono lenei i lau vaavaai atu i le faavasegaga maiga o nuu ma lea itumalo faa faiga palota, e leai ma se isi o le Kabeneta e toe faiaina i i i le mea lea ua i ai, pei na ona tasi lava nai nuu maoti ia ma nai pitonuu e le maoti i totonu o le Tulafono, amuia foi outou ua aoga i ai le Tulafono lenei.

Susuga Hon Tuilaepa Auelua Fatialofa Lupesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o ituaiga lafoga vaivai ia e taitaiseseina ia finagalo faaalia. E leai lava ma se mea o i totonu o le Tulafono o tau mai ai, ia omai pea omai pea omai pea ia le Minisita o i ai nei. O ituaiga faaupuga ia e faamataga ai se mea lelei. E leitioa, o le sui usufono lea lau Afioga i le Fofoga Fetalai, se maumau le upu o le sui usufono matua, sui usufono matua o le Palemene, a o lenei lava e faatamaitiiti, ua tele Paeaiga ae faatamaitiiti lava ona faaali ona finagalo i totonu o le Maota nei.

FOFOGA FETALAI: Ia ua maea le taimi o le sui usufono.

Tofa OLO FITI AFOA VAAI: E faafetai atu i lau Afioga i le Fofoga Fetalai mo le avanoa. Na pau lava le mea, e le atoa se tai afe o le Lola palota a le Afioga i le Palemia ma le Sui Palemia.

FOFOGA FETALAI: Se malie ia le sui usufono.

Tofa OLO FITI AFOA VAAI: Se i fai faatutusa a tatou mea, faafetai.

FOFOGA FETALAI: Ia o le mea lava lea o lea e maua, o tatou e...e pei lava foi ona fai atu, e i ai lava le taimi e naunauta ai ia ae galo ai le....ioe, ou te musu e fai atu le upu foi lea a le tamaloa la e saofai mai uta i lona atalii, ioe, a fai atu i le toeaina ae fai mai e le o sana upu o le upu a le tamaloa Asau, le upu foi lea o le ainini, fai mai o le ainini o fanau. Ia taoto ia faapea.

Ou te tapa le sui usufono mo Anoamaa Sasae tulai mai e saunoa.

Afioga ALAIASA MUAGUTUTIA MOEFAAUO MALAGAITUTOGIAI SEPULONA MOANANU: O lea ua toa nei foi lo tatou Maota i le toamalu pei ona i ai lenei vaega o le aso, sa siisii foi le gataifale i nisi o saunoaga, ia e matua lava i le oo, e tetele lava i Pesega ae matua lava i le oo le faamoemoe o lo tatou Maota. Faafetai i le Atua ua maua se avanoa o lenei itumalo. E le toe ta la i tua sa matou tala, pe tau tatai i le moa o le ala e tusa ai ma le tatou Tulafono pei ona faataatia.

O le Aso Toonai na tea nei sa fai ai le fono a lo matou nuu, ia sa ave la i ai ia le mataupu lenei se i saausi finagalo le paia o Aiga ia laua Matua ma lenei nuu. E pei o aga ia e tatau ona fai aua o mea nei o tatou Faiga Palota, o le aafia ai i le agai i le lumana i lo latou finagalo ua aumai, o le a taumafai e faaleo atu i se faapuupuuga. Ia o le tatou atunu u tulaga ese lava, matai, pau lea o le sui ma le tagata e mafai ona avea ma sui tauva, ia e le mafai e se isi tagata. Atonu o i ai se taimi i le lumana i, ona omai lea o tagata foi ia lea e tau nei e omai e tautua le atunu u, ona tatou tatala loa lea, aveese ia matai ae tatou o e faapalota atoa ia so o se tagata e fia tauva, pei o atunu u mamao. A o le mea lea o lea e mapu ai le Palemene o Samoa, ona e i ai lava ona taua o le tofiaina o tatou e fai ma matai. O le Tulafono ua aafia si o matou itumalo, e le o ni tala e avane ai, o lea foi ua manino auofala i le aumaiga, ua i ai se faaopoopoga, tusa o lea e toese se tamai numera ae faaopoopo mai se numera tele. Ia o le a le afaina, pei ona malie, se o tofiga nei o tofiga mai le Atua. Po o le a lo tatou naunau i nei tofiga, a valaau lava le Atua ia te oe e avea oe ma faipule, ia pe avea oe ma taitai o le itumalo, o le na. O le mea foi la lea ou te le naunauta faapea ou te fia tumau ai e faavavau i lenei tofiga, tatou uma, leai e tatou te agai foi ina uma lo tatou taeao, uma lo tatou taimi, ia ae soloai mai le mamalu o le atunu u o la e valaau i ai le Atua ma tofi e le Atua aua nei tofiga. O le tuu mai o Faleapuna i totolu o Anoamaa, o se mataupu e talia e lenei itumalo e leai se mea o le a matou teena ai, ae a tatou o i tuutuuga o le nuu o Falefa, e pau la lea o se mea sa ou fia tatalo pea. Pe a le tofa i le Afioga i le Minisita, toe silasila i ai. Leaga o le nuu lenei e i ai ma Sauano ma Saletele, se e tausi e Matua o Iuli ma Moeono, e le o nuu e tu i luga o le aoa, se i tulou, o le nuu e i ai le faasinomaga, ma o nuu foi o nuu e mavaevae lava faalupega e le aafia i le Vaa o Fonoti o tagata o le aai o Fonoti. O le mea lava lea na ona matou faaoooloomaau, ae o Faleapuna na tuu mai totolu, e talia ma le agaga faafetai. Ia pau lea sa fautua mai, fai sau tala i le tulaga lena, ioe, o lea la ua avatu, taatia atu i ina. A ou matamata i nisi itu o le Tulafono ua sau faapitonuu isi nuu, ua sau te i lava ua tele le nisi o lena itumalo ae le iloa o pitonuu e le aafia e leai ni sui o le malo e i ai e leai ni pulenuu, ae pei ua aumai foi lea ina ia toatele ai le numera o lea itumalo, ae a ou tago foi au e vaevae lou nuu, o le a ova foi le tele o lou itumalo pe a ou tago nei e tuuiseese mai pitonuu o lo matou nuu. O le mea lea pei o nai inconsistency

pei o ni alafua e le talafeauga ma le faamoemoe. E i ai nisi o itumalo pei o le mea lea ou te nofo ai nei i Vaitele se i tatou o i Vaitele o lea e alaala mai le sui usufono o Vaitele, pei e foliga mai na o au e mafai ona ou palota ae ia mafai ona ou tauva i le Faiga Palota, pe a faapea ou te nofo i Vaitele-uta nofo i Vaitele-fou, o le agaga lena o lea ua aumai ai nei le Tulafono, pei na o au o se tagata palota, a o lou auai ou te avea ma sui tauva i le Faiga Palota, e le o tatala la i i i Tulafono ia e lua o lo o aumai. Pei o nai atugaluga na, e faaiu atu ai sa matou tala i le mea e avavau mai ai, se i tulou le itu lea e uiga ia Saleaula. O lea ua e saunoa manino ia Tumua, faapea foi le Tumua ia Lufilufi. Ua leva lava ona o faatasi ma Aiga, lea foi o le a toe omai ma Faleapuna ua leva lava ona matou.....e leai lava ma se mea o gase, a o Tumua o Tumua, o le uluai Tumua lea na avea le Pule i Savaii. Ia manuia le tatou Fono.

FOFOGA FETALAI: Malo, ia o mea la ia sa ou popole ai, malo faafetai. E i ai lava manatu o saunoaga e faamalie ai faafofoga tapuai mai a Samoa. Masalo o le sui usufono o.....se i faasolo atu lea itu o Faasaleleaga Nu.4 lea ua maea ona e saunoa muamua ae faamotu mai sina tamai mea lena e totoe lau Afioga i le sui usufono mamalu.

Afioga PESETA VAIFOU TEVAGAENA: Lau Afioga i le Fofoga Fetalai, e viia le alofa ma le agalelei i lau Afioga, faafetai foi i lenei Fonousu a le atunuua maua ai foi nisi o mafaufauga lelei. E faatalofa atu foi i le la itu o le malu, lau Afioga i le Palemia, lau Afioga foi i le Sui Palemia ma le mamaalu o le Kapeneta, aemaise foi le mamaalu o le Fonousu a le atunuua.

Ae ua ou tulai atu ma le agaga faaalaoalo, ona e fia fai se sao o lenei itumalo i lenei Tulafono Tau Faaofi. Sa ou faalogologo ma le totoa i le tele foi o saunoaga matagofie a sui usufono mamalu, i lau faalogologo i le saunoaga a le Taitai o le Malo na amataina le faamalamalamaina o lenei Tulafono, e lua lava vaega e taua tele ia te au. Aua tatou te fefefe e fai a tatou faaiuga. Ma le isi saunoaga a le Taitai, o musumusuga a le Atua e ala i le Minisita ma tatou uma lava, e fau ai a tatou Tulafono. Ma ou te talitonu foi o lenei Tulafono lau Afioga i le Fofoga Fetalai, o se Tulafono e manuia ai e le gata ia tatou i lenei Palestene ae o nisi foi e fia oo mai latou e fai ma sui tauva i le Nofoa o lo o tatou i ai nei. Ma e o le valaaulia ai o tatou e le Atua, o plan a le Atua ua uma ona faataatitia. O lea na saunoa i ai le sui usufono mai Anoamaa Sasae. O tofiga, tofiga mai le Atua. Tatou te le i omai i le Maota lenei, ua leva ona fai tofiga a le Atua ia i tatou, e i ai e e tai tasi Paeaiga, e i ai e tai lua tai tolu, e oo foi i le Afioga i le Palemia ma le Afioga i le Fofoga Fetalai o toe ulutaia ia o le Maota. Afai lava ua filifilia le Afioga i le Palemia e taitaia le Malo seja tuumalo, o tofiga lena. E oo foi i lau Afioga i le Fofoga Fetalai, o lea ua faalua ona totogi oe e le Atua e te saofai mai luga i ina. Aisea? O plan ia a le Atua. Leaga o lea e tautala i ai Ieremia, tautala i ai le Perofeta o Ieremia, fai mai le....,manaia lou avatu i le faaperetania e manaia i le faalogologo, *'For I know the plans, I have for you, plans to give you hope, bless for you, and not to harm you, says the Lord.'* Ua ou iloa....

FOFOGA FETALAI: Malie le sui usufono, se i tulai mai le Afioga i le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, ou te fia iloa tonu po o le a le Tusi lea, ae o le a foi le mataupu ma le fuaiupu?

FOFOGA FETALAI: Se i tulai mai le sui usufono.

Afioga PESETA VAIFOU TEVAGAENA: Lau Afioga i le Tusi Paia, ia tau ia lau Afioga ma Tusi Paia aua o lau Afioga lava ua uma ona filifilia e le Atua e avea ma Palemia o le Malo.

O lea lava e manino lava i i le Tusi a Ieremia e 29 fuaiupu e 11; Jeremiah 29 verse 11, fai mai, *'For I know the plan, I have for you.'* O lona uiga, e tatou te omai i le Maota lenei, ua leva ona i ai fuafuaga alualu mamao a le Atua. Faafetai i lau Afioga i le Minisita e ana le Tulafono. O le Tulafono lenei o lea ua aumai ua manuia ai, aemaise lava tatou mai Savaii, aemaise foi au lea e tautala atu, o le matua pologa o lenei mea, o le taumafai e approach tagata palota o itumalo, leaga e nonofo i i ma o, e soo Aleipata o taamilomilo ane ai, alu ifo i Manono, sau i Safata, e le faigofie, ae tatou te le iloa po o fea e fai ai le palota. Ae a le mea lea ua aumai i le Tulafono? Faafetai i lau Afioga i le Minisita e ana le Tulafono, a lea ua manuia ai tagata uma, lea ua manuia ai tagata uma. Fai mai le faasamoa o le Tusi lea na ou avatua, *'ua ou iloa manatu mo outou, manatu i le manuia, ae le o le malaia, fetalai mai ai le Alii.'* O le ala lea....

Afioga Sulamanaia Fetaiai Tauiliili Tuivasa (Vaimauga Sasae): Lau Afioga i le Fofoga Fetalai, e le faaueilavea i le saunoaga a le sui usufono mamalu ae o sina....ae se i fai sana malologa, ona o lea e malele lava ma saunoa le sui usufono lea i le Tusi Paia, a o lea e maua o le sui usufono lea na fai lana faamasinoga ae o ma le toeaina i le vaalele i le motu lea na alu ai le toeaina, o uiga la ia o le talanoa i le Tusi Paia ae sola i o e tietie vaalele ae le alu i le faamasinoga lea na upuia ai le sui usufono lea le Minisita Lagolago?

FOFOGA FETALAI: Malie le sui usufono o mataupu lava ia, a talanoa loa i le Tusi Paia o le aotelega o manatu, ioe, o le aotelega o manatu. E i ai se isi o i sili o le finagalo o le Tusi Paia. Faai mai loa le saunoaga a lau Afioga i le alii aoao fesoasoani.

Se i tulai mai lava le Afioga i le Palemia.

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, o le valaau lea na valaau mai ai au faapea foi le Afioga i le Minisita Lagolago, o le valaau taualoa a le Palemia o Tuvalu, e avea o le malo faaaloalogia i le samiina foi o le latou Tutoatasi. E le faapea la na sola le Minisita Lagolago ma ou fesoasoani ai e faasola, leaga o manatu ia sa manatu i ai isi, ae leaga o le valaau taualoa a le Malo, a aumai loa le valaau taualoa a le Malo e aloaia le Malo Tutoatasi o Samoa, ia tatou lava mea faalotoifale e tolo le taimi e fai ai. A o mea ia e ala ona valaau mai ona o le aloaia o le Malo Tutoatasi o Samoa, o le mafuaaga lena.

FOFOGA FETALAI: Ia faaiu mai le saunoaga. Tulai mai le sui usufono e faaiu mai le saunoaga.

Afioga PESETA VAIFOU TEVAGAENA: Se i ou tali atu lava i le sui usufono mamalu o le itu le la leaga o la e faafogaga mai lou itumalo. A ou talanoa loa i le Tusi Paia, aua e te toe faalavelave, o e e aatui i le finagalo o le Atua, e malaia e oo mai, e te le toe sau foi i le isi Faiga Palota. Ae silasila foi lau Afioga i le Fofoga Fetalai, o au lava le isi sui usufono e fai lava le palota o feagai ma faamasinoga, o la e silafia e le Atua. E ui lava ina ou savali i le va o le vanu o le oti i le mau faamasinoga, o le plan a le Atua, Peseta alu e nofo i lou Nofoa, ioe, ia o lea foi o le a faaopoopo le isi Nofoa o Lealatele, e te le iloa foi le finagalo o le Atua lau Afioga pe faapea mai, sau e alu i le Itu o Tane. Ia ua ou le malamalama la, ou te usitai lava lau Afioga.

O le mea lea, na o le momoli o le faafetai i lau Afioga i le Minisita e lagolago ai le Tulafono lea ina ia o uma i Savaii o e lagolago i le faipule, tatou o, fai a tatou palota, pe le fia o foi i Savaii, la e i ai o tatou nuu ma tatou aiga, e faigofie mea uma, ua le tele foi ni tupe e o, ioe, a o le mea o lo o i ai nei, se ou te fai atu lava lau Afioga, e faigata tele, ioe, le tausaili, ia o le mea foi lea lau Afioga, o le uma foi o le Faiga Palota, ia o auala a le Atua, e i ai lava auala foi e aumai e teuteu ai ia mea e mafua ai foi ona tatou le o i ni faamasinoga, a o le Tulafono, e matua talia le Tulafono lau Afioga, ma lou faaaloalo lava.

FOFOGA FETALAI: Malo faafetai. Masalo toe toalua sui usufono o le itu i tai, toatolu, ma le sui usufono e toatasi le Afioga i le sui usufono mo Faleata.

Se i tulai mai le sui usufono mo Safata i Sisifo.

Afioga LEAANA RONNIE POSINI (Safata Sisifo): Lau Afioga i le Fofoga Fetalai, e faatalofa atu foi i lau Afioga aemaise foi o le paia o lenei Palemene, i le afio o le Taitai o le Malo ma Minisita foi o le Kapaneta ma Minisita Lagolago aemaise o le Fonousu a Samoa.

Ou te manatu e tau fai foi se manatu i le Tulafono Tau Faaofi, aua e tau matau foi, ua tele lava sui usufono mamalu o lenei Maota e fai ma taua ai lo matou itumalo. Ae sa o matou faalogologo lava ma le totoa i le agiga o le tulafono ma tulaga faapena.

E muamua ona faafetai i lau afioga i le Minisita, e ia le Tulafono Tau Faaofi ua faataatia nei i totonu o le Maota, ae faafetai foi i lau Afioga i le Palemia ona o le faamaninoga o lenei tulafono. Leaga e le maua foi ni taimi e faalauaitele i totonu o lo tatou atunu. E ui lava ina i ai le Komisi Suesue lea sa aoaoa maia fingalo o lo tatou atunu, ae o lea ua toe saunoa lau Afioga i tulaga e tau faataoto i ai ia Itumalo Faapalota o lo tatou atunu. O lea la e matua manino, e talitonu foi la e le toe oo i ai se matou tala o lea ua faafogafoga Samoa aemaise o lo matou itumalo. Ae o lo matou itumalo lea sa suia i le Paeaiga o le palota lea na uma atu nei, lea sa vaelua ai Safata i Sisifo ma Safata i Sasae. I lau tau matau i le vaeluaga lea o lo matou itumalo, e pei sa vaelua i luga o le aofai o afioaga. Aua e iva ia nuu, ona pei lea e vaevae e lima le isi itu fa le isi itu. A o lea la ua toe aumai i le suiga lea o le a sui ai nei, o lea o le a toe vaevae lo matou itumalo, e vaevae o le a ono nuu o le isi itumalo ae tolu le isi. Tuu mai ai loa ma le afioaga o Salamumu, o lea la o le a

fa ai le itumalo lea ou te tulai mai ai i le taimi nei. Ae a tau faapalen i la i numera, o lea la faatoa paleni i i numera o le faitauaofai o tagata palota pe a tuu i le teuteuga lea. O lau matau, e pei o lea ua taoto i le faatulagaga lelei i le aofai o tagata palota. E talitonu foi o la e faafogaga mai lo matou itumalo, sa luga lalo i le Paeaiga talu ai, i le tulaga o le aofai ma tulaga faale-agantu. A o lea ua manino a tuu lava i le numera o lea e aumai ai, o lea ua vasaga tutusa lelei. O le a taoto lava paia faale-agantu e pei ona taua i saunoaga a le Palemia ma le Minisita, ae o lea e pei ua vasaga lelei le aofai o tagata palota. A o lau matau atu i le aumai o le afioaga o Salamumu. Ae pei o lea na taua e isi i tulaga mamalu ma tulaga faapena. Ae pei o lea na saunoa lou uso a sui usufono i Safata i Sasae, lea na taua faapea na ma talanoa o le uso lelei lava o le nuu o Saanapu ia Salamumu. Ia e sao lelei lava le Afioga lea, mafua sa matou tala, aua ua leva lava ona tuaoi Salamumu ma Saanapu. O lona uiga la, o lou uso lelei lava le afioaga o Salamumu i le tulaga o le va nonofo lea. A faapea foi e pasia le Tulafono Tau Faaofi lenei, ou te masalo e le o toe mamao foi se taimi ou oo i Salamumu, amata ona toe tau faamasani i tagata o lea afioaga. Ou te talitonu o le isi mafuaaga lea e tau tuai ai le atinae o Salamumu, ona o la e i Savaii le sui usufono a o lea ma te tuaoi, o le a vave atinae o le a vave ona ou pipii i ai.

E pau lava lea o se fautuaga i lau Afioga i le Minisita ma le Palemia, se i toe saili ifo i le auiliiliga o tagata palota i lea itumalo ma lea itumalo. E pei ona saunoa le isi sui usufono, pe faapea e afe i le tolu afe, ia tasi lena itumalo palota.

Ou te talitonu e tuu atu i lau Afioga i le Minisita ma le Palemia e a ia lea Tulafono Tau Faaofi. Ae momoli le agaga faafetai tele. Faafetai tele i lau Afioga i le Minisita i lou lototeli, e le faigofie le tu foi ma le aga i totonu o lo tatou Maota nei. E pei e tau faavae ai o latou lagona ma o latou finagalo, ae tuutuu mai lava i totonu o tatou manatu, o itu faapalota le tatou mataupu nei.

Ma le faaaloalo, faafetai i lau Afioga i le Fofoga Fetalai.

FOFOGA FETALAI: Malo, tulai mai le sui usufono mo Vaimauga i Sasae.

Afioga SULAMANAIA FETAIAI TAUILIILI TUIVASA: Faafetai i lau Afioga i le Fofoga Fetalai mo se laolao e fai atu ai se sao o lenei itumalo, ona o le taua o le Tulafono ua tuuina mai i le Maota nei.

E muamua ona ou faafetai i le Minisita e ona le Tulafono Tau Faaofi. O le tele o nisi o saunoaga i le tele o le taimi lea ua tuuina mai e tapena ai o tatou sui usufono ma silafia ai le mea e agai i ai le isi faiga palota i le isi vaitau o le a oo mai. Ae faafetai foi i le Minisita Lagolago, o le Ofisa Sili po o le Komesina o Palota i le tuuina mai o lenei Tulafono Tau Faaofi. E le talanoa lava le sui usufono mo Vaimauga i isi itumalo, ona o le itumalo lenei ua tuuina mai e vaevaeina, o la e tumau nuu o lou itumalo. O le tatalo ma le talosaga a le sui usufono, se i silasila ane i nuu o lou itumalo, e pei ona malele foi le sui usufono mo Anoamaa Sasae, o nisi o pitonuu ae pei ona maua e lenei itumalo e pei ona outou silafia lau Afioga i le Fofoga Fetalai, lenei itumalo i le afifio atu o le mamalu o le atunu e nofoia ou eleele ia ou te lauga soo ai lava, aemaise o Vailele-uta, o Fagalii-uta, Letogo-uta ma Laulii, o lo o faatupulaia pea le toatele o e e afifio atu ma nofoia eleele nei. E pei o le tatalo a lenei itumalo lau Afioga i le Minisita, e lagolagoina e le sui usufono

mo Vaimauga ona o lau Afioga o le Minisita o lo tatou itumalo. Ae o le tulaga e i ai sei silasila ane i nuu ia o Vailele, o lea e i ai Vailele-uta e i ai foi Vailele-fou, e oo foi i Letogo e i ai foi Letogo fou, o Fagalii e i ai foi Fagalii-uta. Ua faatupulaia le mamalu o le atunuua agai atu ma nofoia nei eelele o faatauina i le tulaga ua i ai le atunuua, ma nonofo ai lava le mamalu o le atunuua. E pei o lau tatalo e lagolagoina le tulafono i le faamaotiina o nei nuu ae se i toe silasila ane i lo ta itumalo. O le tulaga i le upu lea itumalo palota, ua lagolagoina e lenei itumalo ona o tulaga e pei ona i ai lenei itumalo. O lea ua maua e fa vaega ua vaevae i ai, ao lona faalupega o lo tumau lava i le paia o aiga e lua aemaise o le nofo a tula o lenei itumalo, e le o tuuese lava.

O le tatalo a lenei itumalo o lea e vaai atu e pei o le tele o nisi saunoaga, e pei o lea e penefiti le itumalo lea o Vaitele. E pei o lea ua ou vaai ua leai lava se pisa o le sui usufono mo Vaitele, ona o Vaitele fou o Vaitele-uta o Vaitele tuai a o Vaitele lava. E pei e faapena se agaga o lenei itumalo lau Afioga i le Minsita, se i silasila ane i o ta nuu na. E i ai Vailele, Fagalii ma Letogo o nuu mavae, ae pei o latou tuamaota ia ua faatauina foi e nei mamalu o le atunuua ma nofoia, o lea ua tele atu ai la ta Lola.

O nuu nei e ova ma le afe le Lola palota i nuu taitasi. E fa o nuu toeitiiti lava 5000 le Lola a lenei itumalo. Ou te talosaga pe mafai ona maua se isi o ta sui usufono, a le o lenei vaitau ae mo le agai i luma, ae ia fai lava se sui usufono mo Laulii ma Letogo fai se sui usufono mo Fagalii ma Vailele, e manaia ai lava. O lea ou te vaai atu o le mamalu o le atunuua lea e agai mai i lo ta itumalo o lea ua manaia le Tulafono lea ua faatino, aua o lea e nonofo i lo ta itumalo i o tatou nuu nei. Ae a oo loa i Faiga Palota ua o i tua, ua agai i Savaii. A o lea lava e tigaina tatou, toe o mai foi lea toe nofoia o tatou eelele nei. E pei o lenei faiga fou ua fai e lau afioga i le Minisita ua tulai mai ma lau Minisita Lagolago, e matua lagolagoina e lou nei itumalo.

Ma le faaaloalo i lau Afioga i le Fofoga Fatalai.

FOFOGA FATALAI: Tulai mai le sui usufono mo Faleata Sisifo.

Tofa LEALAILEPULE RIMONI AIAFI (Faleata Sisifo): Faafetai tele i lau Afioga i le Fofoga Fatalai mo le avanoa. Atonu ua talafeagai foi le fai o se manatu o lenei sui usufono. Aua e pei o lea e fai ma reference agai i ai, e pei e fai ma faatusatusa agai i ai le tele o saunoaga a sui usufono ia Vaitele. Ou te le iloa foi po o nei sui usufono e fuafua e fia o i le palota i Vaitele. Afai o fia o, afifio mai tatou o ona outou iloa lea o le mea e tupu ia te outou. O le fuafuaga lenei a le Malo, e le o se mea fou. O faaopoopoga mulimuli lava o sui usufono o le Palemene lenei, o le itumalo o Salega ma le itumalo o Safata. E tasi lava le mafuaaga na ala ai ona faaopoopo, o le mafuaaga na ala ai ona faaopoopo ua faatupulaia le fuainumera. O le finagalo o le tele o sui usufono i lau faalogologo, o le aganuu, e afaina le aganuu. O Faleata, ua leva ona vaevae mai, na Faavae loa Samoa e le i umi ae vaevae loa ma Faleata i Sasae ma Faleata i Sisifo. A o le fesili la, o afaina la le aganuu ma le nonofo ai o tulatoa ma le itumalo i ona tulaga faalupe? E leai ma se mea na i ai. O palota e tolu lea na mavae atu nei, e pito sili lava ona tele le itumalo lenei i le Lola palota. E leai se tala a lenei itumalo, sa onosai lava ma fai, aua e i ai le taimi, e i ai le taimi. O lea la ua faafetai, faafetai aua e le o se mea fou, e lauga pea lauga pea sui usufono faaopoopo, faaopoopo. O le finagalo autu lava i lou talitonuga mo le sui usufono, o lona lava naunautaiga e aua ne i faiaina i se

palota. A aumai la le Tulafono e vaai atu e aafia ai lona itumalo ma tagata palota, e muamua lava oso teteet, ae le mafaufau i le mea na mafua ai ona vaevae i le agai i luma o le atunu. E tolu lava vaega tetele ia e fuafua i ai le Faigamalo o Samoa, o le Aganuu, Faakerisiano ma le Faatemokarasi. E feavatai, e fealoaloai, ae a oo lava ina tatou o i le faakerisiano, e tumaoti lava faakerisiano le finagalo o le Atua. A o tatou o i Faigamalo faapena foi, e feavatai ae fai lava le galuega i le Faatemokarasi, ina ia mafai ona tumaoti. O le toatele o sui usufono ia e faapea mai, e toe foi i itumalo. E lotu i Vaitele, e aooga fanau i Vaitele, o mea uma lava e fai i totonu o Vaitele, ae a oo ina fai le palota, fai mai ou te fia alu e palota i lo matou nuu. O le a ea le saoga o ia mea? O mea uma lava e fai i i, e nofo i i ma lotu ai i, a oo i le palota ona alu lea e palota i o. O le a so outou finagalo pe afai e oo atu taeao, palota lea o le a sau nei, ae 60,000 le faitauaofai o Salelologa po o Asau vaeane itumalo. E faaopoopo foi sui usufono, o aga o le faatemokarasi lea. Ae le faapea la e nonofo i o ona oo foi lea i le palota, matou o atu lau mai e palota i inei, e tau ina o mai e palota i inei a o mea lava e fai i Savaii. E le o le agaga lena na ala ai ona fai le Tulafono. Ua leva ona foufou mai. O le mea e tatau ona fai, o le mea e talafeagai. A tatou o i Faigamalo eseese, a tatou vaai i Fiti, o Fiti e leai ni itumalo, e tasi lava le mea atoa, one constituency e kava uma ai le atunu atoa ona lua o lea i lepalota. O atu loa lea i le palota, ona faasolo lea o le tagata lava e Malo, pe fia sefulu sui usufono, o tagata na e faia le Malo, i le latou foi lena Faatemokarasi.

A o le auga ma le finagalo lea ua faapea, e afaina le tatou aganuu, e afaina ona o le faigapalota. E matua le lagolagoina e lenei sui usufono. A o le fesili la, a faapea e oo foi i lenei palota ua oo i le 20,000 tagata o Vaitele ma Faleata i Sisifo, ae tasi lava le sui usufono, se mea amiotonu lea mea? O se mea faatemokarasi lea mea. E le mafai ona tatou fesuiaia faapea.

O lea e momoli atu ai le faafetai tele i lau Afioga i le Minisita mo le vaevaega o lenei itumalo, aua o se mea talafeagai ma o se mea ua tatau ona fai. E fuafua i le fuainumera ua i ai nei, ma o le auga tonu lava lena o le fesuiaiga o fuainumera ma le vaevaega o itumalo, e le o se isi lava mafuaaga.

Ma le faaaloalo lava faafetai.

FOFOGA FETALAI: Malo faafetai. Ou te tapa le Malo e saunoa e talifuaitau i mea sa laga e sui usufono mamalu.

Afioga SALAUSA JOHN AH CHING (Faleata Sasae): Lau Afioga i le Fofoga Fetalai. Pe maua se avanoa?

FOFOGA FETALAI: E fautuaina e lelei ona aumai tonu lava mataupu e fitoitonu i le mataupu lea tatou te talanoaina faamolemole sui usufono mamalu.

Afioga SALAUSA JOHN AH CHING: Faafetai mo le avanoa, e le umi foi se manatu, o le tulai atu e faaali se manatu o Faleata Sasae e lagolagoina le Tulafono e pei ona aumai. O le auliiliga o le Tulafono, o le a se i oo atu i ai i le Komiti i nai nisi o pitonuu ma tulaga faapena. Ae e fia tautala i le aotelega o le Tulafono lenei. O le Maota lenei o Samoa, o i e lea e fai atu ai Tulafono. O le Maota foi lenei e tatau ona taulamua i le tausia ma le tausisiga o Tulafono. O le mea lea sa ou matauina ae ou te le i oo mai i totonu o le

Palemene, e ese le tele o le faaletonu i solitulafono i taimi o Faiga Palota. O le Tulafono lea ua aumai e le Afioga i le Minisita ma le Matagaluega, faafetai tele. O se Tulafono ua fesoasoani ia te au, ma o i tonu foi lea ua ou matua fia sui usufono ai lava. Ona o lea ua maua uma i mea nei e lua, le Faatemokarasi ma le Faakerisiano. O le aotelega o le Tulafono lenei, o le a aveese ai ia faiga faatosina ma aveese ai le lamatia o sui a usufono i le solia o le Tulafono. O i foi o lea foi o le a fesoasoani ia tatou e pei ona taua e nisi sui usufono, e maua ai le faatemokarasi i fuainumera. O le manatu foi o lenei itumalo, o le a taatia le fuainumera se i i ai se taimi tatou te oo atu lava i ai, ae tatau lava ona i ai se mea tatou te amatamea ai. Tatou amata atu ia i i ia ona tatou faasolo ai lea. A o le aotelega lena o le manatu o lenei itumalo, amiontu le Tulafono lenei, e fesoasoani i le faipule i le lumanai aloalo ese mai i le Tulafono. O le tatou tatalo lea tatou te tatalo ai i aso uma i le tatalo a le Alii, o lo o tatou tatalo foi i le Alii, ia taitai ese i tatou mai mea e i ai faaososoga. O le isi lea vaega e teletele le faaososoga pe a le faatinoga le Tulafono lenei. E tele tele faaososoga e aafia ai tatou. O lau la tilotilo i ai i lenei Tulafono, e puipuia ai sui usufono, e aoga mo tatou , e aoga mo a tatou fanau mo le lumanai le Tulafono Tau Faaofi lenei.

Faafetai i lau Afioga i le Fofoga Fetalai mo le avanoa.

FOFOGA FETALAI: Faafetai. Tulai mai le sui usufono mo Vaisigano Nu. 2.

Afioga TAPULESATELE MAUTENI TAMASONE METULI II ESERA (Vaisigano Nu.2): Faafetai i lau Afioga i le Fofoga Fetalai, e faafeiloai atu foi i lenei itu i lau Afioga i le Taitai o le Malo, faapea le Sui Palemia, Minisita ma Minisita Lagolago i lenei foi itu. Afifio foi o Faaululuga o Matagaluega ma Faalapotopotoga, Susuga i le Failautusi ma le Ofisa o le Fono.

E puupuu lava ia ni tulaga laiti e fia fai atu i ai ni faamatalaga. O le mea muamua lava e lagolagoina malosi lava e lenei foi itumalo le tulaga e pei ona aumai, i lenei foi Tulafono Tau Faaofi, e Soloia ai le Tulafono i Itumalo Faaalalafaga 1963, suia i le Tulafono Itumalo Palota 2018.

O le tulaga muamua lau Afioga, e faafetaia e lenei itumalo le fuafuaga e pei ona i ai le Tulafono. E muamua le faafetai i le Afioga i le Minisita ma le aufaigaluega, i le tulaga e matauina lava le maopoopo ma le mautu. E i ai la nai vaega laiti ia na ona fia avatu lau Afioga. O le tulaga muamua lava e pei o lea e matauina lava i le tatou faatalanoaga ma tulaga foi faapena, saunoa le Taitai o le Malo, i le tulaga lea faapea o lea lava ua ia i tatou le malosiaga e mafai ai ona tatou suia ia ni Tulafono, ona faapea lea o se manatu, e mulimilitai lava e pei ona saunoa ai ia le Afioga i le Palemia. E aumai lava i lumamea nei, tatou te soalaupule i ai ia ona i ai lea o se tulaga e talafeagai se suiga ia ona faapea lea ona faatino.

O nai vaega la ia o lo o fia agai i ai le faamatalaga lau Afioga o le tulaga lea e faamuamua atu ia le... o si ou lava itumalo ia ma le tulaga lea ua i ai, e leai ma se mea o afaina ai, aua e i ai foi le talitonuga, e talanoa foi i nai isi o toeaina o le itumalo, i le vaiaso ua tuanai ma nai isi foi aso i tua atu. Ia e lagona lava le fia faafetai i le faigamalo ma le tumau ai o Vaisigano Nu.2, nai o matou nuu o Papa ma Vaivaimuli ma Fagasa. E pei o le tulaga lea e fia faalautele atu pea ona o le fiafiaga foi ua i ai.

O le tulaga e pei ona faataua mai i lenei Tulafono, e pei o mea e uiga i tulaga ia e i ai, o tulaga i eleele, o fanua foi o lea e i ai lea nuu ma lea nuu, lea itumalo ma lea itumalo. O lo o faataua foi ia le tulaga i tagata i lea itumalo ma lea itumalo. O tulaga ia e talia uma lava ia tulaga ia, ma e i ai le talitonuga, o lea ua maea lelei lava lenei faaiuga ua fai, i luga o tulaga ia faatasi ai ma isi vaega o le a le oo i ai se faamatalaga, ae o si vaega lea, e avatu ai pea se fautuaga po o se talosaga, o lea ua tulai mai lava le tulaga lea e pei foi ona ou faailoa atu le finagalo o le Taitai o le atunu, i tulaga na o le a lava le mea e soalaupule ma agai i ai finagalo, e mafai lava ona toe suia.

O le tulaga lea i le aofai o faipule i le motu o Salafai, e i ai le manatu foi lea e agai lava e pei e faaituau foi le manatu o lenei sui usufono ma lenei itumalo ona o tulaga faapea. Afaí o le a se finagalo e toe sui le tulaga lea mai le 20 i le 21, o lea ua faafogofa lava lau Afioga ma le Palestina nei, i finagalo e pei ona faaaliala e Gagaemauga Nu.3. Ia tumau lava ia le sui faipule mai Saleaula, e pei o lona finagalo lea i le itumalo faapalota e pei ona i ai nei. Ae atonu lava o le a ou avatua foi le isi tulaga lea i totolu o lenei faatalanoaga, ina ne i te i ua i ai se finagalo i le iloiloga foi pe a oo atu i le taimi e toe iloilo ai e le Komiti, afai lava o lea e tau tulituli le... e le toe oo lava se faamatalaga ia Salamumu ma Leauvaa.

Ae i le itumalo lea o Faasaleleaga, le itu foi lea i Safotulafai, o le itumalo lea palota 34, Faasaleleaga Nu.3. E i ai se manatu a faapea i le tulituliloa lea o le sui usufono lea e tasi ina ia tumau pea le aofai le aofai lea a Savaii, pe a se finagalo o lau Afioga ma le Palestina, ae avatu ai ma le manatu lea, i le tulaga lava lea a ou faitau atu o lea e tele i tulaga foi ia e tele eleele ma nuu ia ma tulaga o le aofaiga. Pe le talafeagai la le aumai ai i i, tulou lava foi le finagalo e pei ona faaaliala, e le sui usufono o Gagaemauga Nu.3, ia aemaise foi sui usufono o le Palestina nei, ae avatu lena i totolu, ina ia... po o le a se faafaigofie o i ai, pe mafai lava ona tumau le aofaiga lea o sui faipule. E i ai foi la ia faiga faigofie i le itumalo lea, e fuafua i ona nuu ia e i ai. O la foi ou te maitau atu, e tau i ai le mea foi lea, e tau ese foi lau faitau i le faaupuga o le isi mea na e sau ai, ae e i ai lava ia faiga e mafai ona fai i ai. E pei la lau Afioga o le tulaga lena e taatia atu, ia po o le a se finagalo o lau Afioga foi ma le Palestina nei.

O le, se o isi mea ia se e le i oo i ai... O le mea mulimuli, o le isi vaega laititi lea e fia fai atu ai sau faamatalaga foi lea i le tulou le itumalo lea o Salega, lea sa ou vaai atu ai i i nei, saunoa foi i le tulaga o le tatou Tulafono Tau Faaofi i lenei aso. Ae i lau maitau atu i le itumalo lea palota 46, Salega 1 pe a agai atu lenei mataupu i le Komiti Faa-Palestina, e i ai ia si pitonuu, nuu foi ma si pitonuu foi e faataua e i ai foi nai isi tulaga e pei ona i ai ia totolu lava o itumalo ma va o itumalo. Pe le silasila pe mafai ona i ai ma le nuu lea po o le pitonuu foi e tau ai i isi taimi, o Siuvao.

Ia e pei o nai mataupu ia e fia fai atu ai se manatu, ia manuia tele le fonotaga i lenei foi aso i lena Itu lau Afioga i le Palestina, Sui Palestina, Minisita, Sui Minisita, ia lenei foi Itu, le Ofisa ma le Failautusi ma le mamalu o le Palestina nei. Manuia tele lenei aso.

FOFOGA FETALAI: Faafetai, Malo, faafetai.

Tofa AUMUA ISAIA LAMEKO (Falealili Sisifo): Lau Afioga i le Fofoga Fetalai...

FOFOGA FETALAI: Masalo pe toe pau lea o le sui usufono, toe toa fia? Tasi, lua, tolu, ia fa, e toe toafa sui ususono ia e mautinoa e saunoa. O le sui usufono o Aana Alofi Nu.2., ia ma le sui usufono mo Palauli le Falefa, faapea foi Faasaleleaga Nu.2 le Afioga ia Pau ia ma le sui usufono mo Falealili i Sisifo. Ia o latou lava ia o le a maua avanoa e le umi foi avanoa ona e fua i le tatou galuega ma lafo e pei ona faatuina mai.

Ae o le a faataatiae Galuega a le Fono Aoao mo lana malologa mo le 15 minute faafetai.

Na faataatiae felafolafoaiga a le Fono Aoao mo lana malologa masani i le itula e 1:30 i le aoauli ma toe faaaauau i le itula e 2.05 i le aoauli.

FOFOGA FETALAI: Ou te toe faasilasila atu ua toe amatalia Galuega a le Fono Aoao Faitulafono. Ia malo le onosai, malo foi le faatoatoa, e faaaauau ai ia le tatou galuega.

Ia e faia le malologa o tutulai mai sui usufono ia e toafa e fia saunoa, ia e i ai le manatu e fautuaina e alolofa sui usufono mamalu e agai tonu lava i le mataupu o lena e te fia saunoa i ai, e faasaoina ai foi ia le tatou taimi, ona o lo o i ai foi ia le isi tatou Tulafono e faamoemoe e tagofia faatasi ma le tatou Tulafono Tau Faaofi lenei.

Ia e tapa le sui usufono, tulai mai le sui usufono mo Falealili i Sisifo.

Tofa AUMUA ISAIA LAMEKO: Faafetai i lau Afioga i le Fofoga Fetalai mo le avanoa, faafetai foi ua maea sina mafutaga faasiliga malosi i lenei itula o le aso.

I le vaavaai ai i lenei Tulafono lau Afioga i le Fofoga Fetalai, e tolu lava autu o lo o faatulaga mai ai, e pei ona saunoa foi le Taitai o le Malo. Ae o le vaega lea e manatu e tatau ona ou laga, o le vaega lea e fuafuaina ai igoa o itumalo palota, e aofia ai nuu maoti, ma pitonuu.

Ia le paia o si ou itumalo, le paia le Alalagafa ma le la Nofo i Tulafale ma le Tauanaeseese ia Falealili, ia na vaeluaina ia le tatou itumalo talu mai le Tulafono i le 2015, i le teuteuga o le Faavae, lea sa silimusa ai le Malo, e faataua ana faiga faavae, ia manino taiala, tasi le tagata, tasi le Palota. O lona uiga la, e le o se mea fou, o lou lea manatu, ua leva lava ona faataatia mai le alafua, e sui ai le igoa, ma le igoa faa-alalafaga agai i le igoa faa-palota.

Ae i lou itumalo i Falealili i Sisifo, ou te talosagaina lau Afioga i le Minisita i le lumanaia, a faapea e fuafua e toe fetuunai, e 8 nuu maoti o lo matou itumalo. O le nuu o Saleilua, o Poutasi, o Vaovai, o Matautu, o Tafatafa, o Malaemalu, o Satalo ma Sapunaoa. I totonus o le pepa o faamatalaga, o lo o taua ai le pitonuu o Piu, e na o sina faasaoga lava, a faapea lava ua tatou o i nuu maoti, na o nuu maoti lava. O lo matou nuu i Sapunaoa, le Paia o le latou Toafa, Susu Patea ma Leusoalii, ma lotoifale o Manusamoa, e tolu lava pitonuu maoti. O Sapunaoa, Faleulu ma Piu. Ia ou te talosaga atu e aveese le igoa o Piu, ae tuu i ai na o Sapunaoa.

Ia lau Afioga i le Fofoga Fetalai, e pau ia o nai manatu, manatu e tusa ma lenei Tulafono faafetai.

FOFOGA FETALAI: Malo, tulai mai le sui usufono mo Aana Alofi Nu.2.

Tofa ILI SETEFANO TAATEO TAFILI (Aana Alofi Nu.2): O lea ua maea ona paleauau ma matu i fau le tautega, sa feagai ai ma le Fono Usu a Samoa, i lau Afioga i le Taitai o le Malo ma le Kapaneta, tali foi le sua i faipule o le Maota nei.

E le faaititia le agaga faafetai i lau Afioga i le Fofoga Fetalai, malo le onosai ae faafetai foi i le tapenaga o lenei aso awa se sailiga malosi a le Fonousu a Samoa. Ia a o le i faia se faamatalaga e faatalofa atu foi i le tapuaiga a si ou itumalo o Aana Alofi Nu.2. E seasea foi ona tulai le sui usufono, a o lenei itula ua lagona foi e tatau ona avatu se leo e tusa ai ma lenei mataupu e pei ona tapisa ai le Fonousu a Samoa, le Tulafono Tau Faaofi o Itumalo Palota 2018.

Ou te manatu o le auga ma le ute o le Tulafono e pei ona i ai e pei lava o le manino o le ao mai le po, i le saunoaga faamalamalama a le Taitai o le Malo. Ia faapea foi ona fono faapipii le Afioga i le Minisita e fitoitonu i ai lenei Tulafono, i nisi o faaopoopoga e pei ona i ai. Matou tulai la ma le agaga faaaloalo, e lagolagoina e le sui usufono ma le itumalo lenei suiga e pei ona i ai awa e maua o lea foi sa i ai se tasi o tamalii o lo matou itumalo sa i ai i le tapenaga o lenei faamoemoe.

Ae na pau lava se lagona foi e avatu i lau Afioga i le Minisita ma le Matagaluega e tau ala atu i le Fofoga Fetalai, o le itumalo palota e 15, o lea ua tulai mai ai ia lou itumalo ia Aana Alofi sa Numera 2, ia o lea ua Numera 3. O lea ou te tilotilo atu i le lisi lea e sau i i, e 3 nuu, o Leulumoega, Leulumoega tuai ma Nofoalii. Ia mo le silafia e lau Afioga i le Minisita e na o le 2 lava nuu, ne i limataitaiina sese ai se tasi faapea e 3 nuu o lou itumalo, ia ae na o le 2 lava nuu, na o Leulumoega ma Nofoalii.

Ia na pau lea o se motugaafa e avatu lau Afioga i le Fofoga Fetalai, e tusa ai o lenei Tulafono Tau Faaofi e pei ona tapisa ai le tatou fonotaga i lenei foi aso. Ia a o le i faamaea sa matou faamatalaga, ia na o se lagona vaivai lava e tuu tuu atu i autafa o lau Afioga i le Minisita, talofa e lagona foi le leo i Rama i le tagi mai o Salafai, fea o i ai le tofa, ia ae faatumauina pea ia nofoa o Salafai e pei ona i ai. Ia o lea se manatu, manuia le Fonousu a Samoa, faafetai.

FOFOGA FETALAI: Malo, tulai mai masalo toe pau lea o le sui usufono. Tulai mai le sui usufono o Palauli le Falefa. Oi, sorry, o Faasaleleaga Nu.2, le sui usufono mamalu, tulai mai le sui usufono o Faasaleleaga Nu.2.

Afioga PAU SEFO TAUMATA PAU (Faasaleleaga Nu.2.): Lau Afioga i le Fofoga Fetalai, faafetai mo le avanoa ua tuuina mai se i avatu foi se sao o lenei itumalo, e uiga i le Tulafono.

Ua uma ona maea ona sausaunoa le Taitai o le Malo le Afioga i le Palemia, uma foi ona fofola mai e le Afioga i le Minisita ia le Tulafono lenei. O manatu e fia faaalia e le o se tuaoi, o le manatu e avatu ona e agai i le Nofoa o Salafai e pei o le a faamaui atu, e pei o le vaega lea e avatu ai se vaega laitiiti. O lea ua maua atu ona o le tualga lava ia o itumalo ua le tele ni tagata pei o le Lola lea. Ae i ai le manatu sa tele ni tausaga sa faalogologo ma le totoa mai ai, sa taumafai lava lenei itumalo sa nofoia le nofoa, sa talosaga lava lenei itumalo mo se sui usufono faaopoopo, ma sa saili foi ma fai nai suesuega, o le

mau lava faapea o le itumalo lea o Faasaleleaga o lo o i ai le afioaga o Sa Malietoa ma Safotulafai. A o e na faataoto le Faavae, o lea lava na aumai manino Faasaleleaga Nu.2, lea foi la e manino ia te au i le taimi lenei i tulaga lava ia o lo o sau ai mai ia Paeaiga e tele pei ona ou avatua, o lea lava e manino Faasaleleaga Nu.2 o lo o i ai nuu mavae ia o Safotulafai ma Sapapalii. Peitai ane o lenei Tulafono Tau Faaofi, e avatu manino lava, afai o le Tulafono Tau Faaofi lenei ona ua faaitiitia ma aveese le nofoa lea o Safotulafai e tasi, ai ona o le tatou tilotilo i le lola palota ma le faaitiitia o lola. A silasila lau Afioga i le palota talu ai i le fa Paeaiga, o lo o tumau lava le lola a lenei itumalo i se fuainumera o lo o gafatia lava ona tauave ni sui i le Tulafono lea ua aumai. Pe le talafeagai ona se i silasila le Afioga i le Minisita, afai ua aveese le isi nofoa o lea itumalo, pe le mafai ona faaofi mai i le Faasaleleaga ina ia ono ai Itumalo Palota, Nu.1, Nu.2, Nu.3, Nu.4, Nu.5, Nu.6 lea o Faasaleleaga ae aua ne i aveesea le Nofoa lea ma Salafai.

E pei o le fesoasoani atu lea i le Tulafono Tau Faaofi. Se i toe silasila totoa le Minisita pe ono talafeagai aua o lea foi sa maua i se tasi foi o sui usufono, o lea lava na ia avatua i lau Afioga. Pe le talafeagai afai o saili se itumalo e ave agai i ai le sui lea, se i silasila ane lava i le Faasaleleaga Nu.2 po o le Nu.3, po o le Nu.4, ona atoa ai loa lea o itumalo ia faapalota i le ono. O le mea la lea e tatalo atu ai i lau Afioga i le Minisita, o lea lava e i ai le talitonuga o le sui usufono o lo o faalogologo mai lou itumalo, ia tapuai mai pe liiliu le tofa i le Afioga i le Minisita ma le Malo ona see mai lea o le isi tasi lea ina ia faatumauina ai pea le nofoa lea o Salafai, pe agai foi le sui e faaopoopoina ni sui se lua i inei. Ia o le tatalo atu lea, a o le Tulafono Tau Faaofi, afai e faaopoopoina pe tumau le sui lea o Salafai, e matua lagolagoina lava lenei Tulafono Tau Faaofi. Ma lou faaaloalo lava. Ia manua le Fono.

FOFOGA FETALAI: Malo faafetai saunoa i lau Afioga i le sui usufono mamalu. Ia, e vaai atu o lea faapea toe tasi le sui usufono e saunoa ae ua leva ona mumu ai le moli a Falealili. Ia tuu atu le avanoa Falealili ae faai i le saunoaga a Palauli le Falefa, o se tasi o Sinia o lena itu o le Maota.

Afioga FUIMAONO TEO SAMUELU TEO (Falealili Sasae): Faafeai i lau Afioga i le Fofoga Fetalai mo le amanaia o se faatalauula, a ua lagona lava le ava i le Nofoa ma alofa atu. Talu ai ona o lenei Komiti o lea e fitoitonu i ai le Tulafono Tau Faaofi lenei, ia o le a sefe le lagona ma ni manatu se i oo atu le Lipoti a le matou Komiti. A o le lagolagoina ia o le Tulafono, o le a faaleo atu. O le a tuu nisi motugaaafa a le sui usufono mo Falealili Sasae ona o lea e taulimaina le Tulafono a lenei a le matou Komiti. Ia manua le tatou Fono. Faafetai.

FOFOGA FETALAI: Faafeai lava. Malo le finagalo malamalamama i le sui usufono mamalu. Tulai mai loa le sui usufono mo...

Tofa Hon Lauofo Fonotoe Nuafesili Pierre Lauofo (Anoamaa Sisifo): Lau Afioga i le Fofoga Fetalai, e le atoa se minute, malie lou finagalo.

FOFOGA FETALAI: Ia, tulai mai le sui usufono mo Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO:
Faafetai lava mo le avanoa. Na ona ou tulai lava e faamauina le agaga faafetai i le Afioga i le Minisita o la e faafofoga mai lou itumalo ai o taumate mai po o i ai se suiga. Le tatou itumalo, e leai lava se suiga, e tumau lava, o le tatou vanonofo ai ma le vafealoai, e leai se mea o suia. O le mea lea, ia manuia le tapuaiga.

FOFOGA FETALAI: Malo faafetai. Ia saunoa ia lau Afioga i le sui usufono mo Palauli le Falefa.

Afioga Hon FAUMUINA TIATIA FAAOLATANE LIUGA: Faafetai lau Afioga i le Fofoga Fetalai mo le avanoa, faafetai foi i le Afioga i le Minisita mo le Tulafono Tau Faaofi. E tasi lea vaega sa ou taua i lau faamatatalaga i le taimi sa tuuina mai ai le teuteuga o le Faavae, o le faaopoopoina lea o Nofoa e tolu i Upolu ae aveese mai le Nofoa e tasi mai Savaii. Lau Afioga i le Fofoga Fetalai sa ou tuualuga atu ai, e i le tatou Malo le Afioga i le Palemia ma le Kapaneta aemaise o le Minisita e fitoitonu i ai lenei Tulafono ina ia taofia pea le Nofoa lea mo Savaii ma tumau ai pea i le 21 Nofoa mo Savaii, po o fea lava le itumalo e mafuli i ai le faitauaofai, a ia faapena ona taofia pea le tulaga o i ai nofoa o le Palemene mo le motu i Salafai.

Ae faafetai o lea o le a see atu foi le Tulafono Tau Faaofi i le Komiti e pei foi o le Tulafono o le suiga o le Faavae o lo o taatia nei i paga, aua le faafoeina o fesuiaiga o le tatou Tulafono o Faiga Palota.

O le tulaga foi i le suiga o tuaoi o itumalo, ou te iloa pei e tau silafia e le Minisita, e talanoa loa i mea nei o tuaoi, o tuaoi le isi vaega o le soifuaga o tatou, e ola lava le tagata na te suia mea o tuaoi, a ua ola faalautagitagi. Aua e lua lava mea e oti ai le Samoa, o le tuaoi ma le alu fua i le toalua o le isi tagata. O lea la lau Afioga i le Minisita, o le isi mea ou te fia talanoa i ai, ua pei o le faanumeraina o le au lakapi a le Manu Samoa le faanumeraina o itumalo. Ia, ou te iloa leaga o lea e te fiafia i le taalogia o le lakapi, ae sa manaia lava le faaigoaina o itumalo sa i ai ae sui pea i itumalo faapalota po o itumalo palota le tulaga lea.

O le isi vaega ou te fia fesili ai i le Afioga i le Minisita, o le tele o itumalo lea ou te vaavaai atu ai i i, o mea o pitonuu ma nuu e le ni nuu mavae. Pe i ai la ni criteria po o tuutuuga o agavaa e mafai ai e nei pitonuu ona avea ma sui tauva o faiga palota. Aua afai e leai ni faiganuu o faia i i, ia o lona uiga e leai se monotaga faalenuuo faia. O le mea la lea e fesili atu ai i lau Afioga i le Minisita, se i e silasila lava i le vaega lea, aua mo se faataitaiga, o lou itumalo palota lea e i ai nei, na o Apia lava le nuu mavae lea e i ai, a o le tele o pitonuu, ia o lona uiga, e leai lava se isi e mafai ona qualify i mea ia, se i vagana lava le afioaga o Alosina, Fuaifale Salevalasi, le Faletolu ma upu ia Tuisamau. E pei o le fesili lea, leaga e i ai foi isi afioaga o lea e tele i pitonuu, e pei lava foi ona maua i le tele o saunoaga a nisi o sui usufono mamalu le tulaga lea i le agavaa o sui tauva ina ia mautinoa lelei e agavaa tagatanuu uma o Samoa, aua o lea ua tatou talanoa i le democracy. Afai la o le democracy lea tatou te alu ai, e toatele la pitonuu e ono le agavaa o latou matai e tauva ona e i ai tuutuuga e tatau ai ona agavaa.

O le isi vaega lau Afioga e tatau pea ona tuualalo atu i lau Afioga i le tulaga lava lea o le vaevaeina o Itumalo Palota, o lea ua ou vaavaai atu ua ave le isi

nuu mavae o lou itumalo i le isi itumalo a o la e i ai le nuu la e misi i le va o nuu ia e lua, o le taulaga fou i Salelologa. O lona uiga, taatia pea le itumalo o Palauli le Falefa ae faaopoopo le taulaga fou i Salelologa, ae tuu pea Tafua i o i Palauli le Falefa, se i vagana ua i ai se tau e faaopoopo i tupe alu a le Malo pe a nofo pea Tafua i Palauli le Falefa. O le fesoasoani atu lea i lau Afioga i le Minisita, faamalo mo le lototele i le faiga o lenei Tulafono Tau Faaofi. Faamalo foi i lou laufogfa fiafia, e ui lava ina tau felaasai atu foi a matou tala, ae o lea matou te iloa, e malu atu lava i le tatou Malo aemaise o la outou saofaiga. Ia faamanuia le Atua i lau Tulafono ia faapena foi ona i ai le malosi e te faatinoina ai lenei Tulafono Tau Faaofi, i ni auala e tusa ai ma le finagalo o le Atua.

Lau Afioga i le Fofoga Fetalai, faafetai mo le avanoa.

FOFOGA FETALAI: Malo faafetai. Ia, o lea ua soo taiao ma ua faapena foi ona maea sui usufono sa tutulai mai e fia saunoa. Ia, o le avanoa lea o nisi o mea sa laga e sui usufono mamalu e saunoa i ai le Malo, a leai, ia o lea lava e fai ma tali faamalamalama le Malo. Ua ou manatu foi ua maea ina faamalamalama le tele o nisi o mea sa laga e sui usufono mamalu. Ou te tapa pea lau Afioga i le Minisita.

Afioga Hon FAAOLESA KATOPAU T. AINUU: Faafetai i lau Afioga i le Fofoga Fetalai mo le avanoa. E leai sau tali tele e avatua. Na pau lava nai mataupu ia e fia tuuina atu i lumamea aua le talifuaiteau i manatu ua folasia, ua tau oso mai le manatu foi lea pe sa tatau ona ou fautuaina le Afioga i le Palemia, ona o le tele o manatu ia ua faaalia, e tatau ona tusi ni a tatou Tulafono se 49 ona tofu lava lea o le itumalo ma lana Tulafono. Ae ui i lea, leaga o lea ua taatia mai le Tulafono i luma o le Laulau a Fono. E pei o le mea lea ou te tau momoli atu i le paia ma le mamalu o le usugafono a Samoa, a taumafai lava le sui usufono latou e aputiputi lona ia itumalo mo lona ia benefiti, e leai la se tatou mea e maua. O le mea lea ou te fia tau atu, a faapea e amanaia e le Faigamalo se tuualalo ua aumai e le usugafono, e tatau ona fai uma lava i itumalo, e tatau ona roll back uma le tatou Tulafono Tau Faaofi, ona leai lea o se tatou Tulafono, ona tumau lava lea o tatou i le mea e tasi. A o le mea lea e tau saili atu i le Tulafono Tau Faaofi lenei, e le o se manuia o se itumalo e toatasi pe toalua pe toatolu, o le manuia o Samoa uma lea le tau saili atu. E pei o le manatu maualuga lena o le Palemia ma le Kapaneta ma le Faigamalo na momoli mai ai lenei Tulafono Tau Faaofi aua se tou manatu, a o lea ua faamauina uma lava atugaluga sa fofogaina e lea sui usufono ma lea sui usufono, o le a toe silasila i ai le Ofisa ona tuuina atu lea i le Komiti, aua o lea e alu foi agai i le Komiti le Tulafono Tau Faaofi. Ma le faaaloalo lava.

FOFOGA FETALAI: Malo faafetai. Se i tulai mai lau Afioga i le Palemia.

Susuga Hon TUILAEPA AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e momoli atu le faafetai tele i sui usufono na sausaunoa. O le agaga o le Malo ia oo atu i le tausaga fou 2019 ua tele ina masuiga malie le Tulafono Tau Faaofi lenei, ona e tatau ona tapena mamaao le tatou Ofisa mo le Palota o le 2021. O lea la ua tapena

mamao. E mafai ona faapea, e sili atu ona tele le sauniga i le toe teuteuina o le Tulafono Tau Faaofi lenei nai lo le teuteuga talu ai i le tausaga na tea nei.

O le vaega lea i pitonuu po o nuu, o le mea lena e mafai foi ona silasila i ai itumalo. Ae pau o lenei, e i ai itumalo e le o agai foi lele i pitonuu, e pei o lea e mulimuli foi i le itumalo faa-tusigaigoa. Ae i ai mea ua tutupu ona e i ai nuu e tai pei la o Sapunaoa, e i ai foi a latou misaga la e fai i totolu o latou lava itumalo, ma oo ai i tai i le Faamasinoga o Fanua ma Suafa pe tatau ona i totolu le pitonuu lea pe leai. Na o le pau lava lenei, e i ai foi mea faapena e tutupu i lou nuu, o lea e misi atoa lava Lealatele. A o i ina tonu i Lealatele i le pitonuu lea o Aloalii, o lea ou te matai mai ai, a o le mea la e tupu, o lona faalupega o Alaalamalae. Sa ou le faatauaina foi lele ona ou te le faatauaina mea foi nei e foliga e laiti, faatoa ou faataua lava ina ua oo i le taimi foi lele o tufaga meaai ina ua oso mea ia o afa ae avatu meaai, ae leai se matou pitonuu, ia ona fai lava lea i le va lelei i totolu o le nuu ia fuafuaga mamao mo le tufaga o meaai, lea e ala ai ona ou fautuaina le itumalo lenei e aumai lava a latou misaga i totolu o mea faapea, se fai i tua a outou mea, o mea na faaleaganuu. A o mea faapalota mea ia e fai nei, i tei foi ua oso mai se isi afa tele ia ona alu atu lea o tufaga meaai ona misi ia na nuu. Ae le o ni aga a le Malo o aga a outou i le tou loto e le lelei ma le 1 fealofani, ia ma le ave a o le tagata ia i luga i le lagi e le fia o i lalo.

Lau Afioga i le Fofoga Fetalai pei o le tulaga lena e le o se agaga leaga na fau ai le Tulafono ae o le agaga lelei. Ia ae o lena foi e matau atu e iai a nai a outou mulumulugaveve o lena e fai i totolu o le tou pausisi. A o lea ua fofola atu le agaga o le Malo, o le mea lea e vaavaai i ai le Malo o le bigger picture, o le vaai mamao ma le vaai lautele. O vaaiga na o le vaaiga e te tu i le tumutumu mauga ma e vaai, a o le vaaiga e puupuu, o lau vaaiga foi lea e te tu i auvae mauga na o le pau a le mea e oo i ai lau vaai na o tafue, tafue o laau e le mamao.

Lau Afioga i le Fofoga Fetalai, pei o le tulaga lena e toe aveatu ai se faafetai i le ooooga na oo i ai ia le faaaliga o finagalo ia a o lea lava e tele le avanoa. E tausaga atoa e tuu atu ai i o a uma ona teuteu muamua, toe teuteu lua, a uma ona toe teuteu lona lua e vaai atu e sese foi le teuteuga na fai muamua ia toe teuteu faatolu, faatolu ona teuteu. A tou vaai atu lava o la e na sao lava ia le Minisita, ia ona tou toe o loa lea e faatoese, o lea ua matou iloa nei o le mea lava na aumai le Atua le Tulafono e pei ona iai. Ia ona aumai a lea o si a tatou mea lea e leai se teuteuga.

Lau Afioga i le Fofoga Fetalai ia o le toe faaopoopo atu lena.

Tofa Aumua Isaia Lameko: Lau Afioga i le Fofoga Fetalai.

FOFOGA FETALAI: Malie le sui usufono, o lea ua tatou see atu e tali le Malo, sa tatau ona vave tulai mai, malie le sui e see i luma le tatou galuega.

Na faamaonia le lafo ma faiatauina le Tulafono Tau Faaofi o Itumalo Palota 2018 i lona faiatauga faalua.

FOFOGA FETALAI: E tusa ai ma Tulafono Tumau, o le a tuuina atu le Tulafono Tau Faaofi i le Komiti o Tulafono Tumau, Mataupu Tau Faiga Palota, Talosaga ma Tofiga Faale-Faavae mo le iloiloina ma toe lipoti mai i le Fono Aoao i le fonotaga e sosoo ai.

TULAFONO TAU FAAOFI O FAIGA PALOTA 2018 – faitauga faalua

Afioga Hon FAAOLESA KATOPAU T. AINUU: Lau Afioga i le Fofoga Fatalai ou te faatu le lafo, *Ina ia faitauina nei le Tulafono Tau Faaofi o Faiga Palota 2018 i lona faitauga faalua, ma ou te fia tautala faamalamalama iai.*

Faaluaina e le Minisita mo Fesootaiga, Faamatalaga ma Fesootaiga Vavave Faaneionapo ma le Minisita mo Aoga, Taaloga ma Aganuu.

FOFOGA FETALAI: Ou te tapa lau Afioga i le Minisita e tulai mai.

Afioga Hon FAAOLESA KATOPAU T. AINUU: Faafetai i lau Afioga i le Fofoga Fatalai. Lau Afioga i le Fofoga Fatalai ma le mamalu o sui usufono, o lenei Tulafono ua tuuina mai e soloia ai le Tulafono o Faiga Palota 1963, o se tasi lenei o Tulafono tuai o lo o faaAogaina pea ma sa tele ni teuteuga sa faia i ai i tausaga ua tuanai atu. Ae peitai e le i i ai lava se iloiloga maumaututu i le Tulafono atoa, o lea la sa faatinoina ai le iloiloga atoa o lenei Tulafono i luga o le fautuaga na tuuina mai i le Lipoti a le Komisi Suesue na suesueina le mataupu na aliae mai i le Faiga Palota Tele o le 2016. Ia faapea ai foi le Lipoti a le Komiti na tofia e le Kapaneta lea na iloiloina fautuaga a le Kapaneta e le gata i ni suiga ua alagatatau i le Tulafono o Faiga Palota 1963 aemaise ai le toe fetuunaiga tau Itumalo Faapalota.

O le tele o suiga sa faia i le Tulafono i le maea ai o le Faiga Palota i le tausaga 2016 ua oo ai i se tulaga ua le ogatasi ai nisi o vaega tuai o le tulafono ma vaega fou na faia mulimuli inconsistency. O le ala lea ua talafeagai ai le toe suia atoa i se Tulafono fou e suia ai le Tulafono o lo o i ai nei. O le faiga lenei e mautinoai le toe fetuunai atoa o vaega eseese o le Tulafono i le faagasologa o lo o faatino ai le Faiga Palota mai lava i le resitalaina o Vaega Faaupufai e oo atu i le resitalaina o Tagata Palota, Sui Tauva, Soligatulafono, Faasologa o mataupu i le Faamasinoga ma tuuina mai ai vaega fou o lo o fautuaina mai i le Lipoti ua taua i luga. E faaaogaina ai le gagana e lata i le gagana o aso uma, ina ia faigofie ai ona malamalama le atunu i aiaiga o le Tulafono o Faiga Palota.

I le toe tusiina o lenei Tulafono o lo o i ai lava ni vaega mai le Tulafono o Faiga Palota 1963 o lo o faaogaina pea, ae e iai foi nisi vaega fou ua faaopoopoina e pei ona auililiina atu e faapea;

1. Agavaa o e resitara i tagata palota;
 - (i) So o se tagata ua atoa le 21 ma o se tagatanuu moni o Samoa e resitala i le nofoaga o lo o nofo ai ma se vaega o lo o umia ai se Suafa matai ona iai lea o le avanoa e filifili ai pe lesitala i le nofoaga o lo o nofo ai po o le alalafaga o lo o matai ai.
 - (ii) E na o Sui Tauva ma lona toalua ma lana fanau e mafai ona resitala pe liliu i le Itumalo Faapalota o lo o tauva ai le sui pe afaapea e le o nofo ai i le Itumalo Faapalota pe le matai ai foi le toalua po o le fanau a le Sui Tauva.

- (iii) A faapea o lo o umia e le toalua po o le fanau ni Suafa matai i se isi Itumalo po o se isi alalafaga, e le mafai la ona resitalaina i le Itumalo Faapalota o le a tauva ai le sui.
- (iv) O isi auaiga o Sui Tauva o le a mafai ona resitala i le Itumalo o le a tauva ai le sui pe afai o lo o nofomau ai i le Itumalo lea pe matai ai foi.
- (2). Sefulu tausaga e faatapulaaina ai le liliuina o le resitala.
E faatoa mafai ona toe liliu se Itumalo e resitala ai se tagata pe a faapea ua maea le sefulu (10) tausaga talu ona resitalaina muamua pe liliuina foi pe a pasia lenei Tulafono. O lenei faatapulaa o le a le aafia tagata o le a avea ma Sui Tauva, toalua ma le fanau a le Sui Tauva.
- (3). Agavaa o le liliu.
E mafai ona liliu pe afai e umia se matai ae faatapulaaina i le sefulu (10) tausaga se i vagana ai o se Sui Tauva po o se Toalua po o se fanau a se Sui Tauva.
- (4). Faapalotaina muamua. (Pre-polling).
Tatalaina le faia o se faiga palota i le fa (4) aso a o lumanai ai le aso o le palota tele ina ia mafai e le mamalu o le atunu o le a malaga mai i fafo ma tagata matutua ua penisiona, tagata o iai manaoga faapitoa ma tagata o le a alagatatau ona faigaluega (essential services) ona faia a latou palota.
- (5). O tupe totogi fuapauina e vaega faaupufai.
E \$3,000.00 le totogi fuapauina mo le resitalaina o vaega faaupufai ma le \$1,000.00 le totogi fuapauina mo tausaga uma e sosoo ai. O lenei suiga e faaopoopo i aiaiga o lo o i le Tulafono o lo o iai nei ma o ni aiaiga nei e mautinoa ai Vaega Faaupufai o lo o faaaauauina i le maea ai o faiga palota mai lea taimi i le taimi; Ma o se fesoasoani foi lenei a le Ofisa o Faiga Palota e faatino ai galuega faalauiloa e tauala i Vaega Faaupufai e fua i aiaiga o le Tulafono o lo o faasino tonu i ai.
- (6). Falepalota faapitoa ma palota faapitoa.
Ia taofia falepalota faapitoa sei vagana ai tagata o lo o galulue i le faatinogaa o faiga palota o le a mafai ona faia a latou palota faapitoa i nuu ma alalafaga o lo o galulue ai i aso faipalota.
O le a faamalosia le auai atu o tagata palota i Itumalo po o le nuu o le a palota ai e faatino ai lana palota.
- (7). Fesoasoani i le faiga o palota, faaogaina o tagata Ofisa Sinia a le Malo ma e galulue konekarate e galulue i le faatinoina o le faiga palota.
- (8). Talosaga resitala e faaogaina ai fesootaiga faa-onapo nei.
Faaofiina o le talosaga mai tagata sitiseni a Samoa o lo o sikolasipi i atunu mamao, faigaluega i Ofisa Amupasa o Samoa i atunu mamao faapea ai tagata o lo o faigaluega i galuega faavaitaimi (seasonal workers), e faamauina ai o latou suafa mo le resitalaina e faaaogaina ai fesootaiga faaonaponei e pei o le imeli ma le fax.
- (9). Solitulafono le 1 palota.
O le tiute o le tagata Samoa ua agavaa e avea ma tagata palota ma ua maea foi ona resitalaina o le auai atu lea i le faiga palota i le aso o le faiga palota ma faatino ai ma lana palota. O lona le auai e faatino lana palota, o le a avea lea ma soligatulafono.
- (10). Faitauga o le faitauaofai o tagata Samoa; talu ai o lea ua suia le agavaa e resitalaina ai tagata palota e fua i nofoaga o lo o alala ma papaaao ai, ua talafeagai ai le faatinoina o le faitauga o le faitauaofai o

tagata po o le tusiga igoa (Census) i le tausaga a o lumanai ai le faiga palota tele mo le faamautuina o nuu ma alalafaga o lo o nonofo ai o tatou tagata. O lea faiga o le a faaitiitai ai le faalagolago i sui o nuu lea latou te faamaonia le nofo o se tagata i lea afioaga ma la afioaga.

(11). Faiga faatosina po o faiga faatauvalea.

Faasaina uma so o se ituaiga faatosina e auala i le auai atu o Sui Tauva po o sui o lana Komiti i le aveina o tagata e resitala faapea ma tulaga o femalagaiga mo tagata palota i le aso o le faiga palota.

(12). Faamaoniga o afioaga o lo o nofo ai le tagata.

E ese mai i faamaumauga o le Tusigaigoa e mafai ona faamaonia i le talosaga a se tagata resitala palota e sui o nuu, sui o tamaitai o nuu, Faifeau po o se sui o le Malo.

(13). Faaleaogaina o Suafa Matai.

I le puipuiina ai o measina a le atunuua faasaina le faaleaogaina o se Suafa Matai ua uma ona resitalaina faaletulafono i lalo o le Tulafono o Fanua ma Suafa ona o le Faiga Palota (deregister of a Matai title).

(14). Komesina o Faiga Palota ma le aufaigaluega, malosiaga faaletulafono.

Ua aveeseina uma vaega o le Tulafono o Faiga Palota mo le tofaina o le Komesina ma le aufaigaluega a le Ofisa o Faigapalota faapea ma o latou tiute ae tuuina atu i le Tulafono o le Ofisa o le Komesina o Faiga Palota 2018.

(15). Tapunia o Lola Palota;

Ua suia nei mai le 4 masina i le 6 masina, o le a tapunia le tumau le Lola Palota i se aso faatulagaina e le Komesina a o lumanai ai le aso mulimuli e ono mafai ona fai ai le faiga palota.

(16). Tagi mo moliaga.

Faaopoopoina le taimi mo le failaina o moliaga tau soligatulafono i Faiga Palota mai le fitu (7) aso i le tolusefulu (30) aso ina ia mafai ona lava le taimi e faia ai suesuega ma tapenapenaga o se mataupu o le a tuuina atu i le Faamasinoga.

(17). Tautua faaaauau.

Ua toe teuteuina le tuuina ai o le taimi faatapulaa e faasaina ai ona toe faia se tautua faaaauau se i vagana ai le tautuaina o le Faifeau e se Sui Tauva i totonusi o le 90 aso a o lumanai ai le aso o le faiga palota.

FOFOGA FETALAI: Ou te fesoasoani atu i lau Afioga i le Minisita, ona o le tulaga o le aotelega lena o le tatou galuega pe a tatou see atu i le tulaga o le auiliiliina o le tatou Tulafono Tumau. O lea ua matau atu ua leai se vaega e lei oo i ai lau saunoaga o le faamalamalamaga i ona itu aoga ma itu tetele o le Tulafono mo le silafia e le Palemene. Ia ona ou fesili lea, pe a fa ae alofa maia mo le avanoa e saunoa ai sui usufono mamalu ia ma tuuina atu le avanoa i nisi o mea sa laga aua e toe 1 ga foi lou finagalo lea i le taimi e auiliili ai mea taitasi.

Afioga Hon FAAOLESA KATOPAU T. AINUU: Toe tasi a le vala lea.

(18). Faiga faalauiloa mo faiga palota.

O aua e faatagaina e faia ai le faatosina po o le faalauiloaina o se Sui Tauva o le Maota, o le a maoti lava.

- (i) Tuuina atu o tamai tusi po o mekasini (magazine) e faailoa ai tomai ma agavaa o Sui Tauva
- (ii) Faia ni laupapa faailoilo e faailoa ai ni Sini Autu a le Sui Tauva
- (iii) Fonotaga faalauaitele po o ni folasaga a Sui Tauva e faia i luga o Leitio ma Televise.

Lau Afioga i le Fofoga Fetalai o vaega fou ia ua mafai ona faaopoopo i le Tulafono o Faiga Palota 1963 ae aveese mai suiga (amendments) e fia sa faia i le Tulafono lea ua fausia ai le tatou Tulafono Tau Faaofi o Faiga Palota 2018, e pei ona ia i nei, ma le faaaloalo lava.

FOFOGA FETALAI: Malo faafetai. Ia o le tele a o le tatou galuega lea sa faapupula i le tatou semina faamalamalama e tusa ai ma le tatou galuega, ia a o avanoa foi pei ona tuuina atu ia o lea e avanoa le tatou tulaga faa-Komiti e toe tuu atu iai le Tulafono lenei. Ae iai le manatu o lea foi sa safea uma i finagalo o sui usufono mamalu ia le vaega lenei o le Tulafono i a outou saunoaga lea sa faia i le taeao nei. Ia e le tau fautuaina ae na ona fesoasoani atu, tulai mai ni sui usufono e fia saunoa.

Se i tulai muamua mai le Palemia faamolemole.

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fetalai, e le po malae i tulaga uma ia sa agai i ai le Tulafono, ma e le fou foi ia le faafogafoga a nisi o le toatele o tatou sui usufono i le taumafai o le Tulafono ina ia tagofia tonu lava auala ia e mafua ai ona tulai mai moliaga e faasaga i sui usufono. Ma e afai e moni le agaga lea sa faaalia ia tatou taumafaia ia e faataoto se lautusi fou ina ia taofia ai moliaga e fai, ou te taofi o lea ua aumai i le Tulafono ua le alo lava le Tulafono, e ui lava i le faafogafoga mai e faigata, ae mo sina faataitaiga; e mamafa tele le vaega lea ua na o fanau lava a le sui faatutu. O le taumafaiga ina ia taofiofi avanoa ia e faaofi atu ai ia sui o aiga, sao atu ai loa i ina ma le mau kaseni, alu atu ai ma isi tagata e leai ni piitaga. O le tulaga lena. E ui lava ina silafia e le Minisita ma le latou Ofisa le tulaga faigata ia, a o lea lava ua aumai i le vaitele. Afai lava e moni le agaga lea o le tatou o ia e fai le amiontonu, o le amiontonu tonu lava lea ua agai atu ai le Tulafono. Aua o mea uma lava ia e fai e faipule, e mafua ai ona tulai mai faamasinoga, a o lea e agai tonu mai ai lava le Tulafono, aemaise lava o ituaiga manatu ia e faalautele mai, o matou lava i Matautu po o fea lava le mea matou te nonofo ai, matou te fia o atu lava e palota i Matautu. A o le faalavelave la lena, a suesue auiliili ane tagata ia, e le na o tagata o Matautu ia e o alu atu ai, aemaise lava la le tulaga o palota o fale palota faaopoopo lea e fai i le taulaga nei, le anoano. A saili saili saili ma auiliili lola palota o tagata ia na palota, e maua ai i ina le ova. Ailogia e i ai se isi o tatou e sao mai le mea lena? A ua le vaai puupuu lava le Minisita ma i matou nei i le solitulafono tele na fai i le faaauau pea o nei mea. Aua o le mea moni lava, a tuu lava i le tatou tu ma le tatou aganuu, e tatau lava ona palota lata ita fanau moni ia ita. A o tua atu la o le mea lena, e matua tele lava le solitulafono lea e sao mai ai.

Lau Afioga i le Fofoga Fetalai, e tiga lava ona faigata le mea lea, a o lea lava ua aumai, se i test i i pe moni mea ia tou te fai mai ai, se i tatou faataoto ia se faiga fou ia uma atu ae leai ni moliaga o tatou.

E i ai le isi tagata lelei lava e leai ma se isi e masalomia na ia solia se Tulafono, ona uma loa lea o le Tulafono, e tele galuega lelei sa i ai. Ona fesili loa lea i ai o Tofilau, -e a mai le palotaø, -O au lea e malo.ø -E ono i ai se moliaga o oe?ø -Oi e leai.ø Ona fai atu lea o Tofilau, -Vaai oe uso, o au nei ua toeaina i le mea. Ne i te i lava ua e faapea e leai se isi, se alu e toe mafaufau, alu e toe mafaufau. Afai o i ai sina tamai mea, o si tamai mea lava lena e te ono TKO ai. A o lea e maua le avanoa, toe o ni nai aso tapuni moliaga, a ua ou faalogo o lena ua sauniuni lau keni sa outou o e molitu oe. Ia ona nofonofa lea o le sui lea faapea, oi, e sao, o le a tuu ia lou fia amiontonu ae o le a ou alu e fai le mea lea. E le i vivini moa a ua tootuli i luma o le fale, o le isi mea, e tetei le ulugalii i le vaai ae o lenei lava e tootuli atu i fafo. Na uma ai lava i ina le... o le mea sili ua e sau. O le mea la lea, o le a foi sou ita, ia ua uma.

Lau Afioga i le Fofoga Fetalai, e le tutusa uma tagata, ina ne i te i ua e tootuli atu i le isi taimi ae ave lava oe laulau ai ma lou mataga i luma o le faamasinoga. Ae le gata i lena, ua ese le mea lea ua i ai, ua tagi tupe tagata. A le aumaia le \$100,000 po o le \$200,000 e le taofia lau tagi. Ia se i silasila i nei mau tupe e tele, o le a tauau ina pei o se... o tatou tofi, e pei o se mea foi lele ua talie i ai tagata i mea ia tatou te faia.

Lau Afioga i le Fofoga Fetalai, o le ala lena ua le alo ai lava le Tulafono Tau Faaofi. Afai e moni le agaga lea, tatou o loa e fai le mea amiontonu, soia tatou te aumaia faamatalaga, o tagata o le matou nuu e a ma a ma a. Ia tatou nonofo iloa, o le taimi e te... leaga o tatou lea e fai mea i lalo nei, subject le anoano o le faaososoga, o lea lava e o faatasi le saito ma le titania, e tupulua lava.

Lau Afioga i le Fofoga Fetalai, o lau toe faaopoopo atu lena i le Tulafono Tau Faaofi, e faigofie le Tulafono pe a tatou uia le auala faigofie, ae a tatou mananao lava e faafaigata le Tulafono, ona tatou o foi lea e fai lenei ma lena.

Lau Afioga i le Fofoga Fetalai, o lau toe faaopoopo atu lena i le Tulafono.

FOFOGA FETALAI: Malo. Ia masalo o lea lava ua manino ae a tatou nonofo lava e faafaigofie e faigofie, aua o tatou lava e faigata ai nei mea, ae alolofa sui usufono mamalu, tuutuu mai i totonu o outou finagalo. O ai ana faia se faiga lelei mo i tatou? Se faiga amiontonu? O ai ana faia se faiga amiontonu mo tatou? O le fesili lena, o lena e ia oe le tali.

Ia se i tulai mai le sui usufono mo Anoamaa Sisifo.

Tofa Hon LAUOFO FONOTOE NUAFESILI PIERRE LAUOFO:
Faafetai i lau Afioga i le Fofoga Fetalai. E manatu foi e le umi se manatu o lenei itumalo lau Afioga, ae o le a agai atu i luga o le agaga lea faafaigofie o le tatou faiga palota. O le tulaga lea o lo o tulai mai mo agavaa i le taimi foi lea e faaulu ai sui tauva ae toe lua vайасо ona faataunuu pe faatino le faiga palota. O le taimi foi la i totonu o le lua vайасо lena, o lea e pei e fesilgia ai le agavaa o isi sui tauva. Ia, e pei la o le mea lea sa sau ai, sa fai lava e le Resitara po o le Komesina le faaiuga, a faapea la e le taliaina e se sui tauva ona agai lea i le faamasinoga. A o le mea foi la lea sa silasila atu i ai, o le tulaga lea sa i ai nei sa tulai mai i le faiga palota talu ai, ua agai sao i le faamasinoga, lea foi sa saunoa i ai se tasi o sui usufono i lenei lava Tulafono Tau Faaofi. Ae o se manatu e faatu atu lau Afioga, pe le talafeagai le faia o se pre-qualification period foi lea pe toe lua vайасо ona tatala loa lea o le faauluina o sui i le tulaga aloaia. O le lua vайасо la lena e iloilo ai e le Komesina, ma e tatau lava ona tuu pea i le Komesina le tulaga lea e iloilo ai agavaa o sui ia e faaulu atu. A faapea la e i ai lava lona finagalo e le talia e le

agavaa se sui, ia o la e la e lava le taimi e faasee i le faamsinoga, o la e foi e lava le taimi e fai ai le iloiloga a le faamsinoga i le tulaga na i ai le faaiuga a le Komesina. E pei o le mea lea ou te talanoa atu ai lou sui usufono, ina ia lava se piriota puupuu lea pe lua vайaso a o lumanaiai le faauluina o sui ae tusa toe masina ona faataunuina lea o le faiga palota. E pei o se pre-qualification period foi lea ou te talanoa atu au ia i ai i le vaega lea.

O lea faafetai o lea e aumai i le faamalamalamaga a le Minisita le mataupu lea o le Pre-Poll, e tatala i le Aso Gafua, Aso Lua, Aso Lulu, Aso Tofi, Aso Faraile le faiga palota. O aso la ia e agavaa ai latou ia e malaga i fafo po o lo o fuafua e malaga i fafo ma i latou ia ua 65 tausaga agai i luga faapea foi latou o lo o i ai mea o manaoga faapitoa po o disable persons e faatino a latou palota i le mea lea. O lea e i ai le piriota lea mai le Tulafono e Pre-Poll, e mafai ona palota a o le i oo i le aso o le faiga palota.

O lea la e faatu atu se manatu lau Afioga i le Minisita se i silasila foi i ai le Komiti o le Maota o le a faasee i ai le Tulafono, pe le mafai ona tuu loa i ai ma nai tagata ia o lo o nonofo i Apia, galulue i Apia, ae palota i itumalo i tua ma Savaii, aua o lea ua faaopoopo aso foi nei e mafai ai ona faatino le palota. Na o se manatu e faatu atu e silasila i ai i le tulaga lea, aua o lea e tatala le avanoa, ae na o vaega la ia e faapea foi la tagata o lo o galulue i le Malo i mea o essential services lea sa saunoa i ai le Minisita e mafai ona faatino a latou palota ia pei ni palota faapitoa, a o lea o lo o maua le avanoa a o lea e faaopoopo aso, ona o le popolega i lou taofi lau Afioga, afai pe 10,000 pe 15,000 tagata lea sa palota i Apia i fale palota faapitoa, a o lea foi la ua faa-compulsory ma le palota a o lea o le a o uma i tua ma Savaii, ia o le taimi, pei o le taimi lea ou te tilotilo au ia i ai e popoe i ai le taofi i le malaga atu i Savaii ma le o i tua, faatasi ai la ma le taimi e faatino ai le palota. Afai o le Aso Faraile, o lea ou te vaai atu e tatala le fale palota mai le 8 ae tapuni i le 3 i le aoauli. Ia, o lea la o le a toatele tagata ia o le a o i tua. O le fesili la i lou sui usufono, pe lava la le taimi lea e faatino ai le palota, aua o lea o le a tumutumu nei tatou fale palota i tua ma Savaii.

E pei la o le uiga lena o lea e agai atu ai se faamatalaga, o lea e manaia le faiga lea e aumai o le pre-poll ina ia maua ai le avanoa e i latou uma o lo o nonofo mamao i tua ma Savaii e faatino ai a latou palota i Apia po o le Aso Gafua po o le Aso Lua pe a, ona faatea atu ai lea, ae fai uma i tai i le Ofisa o le Komesina pe a faapea o le fuafuaga lea o lea e aumai i le Tulafono i le mea lea e tau o le pre-poll.

Lau Afioga i le Fofoga Fetalai, o mea ia o le tagi po o le petition, o lea e aumai e \$2,000 le security po o costs a le faamsinoga po o isi foi itu, e \$2,000. O lau ia faatu atu, sii i luga i le \$5,000 ou te iloa o se tau talafeagai lea mo lenei vaitau ua tatou i ai. E pei ona ou fai atu, e le tele ni manatu faaopoopo atu, aua o lea ou te vaai atu i le Tulafono, o mea tuai lava ia ua toe aumai i le Tulafono, vagana ai la nai vaega fou ia sa saunoa i ai le Afioga i le Minisita.

O fautuaga mulimuli lau Afioga, se i silasila ane, o lena o lo o aumai pea i le Tulafono mea tuai foi nei o tekonomosi tuai sa faaaoga i aso ia e i ai mea o telegrams ma mea na e tatau ona aveese ae sui i tekonomosi ua i ai nei ona po. Lua, o lena e aumai i le Tulafono Id palota, a ua leva ona le toe faaaogaina ni tatou Id palota. O mea uma la na e tatau ona aveese ma le Tulafono lenei.

O mea o faatosina, campaign, o lea ua saunoa lau Afioga i mea pei o..... ma mea faapena, ae ou te le o faalogo atu o tau mai le faaaogaina o internet,

tasi lena mea e tatau ona silasila i ai le Komiti lea o le a faasee i ai le Tulafono ma lau Afioga i le Minisita.

Lau Afioga i le Fofoga Fetalai, ia na o nai motugaafa na e tuu atu i luma aua foi le Tulafono Tau Faaofi e pei ona tuuina mai, ae o le a toe maua nisi fesili pe a tatou o i le iloiloga auiliili i se aso o lumanai. Faafetai mo le avanoa.

FOFOGA FETALAI: Malo faafetai. Se i tulai mai le sui usufono mo Palauli le Falefa, lo ouluu vaa seelua.

Afioga Hon FAUMUINA TIATIA FAAOLATANE LIUGA: Faafetai i lau Afioga i le Fofoga Fetalai mo le avanoa. O le Tulafono Tau Faaofi lenei pei lava foi ona silasila i ai lau Afioga ma le mamalu o lenei Palemene, o le tuuifaatasiga lea o le anoanoai o teuteuga mai le 1963 seja oo mai i le taimi nei. O lea foi ua tuuina i ai nisi o faaopoopoga ina ia talafeagai ma lenei vaitau ma le agai atu i le lumanai. Na taua lava i le saunoaga a le Afioga i le Palemia i lenei taeao i lana Saunoaga Faa-Minisita, o Tulafono o lo o faataatia nei i luma o le Laulau a Fono a le Palemene ina ia faaititia ai moliaga o mea nei o faiga palota.

O le isi foi vaega e le gata o le Tulafono lea ma le Tulafono faatoa maea atu, faapea foi le teuteuina o le Faavae e pei ona taatia atu nei i le Komiti e feagai ma ia vaega, ua faamutaina ai le faaauauina o palota taitoatasi po o palota foi o Itumalo Tu Tulaga.

Lau Afioga i le Fofoga Fetalai, o le isi vaega sa ou taua i le Tulafono lea i le faatuina o le Ofisa o le Faiga Palota, o le malosiaga e fai ai e le Komesina o Faiga Palota, ia le faaiuga i agavaa o sui tauva mo faiga palota. O le agavaa o sui tauva, o le matafaioi tumau lea, pe tumaoti, a le Komesina o Faiga Palota, a o lea o le a taatia i sui tauva, e fai ai le finauga, o lea e faapea mai, e fai ai e le isi sui tauva pe agavaa le isi sui tauva. E le o se matafaioi a le sui tauva e finau ai i agavaa o le isi sui tauva, o le galuega a le Komesina e fai. O le mea e aliali mai i le vaega lea, o le 1 nofo fealofani ai o le itumalo. E le gata o le a feesesesei ai ia sui tauva, ae o le a faapena foi ona feesesesei tagata palota o le itumalo, ona avea lea ma mea e va ai le fogavaa i le va o afioaga o le itumalo, e le lelei le vaega lea. Aua o lenei lava vaega, e tatau, po o le a lava le vaega o criteria po o agavaa o le a lisiina i lalo i i, e le tatau ai ona agavaa le sui tauva, pe a le faamalieina aiaiga o le Tulafono e faavae ai se faaiuga a le Komesina o Faiga Palota.

O le taua ia o le vaega lea, ona e le taugofie, ma e le o se matafaioi a ni sui tauva le saili pe agavaa pe le agavaa le isi sui tauva. O le matafaioi maoti lea a le Komesina o Faiga Palota. E le tatau la ona alo ai, i le ataata o le laau. O le isi vaega o agavaa nei, o lea e fai mai o tagatanuu Samoa. Afai la e i ai se tagata mai fafo ua maupaolo mai i inei, ua matai i inei, ma ua faapena ona atoa ai le tolu tausaga po o le tolu tausaga o le monotaga, tolu tausaga o le matai, e agavaa foi, aua foi e le o faapea mai tagatanuu, tama o le eleele, leai, tagatanuu o le tagata lava ua ave i ai le tagatanuu, o tagata ia o le a mafai ona avea ma sui tauva i faiga palota, ia te i lea ua omai ua ese atu ia isi atunuu e nonofo i totonu o le fono a matai. Ma o le mea lena o lea e naunau atu ai ia le taofii lau Afioga i le Fofoga Fetalai, o le Fono lenei, o le Fono Maualuga a le Atunuu, ae le tatau, le tatau i se tagata e le malamalama i a tatou tu ma aga, ona nofo i le mea e le malamalama ai.

O le isi vaega, e fai sina open ended o isi tele o isi fuaiupu o le... ma e i ai nai loop holes, e mafai foi ona faauiga e loia, i le favour i lana ia candidate ma atili ai ona numi le toau. I lalo o le vaega lea o agavaa o sui tauva, ia o le matua le fetaui lava. E tele o mea e mafai ona faaliliu, i lau lava faaliliuga ma atili nunu ai le toau. E pei o nai vaega na, o le finauina lea e tuu mai i i, e alu le isi sui tauva e finau i le faamasinoga, ia ma le isi sui tauva i agavaa pe agavaa pe le agavaa. Ia se i vaai i le tele o le taimi o le a maumau ai?

Lea na saunoa atu le sui usufono mo Anoamaa Sisifo i le tulaga lea. Ia o isi tagata lea o le a talanoa i le au vaega foi lea ae le faia le palota po o le aso o le palota, e mafai ai ona palota tagata malaga po o tagata e le atoatoa le malosi. O isi tagata palota e malaga ese atu ma Samoa mo le RSE i masina o Oketopa, e foi mai, ua uma le palota. Po o le a la le faatulagaga o ia tagata? Aua o la e o e le tumau, ma le tulaga e faatinoina ai le latou palota. Ia o le isi mea e tatau ona i i, ia aua afaí o le monotaga e tolu tausaga, ia e leaga e tele monotaga, o le monotaga a le taulealea, o le monotaga a le tamaitai, o le monotaga a tina. Ae e tatau ona iloa, aua o le matai lea e agavaa e avea ma sui tauva, e tatau ona tolu tausaga e matai ai le tagata ma fai ai lana monotaga faamatai. Ae le o le aumai o le monotaga a le taulealea ma sau ai lava atoa ai le tolu tausaga o le monotaga, e tatau ona tolu tausaga o le matai, ma le monotaga e tolu tausaga. E faapena foi i ai latou ua afifio ma papaaao i fafo, e fia omai, e fia tauva, i nei mea o faiga palota.

O le isi mea lau Afioga i le Fofoga Fetalai, o le Lola. O le Lola o le palota lea na uma atu nei, tele ia o tuualalo na aumai e le gata o le Ofisa, a o isi foi tagata fai mai o Lola ia e i ai nei, o le tele o Lola, e le o ni tagata o itumalo. Ia mo le silafia, na ou faatonuina ai ia nuu o lou itumalo, se i vaai po o ai nei tagata e tau mai e le o ni tagata o le itumalo, 80% o tagata ia e fai mai e le o ni tagata o le itumalo, e ese le igoa e valaau ai i le nuu, ese le igoa e resitala ai. Leaga o le mea lea e taatele i Samoa nei, e ese lou igoa e tauvalaau ai oe i lou aiga ma le nuu e te nofo ai, ae ese le igoa e i le pepa fanau, 80% na omai lau komiti e le gata o i inei, ae o nuu o lo matou itumalo i Savaii. O le mea lena na tupu, e sue atu i le aiga le latou tagata ae fai mai leai o le igoa lena o le tama na i le pepa fanau, ae o le igoa lava lea tou te tauvalaau ai e ese, 80%. O le isi 20%, o tagata ia e le iloa, o tagata la e i fafo. O le tele o i latou e le omai i le palota. Pei la e tasi lena vaega lau Afioga i le Fofoga Fetalai e tatau ona silasila i ai.

O le isi mea fai mai ia le mau a le Ofisa, o le palota, e leai se mea e i ai na o le fai lava o lau palota. Ia o le faalavelave lea, o le tetele o matai o tama ia, ae matua le malamalamala lava i le saofaiga a alii ma faipule. E ese le o e fono ma alii ma faipule ma le nuu, ese lou nofo i totonu o fono a nuu. E ese ese settings, o i ina e te malamalamala ai, i mea o faiganuu. E i ai nuu e oo foi i nuu o lou itumalo, e oo loa i le taimi e tufa ai ni meaai, faapea, aai na o aiga na palota i inei. O le aualii na, o e sue le mea na palota ai e o e aumai ai ni a latou meaai, number one.

O le isi mea lau Afioga i le Fofoga Fetalai, o tagata nei e le toaaga i o latou aiga, o le mea foi lena lea na taua i le pre sittings i luga, lea e saunoa mai ia le Komesina, ua 3, 4 ia tupulaga o aiga, ua latou le iloa a latou aiga. O le mafuaaga lena o le matou naunau atu, taumafai ia fai Tulafono, e o ai tagata e osi o latou aiga, ma faailoa o latou aiga, leaga e i ai le faamaoniga o le tala lea ou te fai atu ai. E i ai isi cousins, ua toe nonofo e le malamalamala tamaiti. E toe iloa ae e matua, ia ua faaipoipo ua tasi le tama, lua tama. O le ituaiga mea

la lea e tupu, ou te faafetai ai i le taimi lenei, ua amata ona naunau o tatou tagata, e fai mea ia o family reunion, aua o mea na latou te iloa ai, ia o latou aiga.

O le middle east, o latou mea lea e tupu, e usu le isi cousin i le isi cousin, ae fanau mai le tamaititi, e mutu le vae, e papani, aua foi e a? E close is genes o le tagata, o le mea lea e ono tupu ia Samoa.

Lau Afioga i le Minisita, lau Afioga i le Fofoga Fetalai, tasi lea popolega, o lea o le a disconnect ai tagata mai o latou faasinomaga. E i ai taimi e tufa ai o matou fanua i Savaii, e alu atu le tagata e le palota i i, alu pea i le mea lea e te palota i ai e ave ifo ai sou fanua. Afai e te le sau e faaali lou lagolago i mea e manao ai le nuu, ia fafo ma le maaefala, e leai se mea e avatua. E saili oe i le mea o lo o e fai saofaga i ai, mo le atinaeina o lou aiga. O refugees ia e omai mai Savaii, e le o ni tagata sulufai e omai e nofomau, se i vagana ai ia Leauvaa, ma Salamumu, aua foi lea ua omai e nofomau. A o isi tagata, e lua loa tolu tupulaga o mea ia o fanua lea e tai kuata eka po o le tai afa eka, amata loa ona misa le fanau po o ai e ave i ai le fanua pe a uma matua. O lea e omai ona o tulaga o galuega ma tulaga o aoaoga.

E tatau ona fau lelei a tatou Tulafono, ina ia aua, aua lava, ne i o tatou faatamala, pe faatauagavale i o tatou sootaga leaga o lo tatou faasinomaga lea. O le identity lea o lo outou soifua ma so matou ola.

FOFOGA FETALAI: Malo, faamaea mai loa le saunoaga a le sui usufono.

Afioga Hon FAUMUINA TIATIA FAAOLATANE LIUGA: Ae faafetai i lau Afioga i le Fofoga Fetalai, e le i taitai uma o lea faatoa afa.

FOFOGA FETALAI: Toe lua minute o le sui usufono.

Afioga Hon FAUMUINA TIATIA FAAOLATANE LIUGA: Faafetai. O le isi mea, ia lea ua faamuta fale palota faapitoa mo Savaii i le taulaga i Apia i le Tulafono Tau Faaofi o lo o talanoaina nei. E sefe tupe a le Malo, o tagata palota faapea sui tauva pe afai o le a faamutaina fale palota faapitoa i le taulaga mo nuu i tua. O fale palota faapitoa lea e tao tua i ai ia le tatou Taitai, e na o le lua lava atua po o fea e tu ai, ae na o le lua lava. Toeitiiti lava ta le 10 i le po o la e tatala ia fale palota na i gauta i Malifa, ae o le a ou le tau atua po o fea e i ai na fale palota? Po o ai foi na itumalo? Ae le faia e le itumalo o Palauli le Falefa.

Na pau lava lea o le mea, o le amiontonu, lea e tou te tau tata i ai, e leai, leai, leai ma se isi e i ai sana amiontonu. O lea o le a maliu Iesu i le vaiaso lenei, o i ina na ave uma i ai o tatou faaletonu, ae aumai le amiontonu lena e tau amiontonu ai outou ma matou. Aua la tatou te tautatala i le amiontonu, e leai se isi e amiontonu. E tatou te fiu lava e lau, e tasi lava le amiontonu e na o le Atua.

Lau Afioga i le Minisita, faafetai i lau Afioga i le Fofoga Fetalai, faamalo le onosai, faafualoa lou soifua, ana e faigata o oe e te vaavaaia le Maota lenei, manuia le tatou fono, soifua.

FOFOGA FETALAI: Malo, faafetai, ia se i tuu atu i le sui usufono, tulai mai ia le sui usufono mo Faleata Sisifo.

Tofa LEALAILYEPULE RIMONI AIAFI: Faafetai lava i lau Afioga mo le avanoa. Faalogologo foi ma le totoa i lenei Tulafono, ia ma finagalo foi faaalia, ae fia fai lava se manatu i le Tulafono Tau Faaofi lenei.

Faafetai i le Afioga i le Minisita ua vave tapena ia le Tulafono ma o le tele foi o mea sa tatou feeseseai ai ma tatou vevesi ai i faiga palota ua mavae atu, o lea ua tele ina faamanino mai ma fai i ai se fofo i lenei Tulafono.

A o le mea lea e tatou te vevesi ai i le resitala o tagata i le le palota o tagata, lea la ua tali i i le Tulafono lenei ina ua fai le compulsory voting, le mea ua leva ona tatau ona faatino mai, ona tatou le toe popole foi lea i le mea lea e pisa ai. E ui lava ina aumai pea i le Tulafono le feaveaiga o tagata palota, i le avatu lea e fai le resitala ma le ave e faapalota, se o le mea lena, o lea e fesoasoani tatou i le process, fesoasoani i galuega a le Matagaluega, aua pe e te alu e ave le tagata e resitala pe e te alu e faapalota, e leai se mautinoa o lena tagata e palota ia te oe. A o le fesoasoani i le faatinoga o le galuega, o le mea lena sa tatau ona fetuutuunai i ai le Tulafono.

Ae ui i lea, e fia faamamafa ma faaautu sau faamatalaga, i le vaega lenei lea sa tatou pisa ai pea i palota ma faiga palota i le tele o tausaga. Ua tele foi ina sui ma taumafai e sui, ae le mafai lava e pei e mauaa ma faamalosi ia le vaega lea e 13 ma le vaega 14 o le faiga palota, i le mea lea o petitions po o talosaga e faatatau i faiga palota, ia ma mea ia o faiga faatosina ma tulaga faapena. A e tagai i le vaega 6 o le Tulafono lau Afioga, o lo o manino mai ai, faiga faatosina, campaign, mea e faataga i lalo i le taimi e fai ai faiga palota. E le mafai, le mafai ona fai sau campaign, po o sau faatosina lea e faataga mai e le palota, ae leai sau tupe e alu. Ma e leai se faiga palota i lalo o le la nei i atunu faatemokarasi nei e tatou te ola ai, e leai se tupe e alu ai.

E oo lava i le Malo Tele nei o Amerika, lea na uma nei, e tai fia selau miliona, e fai ai campaign, e leai se mea se palota i lalo o le la nei, e le mafai ona le alu se tupe. Ae ala la ona leai ni petitions, ona o la e faataga faale-tulafono. E pei la o tatou, ua faafia ona ave ni a tatou talosaga, ma matou savalia ia Komisi o le Faiga Palota, o le mea e fofo ai le faafitauli lea, fai se budget, fai se vaegatupe faapitoa, i mea o faiga palota e tapena ai faiga palota, so o se isi e alu i faiga palota. E ese lava lou alu tufa tupe, faavalea tagata ma ave, e eseese ma le mea lea o le tapenaina o le faiga palota ma le faatinoga.

O le mea e pito sili ona faaletonu lau Afioga i le Tulafono, sa tatau ona fai i ai finagalo ae faafetai o lea e toe aumai i le Komiti o faasalaga, very unreasonable, e le talafeagai. Aisea? E tutusa lava le \$10 ma le \$100,000, tutusa le \$5 ma le fia \$1,000. So o se faasalaga lava po o se soligatulafono, like fasioti tagata, gaoi, so o se lea e saunoa mai ia... so o se ituaiga faasalaga lava, po o so o se ituaiga solitulafono e te faia, e i ai vaega, e le tutusa uma faasalaga. Ae a oo mai la i le palota, a molia oe i le \$10 po o le meaai lea e tasi le bbq lea e tasi, e aveese ai lava lou tofi. E tutusa lava ma le tagata e alu lau pusamoia e 200 ma... e le fetaui. Lau Afioga e le talafeagai, sa tatau ona i ai, tatau foi ona i ai ni faasalaga la, e atagia ai mea nei, leaga e le tutusa, e faafefea ona tutusa, lima tausaga o tatou tautua. O le taimi lenei a ma fetaui ma le tagata ave i ai sana meaai, pe ave i ai sana pasese pe a manao i ai. E le o se faatosina, ae a tatou faia le tolu masina lea po o le 30 aso lata i le palota, ua faatosina, Matua sese tele. E tatau ona fai i ai se fuafuaga i le faiga palota lenei ina ia taofi mea nei. Lau Afioga, a ou tautala, e tatau, o le tolu lenei o

palota, tolu moliaga, tolu manumalo. Ou te le o fai atu la faapea... Lau Afioga, e leai se moliaga o au e i lalo ifo o le \$50,000 lau tupe e alu ai. E tusa pe ou te manumalo, e le i lalo o le \$50,000 i le \$60,000 le tupe e faaalu e au, e fai e loia, o tagata... e tatau ona malamalama i ai a outou Afioga. A faapefea ona taofi lea mea? O le faiga palota lea na uma atu nei, e toavalu sui o petitions ia na fai. O le a le mea na i ai? E fitu na toe ave i tua, na o le tasi lava le petition na faaauau i le faamasinoga, na o au. O le mea la lea ou te talanoa atu ai, ona la o lea ua faaaoga tele e sui usufono lenei faiga e toe maua mai ai tupe mai nai sui nei e manumalo. A o le isi mea aupito sili ona leaga ma faaletonu, o le faaaogaina e loia, o loia lea e faia mea nei, lea e faia appeal nei, lea e aumai le faasalaga i i, faasala na o le tagata e taliaina se tupe pe fai le... ae tatau ona tuu i ai ma loia i totonu e fesoasoani i le faiga o mea nei. O lea e molimau le sui lenei, e sau le loia vaai, ia, pay mai le fia sefulu afe lea ona e malo lea. O se faiga le talafeagai lea, ma e tatau ona aveese. O le faiga palota lea na uma nei, faatoa ou maua ai lea i se ituaiga moliaga fou faapea, molia le sui e manumalo toe molia le sui e tulua. E fou. Ua tetei nai tagata nei e tele mea e faiaina ae toe molia foi ma latou. Ona e faapea mai, a faiaina le tagata lea e malo, faiaina ma le tagata lea e tulua aua le o ae malo loa oe. O loia e ona le fautuaga lea. O le a le mea na oo i ai? Avatu i totonu o le faamasinoga fai mai le Faamasino, -o ai le loia faavalevalea e ona nei ituaiga moliaga faapenei?øE moni lau tala. O ai le loia faavalevalea e sau ma nei moliaga e molia le tagata ua faiaina? Aisea? E le molia i ni petition le mea lena, e mataga. Ae o le a le mea e ala ai ona fai e loia? E fai ina ia maua ai a latou tupe e tele, aua e \$20,000 e faagaoioi ai loia i mea nei. Tusa la pe ou te iloa e le faamaonia mea ia e fai ia te au, ae o le tupe lea e alu leaga o le mea e tatau ona fai.

O lea lai lau Afioga, ua tatau ona fai se tatou fuafuaga ina ia taofi mea nei, aua e fai uma lava i atunu temokarasi ma faiga palota uma. Fai se vaegatupe pe \$10,000 pe \$5,000 e tapena ai palota a nai tagata, ona tuu lea i ina i vaega na e faaaoga e tatou e fai ai mea nei, ona avoid loa lea o lenei faiga piopio ma le le talafeagai. Afai foi la e faaauau, ou te fautua atu i lau Afioga i le Minisita, e fai faasalaga e faatau i le mea, aua e tasi lava le faasalaga lea e i ai. A o le mea lea e i ai, o le faasalaga o le tagata o tatou nei e petition, e muliga le faasalaga o le tagata fasioti tagata. Aisea? Aveese le nofoa, e le toe alu i le isi palota, totogi ma loia ma mea e fai. Oka, ae na o le \$10 pe \$20 lea na fai? Ona o le vaai mai lea i tua o tagata, o tatou o tagata corrupt. Ioe, o le perception lea o lea e taumafai e aveese. E leai se mea faapena. Ona o ai lea e fai nei faiga faapenei.

O lau fautuaga, faafetai i le Tulafono ua tele mea ua address ua sui, ae lau Afioga i le Minisita, se i tagai lelei i le vaega lea, leaga e le lelei, e le talafeagai e tatau ona i ai se suiga o le Tulafono i mea nei o petitions, ina ia taofi i le tatou vaitaimi. Ma lou faaaloalo lava. Faafetai.

FOFOGA FETALAI: Malo faafetai.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, se leaga e i ai le mataupu lea sa saunoa i ai le sui usufono lea ua mavae atu nei, ona... e puupuu lava si vaega lea. Leai o le saunoaga lea faapea e fai e loia e sue ai latou tupe le mea lea o le petition. Mo le silafia, masalo o lena foi o silafia e lau Afioga ma le sui usufono, o le faiga o mea nei

o petition, e tapulaa taimi, a fai lau recount na o le tolu lava aso e tuu atu ia oe mai le aso e lau ai le iuga aloaia e faila ai sau recount, e fitu aso e tuu atu ia oe e faila ai lau petition. O lona uiga, e taatia uma lava galuega a le loia lea e fai ae fai mea nei o petition. Ae a faapea e tuuese petition, masalo po o le \$200,000 lava lana tupe e maua i mea ia la a faataatia ese ana galuega. A o le galuega e fai a le loia, o le galuega fesoasoani, o la e foi e sulu atu le tagata lea e fia maua le fesoasoani, o lea la e fai le galuega fesoasoani lena.

Ua ou tulai atu e faamalamalama si vala lea, ona o la e genogeno mai le Afioga i le Minisita o ou le Tulafono lea, o le isi foi loia, sa fai foi e ia petition i le palota lea na tea atu nei. O le toe tulai atu lea lau Afioga.

FOFOGA FETALAI: Ia, se i toe tulai mai le sui usufono mo Faleata Sisifo.

Tofa Lealailepule Rimoni Aiafi: E i ai loia matutua ia e i le taulaga latou te faia nei mea o petitions. E faasa. E te alu atu loa fai mai, -matou te le faia nei mea o petitions. E le lelei.ø A faapena uma la loia, ai se manaia. A o le mea lea ou te fai atu ai, e le o le petition alone, a o moliaga faaopoopo. E tiga lava ona iloa e le loia e le malo e le fetaui le moliaga, ae fai lava, faaopoopo. E te alu atu ma lau petition e tasi le moliaga ae fai mai le loia, alu e toe sue mai nisi mea se sefulu, e lelei lava le pau o le tasi a o la e i ai isi mea e iva e taumafai e pini ai. E faapena le faiga o le mea. Faamolemole lau Afioga i le sui usufono mamalu, ua valu faamasinoga a Lealailepule, ua ou matua malamalamala lava, na pau lava le mea o le eseesege, o le malo ai pea i faamasinoga ia e valu. Ou te malamalamala lelei i le mea lea. Ou te iloa a fai sau aoga faaloia taeao, o le mea lena ua ou le sau ai i le tou aoga lea e fai, because I am already a lawyer. Ioe.

Tofa Hon Lauofo Fonotoe Nuafesili Pierre Lauofo: Lau Afioga i le Fofoga Fetalai, leai e leai foi se faafinauga e fai i lea mea. Ae pau lava lau fautuaga i lou uso, fai loa sou ofisa loia.

FOFOGA FETALAI: Tulai mai le sui usufono mo Gagaemauga Nu.3, le Sui Fofoga Fetalai, se i faasolo le tatou galuega. Saunoa tonu mai i mataupu o lo o fia laga e lou finagalo i le faasologa o tatou... E fautua atu i sui usufono mamalu ina ia faigofie le tatou galuega, e toatele sui usufono o lo o tulai mai.

Tofa NAFOITOA TALAIMANU KETI: Faafetai i lau Afioga i le Fofoga Fetalai mo le avanoa. E manatu foi o le agaga maualuga lena e alofa atu foi i le Nofoa ma le faafoefoeina o le fonousu a Samoa. O le a agatonu foi se manatu o lenei itumalo i le tulaga tonu o aumai ai lenei Tulafono Tau Faaofi. E fia momoli le agaga faafetai i le Afioga i le Minisita i le tele... E 155 nai suiga ma fuaiupu o lo o taoto ai i le Tulafono fou lenei, o lona uiga e le o se galuega laitiiti sa feagai ma lau Afioga, aemaise o le Komesina ma le Ofisa o Faiga Palota. E momoli ai le faamalo ma le faafetai tele i le tulaga o taoto ai lenei Tulafono Tau Faaofi i ona suiga. Peitai, o le agaga o le matou tulai atu, e le mafai lava ona tuua ai se matou tuualalo po o se matou tuualuga foi i lau Afioga. E afua se matou talanoa i le tulaga o agavaa o tagata palota i le mea e fia palota ai. E le mafai foi ona matou nofonofo i tua ma ni o matou manatu. O le tulaga o matou mai Salafai o lea e fia talanoa i ai lenei sui usufono.

O le agaga maualuga lau Afioga, se i toe silasila ane lava i ai, o lea ua manino auofala i le tulaga o le agavaa o tagata palota, taatia ia le sui tauva a o lo o fia faamamafa e lou sui usufono le tagata palota. E pei lava foi ona sauva foi ma maua i nisi o saunoaga a sui usufono, e pei o le a taofia ai le sootaga o le tagata. O le saunoaga a le Palemia, o le vaaiga mamao ma le vaaiga lautele, e ese le taua ia te au o nei upu. O le agaga o lo o aumai ai le Tulafono Tau Faaofi, e pei e foliga o le a saisaitia ai le aia lea ma le saolotoga, Article 13 of the Constitution. O le mea le lau Afioga i le Minisita, ae a pe a fai se faiga, o le tuualalo lea, tuu pea le avanoa i le tagata palota mai le motu tele i Salafai, tuu i ai le avanoa e fai ai e ia lava le filifiliga, po o fea lava lea e alaala ai, e a pe a ave i ai se avanoa e filifili e ia pe palota i Savaii pe palota i le mea lea e nofo ai leaga e eseese a tagata, e eseese tagata mai Salafai. O isi na omai e sailimalo ae tete lava le faamalama o le faamoemoe o Salafai, ae ese isi tagata ua omai se i saili se mea e nonofo ai, fai le fanua ma nofomau ai. E ioe i ai lou sui usufono. Afai o le tulaga lena, e le afaina ia te au.

Lau Afioga i le Minisita, o le tuualalo a lenei itumalo, se i silasila ane lava i tagata faapea, leaga o le mea lea e tulai mai, o le fesili lava lea e tulai mai i le taimi lenei, ia muamua le mea e te nofo ai. O le mea muamua lena, faamulimuli le matai. O le a ou le talanoa i le aganuu ma ona tulaga o lea e aafia i le mea lea, leaga o lea ua tatou o i itumalo faapalota. O le ala o le matou tulai atu lau Afioga i le Minisita, e le tele lava se matou fautuaga, e tatau ona ave le avanoa e choose ai le tagata po o fea le mea e palota ai, aua ne i ave le faamuamua i le mea lea e nofo ai. Afai lava e saili atu o le tagata o lea e sau e faigaluega ma aumai tamaiti e faaaooga i aoga lelei, e le mafai lava ona nofonofo i Savaii, e tatau ona nofo i inei e tulei le fanau. A o le faamoemoe pe a oo i filifiliga o taitai o le atunu, o lona faasinomaga i Savaii. O le mea lea e tatau ona toe silasila i ai i le tulaga e faataoto mai ai le agavaa lea, le agavaa e fai ai le filifiliga.

Lau Afioga i le Minisita, e tatalo atu, fai se special condition mo tagata i Savaii, ioe. Leaga e ese lava, afai o tagata tulou i nuu i tua i Safata ma Falelatai, e le afaina ia te au aua e alu lava i le taeao fai le palota ma toe foi mai, e le tele se cost e incur i luga ia latou. A o le agaga e ala ai ona matou talanoa atu i o matou tagata i Salafai i le taliu lea e agai i Salafai. Ua taua i lou finagalo tatou te le iloa le mea e tupu i le ala, le moemoenoa ma le laufaleaina, leaga e faapena le soifuaga, ua folaula le sami, a o le agaga ne i o tatou naunau e agai i Salafai, a o le isi lea tiute o le Malo e silasila i le tulaga o le saogalemu aua leaga o lea o le a taufai agai uma i Salafai. Aua tatou te le iloa se mea e tupu i lena aso.

FOFOGA FETALAI: Malo. O lea ua maua atu le finagalo o le sui usufono, o lo o mamafa lou finagalo i le itu lea. Ia, malo. E pei lava ona toe faamanatu atu, e see atu le Tulafono i le tulaga faa-Komiti ona toe see mai lea i le tatou Fono Aoao. O lea ua ou vaai atu foi ua faamaumau e le Minisita i lalo fautuaga, manaia, faafetai.

Tofa NAFOITOA TALAIMANU KETI: Faafetai i lau Afioga i le Fofoga Fetalai. O le agaga lena o lea e ala ai ona tau faamafamafa upu. A ou vaai atu ua tusi o le a atili ai ona toe... ae a vaai na o le nofonofo, ia o le a le afaina lea o lea e maitau mai e le Nofoa. O le taua lea. O le a faai atu le matou lauga, o le tulaga i le faapalota o tagata muamua, lea e amata mai i le Aso Gafua, a o

le Aso Faraile, ou te manatu o se tofa na ae mo tagata e malaga i fafo. E i ai foi ona faafitauli pe afai o lona uiga e foliga mai o le a fai faiga palota i le vaiaso atoa. Ae i ai le agaga na tulai ai le finagalo o lau Afioga ma le... e le lagolagoina e le matou itumalo le tulaga lea, tuu pea i le aso palota pe afai o lea e alaala i Samoa nei. Ae afai o le faamoemoe e alu e tau apu po o fea lava nisi faamoemoega tetele a le aiga ma le Malo, po o saofai, po o nisi lava tulaga, e lagolagoina la e le itumalo lenei, fai muamua lana palota i le vaiaso lava lea ae le i malaga.

Ia pei o nai motugaafa lea, a o lea e i ai le talitonuga tatou te toe feiloai foi aua o lea e agai mai le Komiti ma aumai ai se fautuaga. A o le agaga maualuga lena ia silasila i nai tagata mai Salafai i Savaii, ia i ai ni special treatment ona o le femalagai i le aso lea, ma le Aso Tofi lea e lumanai aua o lea o le a aso malolo, e talitonu, tatou te le iloa le mea e tupu. A o ai e fesiligia i le mea lea? Na ona faapena atu leaga e faapena le agai o le soifuaga o lo o tatou i ai nei. Ma le faaaloalo lau Afioga malo faafetai mo le avanoa.

FOFOGA FETALAI: Malo. Ia se i tulai mai le sui usufono... tuu atu ia le avanoa i le sui usufono mo Salega Sasae ona sosoo ai lea ma le sui usufono mo Safata ma Falealili ona uma atu ai lea o lena itu o le Maota.

Tofa OLO FITI AFOA VAAI: Faafetai i lau Afioga mo le avanoa. E le umi foi se matou tala, ua tele foi ina faaalu atu i le muamua ma le lua, o lea toe pau lea o le Tulafono. E leai o Tulafono aoga uma Tulafono nei e pei foi lava ona saunoa lau Afioga i le Fofoga Fetalai, o mea a le Atua mea ia o palota ma tulaga faapena. Ae fesili pea lou mafaufau lau Afioga, po o le a le mea e fai ai nei suiga, e leai se Paeaiga se i le suia ai Tulafono ia o Faiga Palota. Ae amata atu lava ia tatou aua o le Tulafono ia tatou, o tatou lava e faia le mea lea o le soli o le Tulafono ma mafua ai ona fai mataupu i le faamasinoga o le sue o le isi e le isi, fetagisi isi ma tootutuli isi. E faapena foi i lau Afioga i le Palemia, ua tetele lava au saunoaga i le Tulafono ae oo nei foi i le isi palota vaai atu ua e moulu mai i lea itumalo e tau fofo ma tau faanana isi sui o lau Vaega. E pei o le mea lena o lea ou te tau fai atu ai lau Afioga i le Fofoga Fetalai.

O le isi vaega o le...

Susuga Hon Tuilaepa Auelua Fatialofa Luplesoliai Lolofietele Neioti Aiono Galumalemana Dr. Sailele Malielegaoi: Lau Afioga i le Fofoga Fetalai, se i tau faasao atu lava le mea lea. O le mea lenei o le taitai o le atunu, o le atunu atoa lava, e le faapitoa. O le a ea le mea e fai pe a sulu mai le tagata? Alii, o mea ia o lea e sulu mai ai tagata, o isi ua malepelepele faaipoipoga, e omai ia te au se i ou fesoasoani atu ua mumusu e o i latou faifeau. O isi e omai i le faalupega foi lele o au o le Tama o le atunu, e omai e sue atu ai ni pili, e oo i sii, e oo i mea e fai ai faamati. E omai lava ia te au, o lea la ua ou le fia tama foi o le atunu. Ou fai atu, «A o fea tama o outou itumalo?» Se e fiu e sue. «O i tama o outou itumalo e le o au o so outou tama. E tofu lava le tagata ia ma lona ia tama. A o le tulaga lena, a omai la tagata e talosaga mai, o le a le mea e fai? E te tulia? Aemaise la o mataupu ogaoga ia. Ou te taumafai foi au e ave le fesoasoani. E oo lava i le tatou Alii e tiga lava o le a oti, ae fai lava le fesoasoani i le pagota lea na sulufai i ai. E faapena le mea, e le faapea e te vaai atu e pagota le tagata ona tuli lea. A e

vaai atu a e sau ia te oe mo se fesoasoani, fai le mea e mafai. Ua ala ona ou fai atua le mea lea lau Afioga e oo foi ia te ia lea, ou te le iloa pe ua sau faafia ia te au e tiga ona ou iloa o la e solitulafono, ae ou taumafai lava e fai. Se i vaai ane le Minisita i le falepia o le alii le la o la e faatau ai marijuana ae taumafai pea e fai se fesoasoani po o le a. Ia, o lena. E a la, e leaga la lau fesoasoani lea na fai atu ia te oe? Afai lava la na avatu ae fai mai le Minisita, se ua fai soo, tapuni loa, ona faapea foi lea, ae leaga lea Minisita e amiotonu. O le fesoasoani atu lena, e oo lava ia te ia lea na sulufai mai foi ia te au.

FOFOGA FETALAI: Malo. O le loto alofa le mea taua. Ae see ese ma lena mea.

Tofa OLO FITI AFOA VAAI: Ona o lea ua taua e le Palemia le Alii Faaoala, ia manatua foi lau Afioga i le Palemia le augani a le pagota ia Iesu. õA e oo i lou malo manatua mai au.ö O le a le upu a Iesu na fai i ai? õUa lelei, o le a ta o i lou malo, ae tautau mai pea i ina e totogi lau sala.ö

O le isi mea lau Afioga i le Fofoga Fetalai, na amata mai le Tulafono muamua, lua a le Afioga i le Minisita o tausisi lava i le tulaga fou lea ua tatou alu i ai, itumalo faa-faiga palota. Ae oo mai i le Tulafono Tau Faaofi lenei, o lea foi ua toe see ese, ae fua lau Afioga i le tulaga agavaa, o le mea e te alaala ai ma lou matai, palota ai i le tulaga o le tagata palota. Ae oo loa i le tagata tauva, ua see loa i le aganuu, alu e te sau i le mea e te matai ai. Ae sa tatau foi ona tatala le avanoa i i, po o le a lava le matai i totonu o le lio lea, agavaa, leaga o lea ua tatou alu i le faiga fou i le alu i luga o le fuainumera.

O le isi vaega lau Afioga i le Fofoga Fetalai, e i ai ni nai mataupu foi mai Paeaiga ua tea i suafa matai o sui usufono ma e sa tamomoe i le palota, avatu le faataitaiga ia te au, pe sau i totonu o le Palemene, na sau i lona suafa Oloolo, ae emo ifo ua afa le palota, leai o Olo le igoa sao. O le mea lena ou te fia fesili atu ai i lau Afioga i le Minisita, po o le a le tulaga e oo i ai i mea ia leaga na tutupu muamua pe faauma loa i ina pe faamuta le avea ma sui usufono o le Maota. E pei o le tulaga lena lau Afioga i le Fofoga Fetalai.

Ma le mea mulimuli lau Afioga, e solitulafono e pei ona saunoa isi sui usufono, i o matou tagata Savaii ia e nonofo i inei, aua o lea e faapea mai le Tulafono e solitulafono pe a le palota. E faapefea pe a le gafatia e tagata palota Savaii la e fia alu i o se pasese e alu ai i le vaa ona nofo lea e le palota ona o lea ua le toe mafai ona palota nisi i inei? E pei o mea na lau Afioga i le Minisita e tauala atu i le Nofoa i le taimi e toe fetuunai ai le tofa a lau Afioga ma le mamalu o le Matagaluega aemaise foi o le Komiti o le Palemene o le a tuuina atu i ai lenei Tulafono Tau Faaofi taua.

Ma le agaga faaaloalo faafetai.

FOFOGA FETALAI: Malo faafetai. Tulai mai le sui usufono mo Safata Sisifo.

Afioga LEAANA RONNIE POSINI: Lau Afioga i le Fofoga Fetalai, e fia faaali foi se manatu o lenei itumalo o Safata Sisifo e uiga i le Tulafono Tau Faaofi ua i totonu o le Palemene. E muamua ona faafetai i lau Afioga i le Minisita i le Tulafono. O lea ua maitau atu o se Tulafono ua leva, ae o lea ua oo i lou vaitaimi a o lea ua i ai suiga o le tulafono.

E muamua lava ona faamauina le agaga e lagolagoina le Tulafono ua tulai mai nei. A o nai fautuaga i lau Afioga i le Minisita, o le taua ia o le faaaliga lea sa faaalia e le sui usufono mo Faleata i Sisifo i le tulaga o faasalaga mo sui tauva pe a ave i le faamsinoga. Aua o lea e maitau, e pau lava lea o le faasalaga e leai ni tapu e fua i ai, aua o faamsinoga uma lava e fua le faasalaga i le solitulafono. So o se solitulafono lava e fua i ai lona faasalaga. A o le sui tauva ae molia, e oo lava i le ipu taumafa e te avea i le isi tagata palota, e soloia ai lou tofi, a o le tofi ua leva ona e tautua ai i totonu o le itumalo. O lea ou te tatalo ai i lau Afioga i le Minisita, se i e silasila ifo lava i ai. O lea e tau mea foi nei o iunite, pe fia loa iunite e oo i ai ua soloia lou tofi o le sui usufono.

Lona lua, o le tulaga lea i le taimi ua maea ai le faiga palota, ou te talosaga foi i lau Afioga i le Minisita, pe leai se vaega o sui usufono ia ua manumalo, pe leai ni sui loia a lo tatou Malo, e tutu mo sui tauva ia e faasaga i ai tagi a sui tauva. Aua e faavae lau tala ona o au lea sa ou aafia ai, faatoa maua lava lau loia o le aso lava lena e gata ai. Ae ua ou fiu e sue ni loia e tutu e talosaga i ai, ona o le latou mau, e le gata foi lea ua puupuu le taimi e faaulu ai talosaga i totonu. O lau tatalo i lau Afioga i le Minisita pe leai se vaega o loia e tutu mo tatou sui ia, aua a e malo loa, o tatou o sui o le Malo. E tatau lava la ona i ai ni sui loia e tutu mo tatou, lau Afioga i le Minisita.

Lona tolu, ou te lagolagoina le mea lea o lou afio lava i le mea e fai ai lau palota i le tulaga o itumalo, i lou lea talitonuga, e faamamaavega foi ia tatou. Tatou te le toe tigaina e agai e saili tatou tagata palota, o matou foi o le matou vaega sa taamilo i Savaii e tau sue mai tagata nai o lea e i totonu o le lola lea a lo matou itumalo. Ae a palota lava i le mea o lo o afio ma alaala ai, o lou talitonuga foi, o tagata tonu lava ia e fai le filifiliga o le sui tauva e te sau ai. Aua afai e palota eseina lou itumalo e pei o isi itumalo ia, e tau maitau e pei ua tele atu tagata ese e nonofo, ae o la e latou te filifilia sui o latou itumalo. Ae a pau tonu lava i luga o e o la e nonofo i nuu ma alaala faga, o latou na e faia le filifiliga pe toe sau pe leai. E faigofie foi mo i tatou e le toe o e saili ni tagata palota. O lea lava ua maua i i le tagata e te agai i ai ma e talatalanoa i ai, ma e sua i ai i toeaiina e aumai le lagolago ia te oe e te toe sau ai i le isi palota. Ou te talitonu la, o nai mea iaí ou te faafetai foi i le Tulafono Tau Faaofi lenei, o lea ou te maitau atu, o galuega faavaitaimi lea e o ai a tatou tama fanau foi nei, e tatalo atu ai ia maua se avanoa e palota mai ai, aua o na e o foi e tautua latou i atunuui mamao, a o lea e lelei le tamaoaiga o lo tatou atunuui. Tuu i ai se avanoa e palota ai tagata ia o lo tatou atunuui o lo o agai atu i galuega faavaitaimi.

O le isi mea lea ou te tau maitau, faafetai i lau Afioga i le Minisita, o lea ou te tau maitau atu, o lea faapea a oo i le taimi o faiga palota lea ona faaaoga lea o tatou masini faaonaponei electronics. O lau tatalo i lau Afioga, se i silasila totoa i ai, leaga o masini electronics lea e fai ai palota, o mea e faia e o tatou tagata. A oo foi ina faasese e tagata masini ia, hack e se isi mea ia, ona sese atoa lea o le faitauga o le tatou palota. Aua i lau maitau, a faafoia foi le faafitauli lea, faatele fale palota, i totonu o itumalo. O lau maitau i le taimi o faiga palota, e ta ifo le lua ua leai ni tagata i totonu o fale palota ua leva ona uma tagata palota. E le o i ai tele foi la se manaomia, ou te iloa foi e le o i ai foi ni faafitauli se tele o tulai mai i le mea lea o lou afio atu lava fai lau palota tuu i le atigipusa foi lea, silasila uma i le faiatua. O lea lava ou te talitonu o la e fai e atunuui lava, ona o atunuui e faiatua miliona ma miliona tagata e

manaomia le vave ma le faaiuga o le palota. Ae silasila totoa ifo i ai lau Afioga i le Minisita.

Na pau lea o nai manatu e tuu atu i lau Afioga i le Minisita. Ia manua tele le Fonotaga a Samoa.

FOFOGA FETALAI: Malo. Ia tulai mai le isi usufono mo Falealili Sisifo, sosoo ai loa ma Faumui maea loa, sosoo ai ma Vaimauga.

Tofa AUMUA ISAIA LAMEKO: Faafetai i lau Afioga i le Fofoga Fetalai mo le avanoa. E lagolagoina e lenei itumalo lenei Tulafono Tau Faaofi o Faiga Palota 2018. E pau lava se vaega e tuualalo ai, o le tulaga lea i le vaega o lo o taua ai le tauleagaina mai le faamauina. E le o i ai se vaega o tusi ai le vaega lea o le tagata foi lea gaumativa, bankruptcy. E talosaga atu i le Minisita e tuu ai i totonus se vaega lea, o latou ia ua mafai ona faamauina i le gaumativa, ia aua ai nei agavaa e o i le faiga palota.

O le isi lau fesili lau Afioga i le Minisita e tauala atu i le Nofoa, pe o le a le mea ua sui mai ai aso e faaulu ai lau tagi mai le fitu aso i le tolusefulu aso. Pe o le mea ua le lava le fitu aso e faaulu ai le tagi. O le fesili lena i le tulaga lea e faatatau i leí ..

O le isi vaega lau Afioga o le Tulafono lea ua i ai nei, e faamamafaina tele le resitala o le matai, o oe e te matai. O agavaa e te mafai ai ona avea oe ma tagata palota, o oe e te matai, o lou tama e matai, o lou tina e matai, o lou tuafafine e matai po o lou uso foi e matai, ae mulimuli lava le mea e te nofo ai. O lea la ua sau le tatou Tulafono fou lea, ua faamuamua le mea e te nofo ai, ae faamulimuli le mea e te matai ai. E pau lava lena o lau faafesili lau Afioga i le Minisita po o a mafuaaga ua mafua ai ona aveese sootaga ia sa i ai muamua i le Tulafono tuai.

E pau ia o nai manatu e faatupu manatu e tauala atu i lau Afioga i le Nofoa. Faafetai mo le avanoa.

FOFOGA FETALAI: Tulai mai le sui usufono mo le Itumalo Tu Taulaga Sisifo.

Afioga FAUMUINA ASI PAULI WAYNE FONG: Faafetai atu lava i lau Afioga i le Fofoga Fetalai, malo foi le onosai i lenei aso. Ua umi le tatou galuega ae taua lau Afioga. Na o se manatu i lau Afioga i le Fofoga Fetalai, i le tilotilo atu i le Tulafono lenei, ua fai lava si tele o le Tulafono. E foliga mai e le trust ina e le Ofisa o Faiga Palota le mamalu o sui usufono eseese. E pei e foliga mai ua le talitonuina i tatou. E i ai se mafuaaga ua ala ai ona soona aumai lenei Tulafono? O tatou e tele ina solitulafono pe o se mea faapea. E masalo o i latou na o muamua i le palota na muamua atu, o lea ua ala ai ona tele faapea le Tulafono. A tuu i se isi itu, o mea ia e tau mai i i, e taofi e aua le corrupt i tulaga o faiga palota. O lea la ua tatou mulimulitaia, e tatau ona faafaigofie mai, e molimauina ma talitonuina i tatou, o tatou e faia Tulafono o le Malo lenei. A o lea e foliga mai, e le tio foi leaga e tele lava le history o le faiga palota a le Malo o Samoa.

Ae faafetai atu lava i lau Afioga i le Minisita masalo o le toe teuteuga mulimuli lava lea o lea ua i ai tatou alu ai loa e oo lava i itumalo palota ia ua i ai. E i ai le talosaga i le tulaga o le aso e fai ai le palota lau Afioga, o lo o i ai i i le Mataupu 66, Fuaiupu 66 e faapea a fai le palota i le Aso Faraile, e tatala i le 8 ae tapuni i le 3. Ae a fai i le Aso Toonai, e faatoa tapuni i le fitu i

le afiafi. O le a la le mea e le tuu ai tatou i le Aso Toonai lau Afioga e ala atu i le Nofoa? Tatou tilotilo i ai pe le tatau ona fai i le Aso Toonai ina ia maua ai la le avanoa o Savaii lea e o i Savaii, e fai ai a latou palota. E maua atu lava e le vaa mulimuli i le fa, e maua atu lava o la e le i tapunia le fale palota.

Ona oo mai lea i le tulaga o le aofaiga o le tupe e faaulu ai le sui, o lea ua sii i le 200% mai le \$300 i le \$1000. E oo ifo i le taimi e fai ai le palota, ua matua leai lava ma se tupe a le sui faatu o totoe. Ae laki foi ae maua se \$300. O le a le mea e le tuu ai pea i lalo i le \$300, ae tatalo atu ai i lau Afioga i le Minisita aemaise foi lena itu, toe aumai i lalo i le \$300. Aua o le aso lea, ua uma lava mea uma ua matua leai ma se mea o totoe ae fai loa ma le faiga palota.

O manatu ia lau Afioga i le tulaga o aotelega o itumalo ia ua taatia ai e manaia foi ae vaevae lelei paketi a itumalo, a uma loa ona faaaoga le paketi a le itumalo ia i le latou auala, malolo latou ia i le tausaga atoa po o le isi Paeaiga, se i faatoa toe oso le latou paketi mo le isi tausaga. Aua o lea ua patino mai le itumalo tatou te i ai, e lelei foi lena e aoga mo i tatou ia eí . aua e leaga e i ai lava isi itumalo e alu lava le Minisita ia e fai mea a lona itumalo, tiga ona iloa ua tele ia a o la lava ua toe fai atu foi. O le mea lea e i ai, e lelei pe a vaevae, a faapea la po o Falelauniu ma Siusega, tai pei o le mea lea matou te i ai. A uma loa ona fai o matou auala, matou malolo se i toe oo i se isi sui. Ae a faapea e fai lava i ae o lea lava e matamata le isi itu lea, o le aoga foi lea o le tulaga lea ua i ai, e fesootai ai nuu ia aua ne i e alu mamao i le mea e fai ai lau palota.

E na o se manatu lena. E tele manatu e fia talanoa i ai, ae se i alu se i faitau lelei, ne i te i ua sala se isi i le taimi e fai ai faiga palota. E faamalulu atu foi, e sao foi i le tulaga i loia. I le tulaga sa i ai le faiga palota i le taimi na tea nei, se ua ou fiu e sue se loia e faia lau mataupu, ua ave au ua molia au. E fa, lima loia, e faamalulu atu e le mafai ona ou faia lau case, leaga o au ou te aiga i o, e aiga uma lava i ai. Ae e lelei foi le tuualalo i le afioga i loia, taatia pea lou aiga pe a oo i le taimi e alu atu ai le sui tauva e fia maua se fesoasoani mo le faamasinoga. Ae talitonu ailoga e toe oo i tatou i lea tulaga o lea ua tatou fefaamagaloai, tatou agai i luma aua foi le lelei o tatou itumalo.

Ma le faaaloalo lava lau Afioga i le Fofoga Fetalai.

FOFOGA FETALAI: Malo faafetai. Tulai mai le sui usufono mo Vaimauga Sasae.

Afioga SULAMANAIA FETAIAI TAUILIILI TUVASA: Lau Afioga i le Fofoga Fetalai, faafetai mo le avanoa. E faamalo foi i lau Afioga mo le taitaiina o le fonousu a le atunu faapena foi lena tala na atoa i le Afioga i le Palemia ma le Vasega o Minisita ma Minisita Lagolago, faapea foi le onosaia o lenei vaega toatele.

Ia, ae fia fai foi se sao o lenei Itumalo ona o le t ua o le Tulafono Tau Faaofi. Faafetai i le Afioga i le Minisita aemaise o lana Minisita Lagolago lea ua tofia atu aemaise o le Komesina o Faiga Palota. O se matatia foi lenei vaega ua lua faatuina, tolu ni Tulafono ogagaoga ua tuuina mai i le Palestine o Samoa, e iloa ai le Minisita mataala i tulaga faapenei.

Ae o se sao o lenei Itumalo e tuuina atu ona o le tulaga lenei i faigapalota. Ou te faafetai ua m a foi le Komisi sa faatinoina lenei Tulafono Tau Faaofi o nai tamalii foi sa pauu atu i le Faiga Palota lea na tofia e le Palestine, ua

lava foi le latou silafia i tulaga uma o nei mea o faiga faatosina ma faiga palota. Ae ou te faafetai lava au ia i le Minisita ma lana Minisita Lagolago ona o lenei Tulafono Tau Faaofi ona ua aumai ni mea na tutupu e limataitaiina ai le agai i luma o nei a mea o faiga palota i le mamalu o le tatou atunu. O le talitonuga o le sui usufono mo Vaimauga Sasae, o teuteuga nei o teuteuga lava aua solitulafono. Ae a faapea lava o oe ua tofia e le Atua e taitaiina lea Itumalo e ala i le tofi faipule e leai a se mea e te popole ai, e faapena se lagona o lenei Itumalo.

Faafetai foi i le isi suiga lea mo i latou e resitala mai i fafo, i alo ma fanau ma i latou e aumau i fafo, faafetai i lea faatofalaiga. Ae o le popolega lea e i ai ona o le faiga palota, ua fafia le sui usufono ona o lea ua fai ni aulape e faatatau mo lima malolosi aua e le mafai lava e le au matitiva ona tauva ma

lima malolosi i nei mea o faiga palota. Ae ua aoga lenei Tulafono Tau Faaofi ua tuuina mai se i tuutuu ai i lalo le faaogaina o tupe a mautupe e faatosina ai le paia o le atunu. E le mafai la ona compete ma matou nei e lima vaivai. A o lenei Tulafono Tau Faaofi ua faataua ai le mea e te afio ai ma e alaala ai, o le popolega ona o lea o le a resitala mai sui mai fafo ia ona omái lea, e iai a le isi sui tauva e tele lona tamaoaiga e mafai ona resitala uma mai ai i latou i fafo e 1 tau i ai, aua o lea na resitala mai online ma toe totogipau mai le vaalele lea a tatou e aumai ai ana sui. Ia e pei o le popolega lena, a o lea e faataua le mea e nonofo ai, ia sei silasila ane i ai i lea tulaga ona a omái tagata ia mai fafo e tatau lava ona i ai le latou faasinomaga i inei i Samoa, e moni o i latou o alo ma fanau ia a o nisi na fananau i atunu mamao.

E pei la o le lagolagoina e lenei sui usufono o le Tulafono Tau Faaofi a le Afioga i le Minisita ona ua taofia ai le tagofia o tulaga e le tatau ona oo i ai nei sui tauva. O le popolega foi lea e i ai o lou sui usufono ona o i latou e tuuina atu i le faamasinoga, o lea e m a o le isi sui tauva e naunau a e le malo loa e naunau lava ina ia maua le afa o palota ia ona faaleaogaina ai lea o le sui la te tauva. O lau ia lagolago lau Afioga i le Minisita pe mafai ona tuuin aatu ina ia aveese le 50% ae tuu i luga i le 80% e maua e le sui tulua ina ia mafai ai ona taotaomia. O ai lava ua malo ia aumai lea sui, ae ta te popoe e pei ona saunoa foi le sui usufono mo Faleata e sao lelei o lenei sui usufono ua lailai i nei mea o faamasinoga. Ae o lea ou te faafetai i lenei Tulafono Tau Faaofi ua leai lava se leo o lea ua penefiti i le vaevaega o lona Itumalo.

O lenei la afiafi, e faafetai atu i lau Afioga i le Fofoga Fetalai, e lagolagoina e lenei Itumalo le Tulafono Tau Faaofi a le Afioga i le Minisita o Faamasinoga. Ma lou faaaloalo lava, faafetai.

FOFOGA FETALAI: Malo faafetai. Ua maea, ae se i tuu atu a le avanoa i le tausala e toatasi lea e tulai mai, le sui usufono mo Gagaifomauga Nu.3.

Afioga FAAULUSAU ROSA DUFFY-STOWERS (Gagaifomauga Nu.3): Faafetai lava i lau Afioga i le Fofoga Fetalai mo le avanoa. Ia e le tele lava se lagona e fia faaali foi e tusa ai o le Tulafono. E muamua lava ona faailoa atu i le Malo e lagolagoina le Tulafono Tau Faaofi.

O le lona lua e faafetai tele lava mo lenei Tulafono Tai Faaofi ou te talitonu e le te i a tupu fua le aumaiga o lenei Tulafono Tau Faaofi ona e i ai mafuaaga, ua fia tausaga o i ai Samoa i ituaiga mea faapenei ma taga o polokiki e fai lava faiga palota. Ma ou te mautinoa ma ou talitonu o lenei

Tulafono Tau Faaofi na faifai mai i vaivaiga ma ni faaletonu sa i ai le process i le faiga o faiga palota i tausaga ua mavae ma ou te talitonu foi a aveese ai le vaega lea ina ia mafai ai ona puipuia le sui o lo o tamoe ma le sui foi o lo o palota o le lelei atoatoa lena o le Tulafono Tau Faaofi, ina ia mafai ai ona eliminate le element o le corruption i totonu o le faiga o mea nei o palota.

O le lona tolu o se manatu, o le tele lava o tausaga pei ona ou maitauina foi i palota ia ua mavae atu nei, o le tele lava o Tulafono Tau Faaofi e le o mulimulitaia pe le o i ai se monitor o faia i ai i Tulafono Tau Faaofi o lo o i ai. E pei la o faiga palota aua e tele lava o la e tele a le alu o le faatosina ia i nuu i tua ma o le mea foi lena lea e ala ai ona tele faamasinoga e tutupu mai pe a uma le faiga palota talu ai ona o mea la e tutupu. Ma e momoli mai ai lava e le isi sui le isi sui lea na la tauva. Ae le i i ai lava se mea ua ou faalogo ai o molia mai e le Ofisa o Faiga Palota se sui talu ai e le o i ai ni a latou mau. Ae pe i ai se auala e mafai ai ona le Ofisa o Faiga Palota i tua e inspect uma itumalo i tua latou te molimauina ai po o i ai ni faatosina o fai ma ni aga ma ni mea faapena.

Ia, na o le pau lena o se manatu i lenei itula e fesoasoani atu ai i le tatou Tulafono Tau Faaofi ae faamalo lava i lau Afioga i le Fofoga Fatalai le onosai, faapea foi sui usufono mamalu o le Maota i le onosai i lenei aso. Ia faapea foi le tapuaiga a Samoa ua potopoto ma le tapuaiga a Samoa o lo o faafogafoga mai. Faafetai.

FOFOGA FETALAI: Ou te tapa ma le faaaloalo le Minisita mo lau saunoaga i nisi o mea sa laga e sui usufono mamalu.

Afioga Hon FAAOLESA KATOPAU T. AINUU: Faafetai i lau Afioga i le Fofoga Fatalai, ou te iloa foi ua vela le fala i le paia ma le mamalu o le Maota. O mataupu uma ia sa laga e sui usufono, o lea sa outou tagatagai mai sa ou faamaumauina uma lava. O lea foi sa taumafai Loau ma Afamasaga e faamaumau uma ia mea aua e taura i le matou faalogologo atu. O lea foi e i totonu i inei le Komesina o Faiga Palota ma le aufaigaluega atoa o la e faamaumau mea taitasi na outou lagaina mai. O lea la, o le a silasila totoa i ai le Ofisa ma avatu se fautuaga i le Komiti aua le lumanai o lenei Tulafono Tau Faaofi. Ma le faaaloalo lava lau Afioga i le Fofoga Fatalai.

FOFOGA FETALAI: Malo faafetai.

Na faamaonia le lafo ma faitauina le Tulafono Tau Faaofi o Faiga Palota 2018 i lona faitauga faalua.

FOFOGA FETALAI: E tusa ai ma Tulafono Tumau o le a tuuina atu le Tulafono Tau Faaofi i le Komiti o Tulafono Tumau, Mataupu Tau Faiga Palota, Talosaga ma Tofiga faale-Faavae mo le iloiloina ma toe lipoti mai i le Fono Aoao i le fonotaga e sosoo ai.

Ia malo faafetai ua tatou toai taunuu i le siui o le tatou galuega, ae tapa ma le faaaloalo lau Afioga i le Palemia.

LAFO MO LE TOLOPOINA

Susuga Hon TUILAEP AUELUA FATIALOFA LUPESOLIAI LOLOFIETELE NEIOTI AIONO GALUMALEMANA Dr. SAILELE MALIELEGAOI: Lau Afioga i le Fofoga Fatalai e momoli atu le faamalo i le lauliliuina o le tofa maualuga ia te outou o sui usufono mamalu o le Palemene. Malo foi i lau Afioga i le Fofoga Fatalai ona faapalepale i le sufiaina o taofi i auala eseese e mafai ai ona ausia le faamoemoe e pei ona taoto ai mo le faaleleia atili o Tulafono Tau Faaofi e faafoe ai a tatou faiga palota. Ia o le a agai le Tulafono Tau Faaofi i le Komiti, ia tautuana foi ma a outou Afioga i tatou o lo o mamafatu nisi vaega o tatou Tulafono ae o tatou lava e faaleleia tatou, e faaleleia fuafuaga mamao mo le faatinoina o faiga palota.

O le mea lea ou te tulai atu ai lau Afioga i le Fofoga Fatalai e faatu le lafo,
Ina ia tolopoina nei Taualumaga o le Fono Aoao sia aulia le Aso Lua, 29 Me 2018.

Faaluaina e le Minisita mo le Soifua Maloloina ma le Minisita mo Faatoaga ma Faigafaiva.

Na faamaonia le lafo.

FOFOGA FETALAI: E i ai le manatu e le faigofie le galuega ae ua mafua ona faigofie ona sa mafutaina i tatou e le agaga fesoasoani o le Alii, ua faapena foi ona iu manuia ai galuega o lenei aso. E le faigofie lo outou malosi, e tele foi ni tiute ma faiva o lo o faapena ona faamuli mai e ala i feau ma tiute o le Kapeneta aemaise foi o tatou uma lava o sui usufono tatou te galulue i le 24 itula ae a Samoa ma nai o tatou Itumalo. Ia o le matou tala lea e taumavae ai, ae tatou te le i tolopo i taualumaga o le fonotaga e pei ona faatuina mai le lafo, o le a ou faaiuina le tatou fonotaga i se tatalo.

Na tolopo le Fono Aoao i le itula e 4.08 i le afiafi sia aulia le Aso Lua, 29 Me 2018.